

**EIGHTH LEGISLATIVE ASSEMBLY OF MIZORAM  
(SEVENTH SESSION)**

**LIST OF BUSINESS**

FOR FOURTEENTH SITTING ON TUESDAY, THE 16<sup>th</sup> MARCH, 2021  
(Time 10:30 A.M. to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**FINANCIAL BUSINESS**

***\*\* DISCUSSION AND VOTING ON DEMANDS***

2. **PU K. LALRINLIANA**, Minister to submit to the vote of the House various Demands under his charge.
3. **PU C. LALRINSANGA**, Minister to submit to the vote of the House various Demands under his charge.

H. LALRINAWMA  
Commissioner & Secretary

---

\*\* Please see Bulletin Part-II Sl. No. 168 dated 9th March, 2021 for Demands to be moved by Ministers.

**SPEAKER** : *Sual ngam che in awm suh la, Thatna in sual chu ngam zawk rawh.* *Rom 12:21*

Zawhna leh Chhanna kan la ang a, chumi hmaa ka sawi duh chu, mipui thlantlin tawh chin MLA-te kan ropuina em ema ka hriatna chu, House-ah hian thahnemngaiin kan inhnial bap bap a, pawnah kan inkuah leh a. Ka la hriatreng chu Minister boral ta Pu B. Thlenga'n vawikhat chu, helaia kan inhnial hnuah, pawnah khan, "I rawn thlawk phei ang a, min rawn bawh nghal dawn emaw ka ti a" a ti a, khatiang kha kan ni thin a ni. Hei hi politician-te ropui vena a ni.

Tunah Starred Question No.205 zawt turin Pu L. Thangmawia ka sawm e.

**PU L. THANGMAWIA** : Pu Speaker, ka lawm e. Minister zahawm tak Power & Electricity Department changtu min chhan atan a ka zawhna chu –

- Mizoram-ah hian Hydel Project engzat nge siam zawh anih tawh? An power pekchhuah theihzat min hrilh thei em?
- Hydel Project siam zawh tawh hman tlak loh a awm em? A awm chuan engte nge?
- Hydel Project siam zawh loh, la siam mek te an power pekchhuah zat tur leh siam zawh hun tura beisei min hrilh thei em?
- Solar Power Plant siam zawh tawh leh siam mek a awm em? A awm chuan a hming, an power pekchhuah zat tur leh siam zawh ni/siam zawh hun tura beisei min hrilh thei em?

Ka lawm e.

**SPEAKER** : Chhang turin Minister zahawm tak Pu R. Lalzirliana ka sawm e.

**PU R. LALZIRLIANA, MINISTER:** Pu Speaker, ka lawm e. Pu L. Thangmawia, MLA zahawm tak zawhna chhanna chu –

- Mizoram-a Hydel Project siam zawh tawh leh an power pekchhuah theih zat chu a hnuia mi ang hi a ni :
 

1. Tuirial HEP (under NEEPCO)	-	60 mW
2. Serlui 'B' SHP	-	12 mW
3. Kau-Tlabung SHP	-	3 mW
4. Tuipanglui SHP	-	3 mW
5. Teirei SHP	-	3 mW
6. Tuipui MHP	-	500 kW
7. Khawiva MHP	-	1050 kW
8. Tuirivang MHP	-	300 kW
9. Serlui 'A' MHP	-	1000 kW
10. Maicham-I SHP	-	2 mW

11. Maicham-II SHP	-	3 mW
12. Lamsiam MHP	-	500 kW
13. Tuila MHP	-	(2x15) kW
14. Lau MHP	-	(1x15) kW
15. Tuisumpui MHP	-	(3x150) kW
16. Tuidum MHP	-	(1x15) kW
17. Laililui MHP	-	(1x15) kW
18. Vawralui MHP	-	(1x50) kW
19. Ramrilui MHP	-	(2x150) kW
20. Leiva MHP	-	(1x50) kW

b) Awm e, Project siam zawk tawh hmantlak tawh loh chu a hnuaia mite hi an ni :

1. Tuila MHP	-	(2x15) kw
2. Lau MHP	-	(1x15) kW
3. Tuisumpui MHP	-	(3x150) kW
4. Tuidum MHP	-	(1x15) kW
5. Laililui MHP	-	(1x15) kW
6. Vawralui MHP	-	(1x50) kW
7. Ramrilui MHP	-	(2x150) kW
8. Leiva MHP	-	(1x150) kW

c) Thei e, Hydel Project siam mek te chu :

1. Tlawva Small Hydel Project (5 mW) - He Project hi 5 mW power pechhuak thei tura duan a ni a. Tunah hian project hnathawh hi zawk a ni tawh a, tui duhtawka tam a awm veleha commission mai tura peih tawh a ni.
2. Kawlbem Small Hydel Project (4 mW) - He Project hi 4 mW power pechhuak thei tura duan a ni a. Kumin (2021) chhunga peih hman beisei a ni.
3. Tuiching Micro Hydel Project (100 kW) - He Project hi 100 kW pechhuah thei tura duan a ni a. Tunah hian hnathawh zawk niin Grid-a synchronise anih theihnan hmalak mek a ni.
4. Tuiriza Micro Hydel Project (100 kW) - He Project hi 100 kW pechhuak thei tura duan a ni a. Tunah hian hnathawh zawk niin Grid-a synchronise anih theihnan hmalak mek a ni.

d) Awm e. Solar Power Plant siam zawk tawh te chu :

1. Thungvel 2.0 mWP, Zoram Energy Development Agency (ZEDA) hmalaknaa siam a ni. Siam zawk Ni - Dt. 04.12.2020.
2. 100 kWP at Melriat Sub-Station, Power & Electricity Department hmalaknaa siam a ni. Siam zawk Ni - Dt. 19.09.2018.
3. 100 kWP at Sihmui - Sub-Station, Power & Electricity Department hmalaknaa siam a ni. Siam zawk Ni - Dt.25.10.2018.
4. 100 kWP Khawiva Sub-Station, Power & Electricity Department hmalaknaa siam a ni. Siam zawk Ni - Dt.29.07.2018.

Solar Power Plant siam mek te chu - 20 mWP Solar Park at Vankal, Power & Electricity Department hmalaknaa siam a ni. Kum 2021 chhungin siam zawh beisei a ni. 10 mWP Private Developer hmalaknaa thawh tura ruahman a ni.

**SPEAKER** : Zawhbelhna zawt turin member zahawm tak, a zawhna neitu Pu L. Thangmawia ka sawm e.

**PU L. THANGMAWIA** : Pu Speaker, ka lawm e. Ni e, Power hi a vei awm khawp a, Politics kan hmelhriat hma atang tawhin *Six basic needs* tiyah khan kan lo hre lar em em a, Middle School kan lak lai atang tawhin. Kan hotu hmasate pawhin hma an lo la nasa tawh khawp mai a, hotu thenkhatte phei chuan Mizoram-a lui zawng zawng khuah an tum ni te khan kan hre deuh a.

Tuna a rawn chhanna ah hian Pu Speaker, NEEPCO ina Tuirial min han tihsaka hi chu 12% chauh hi a thlawna kan chan tur niin ka hria a. Amaherawhchu, MNF sorkar hmasaa hmalakna Serlui-B, 12 mega watt te hi chu a vai hian 100% hi kan chan tur niin ka hria a, a lawmawm khawp mai a.

Ka zawhna chu, Pu Speaker, power policy-ah hian ka hriatsual loh chuan 12% bakah hian 1% hi a area a tihchhiat ho tana area development tur hi a niin ka hria a. Mizoram sorkar hian he policy hi a hmang ve em? Hmang ni ta se, Tuirial leh Serluiah te hian engtin nge a lo hman tawh? Tin, ka bial chhungah pawh solar power plant Vankal-ah te, Kawlbeam-ah te khan a awm a, mega watt 4 tur, Member zahawm tak East Tuipui bialtu bialah pawh khan a awm a. Khang hoah khan 1% kha a area-te develop nan khan a hman ve theih dawn em tih kha ka zawhbelhna pakhatna a ni a.

A dawt lehah chuan Vankal-ah mega watt 20 lai mai min tihsak dawn a, kumin chhunga hawn hman tur nia a rawn sawi kha a lawmawm khawp mai a. Kawlbeam-ah pawh mega watt 4 vel pechhuak thei turah EE thlengin dah a ni a, Ngopa-ah SDO te. Chuvangin, Kawkulh-ah hian heng enkawl tur hian power sub-division min dah sak ve thei ang em tih kha ka zawhbelhna hnuhnung zawk a ni e. Ka lawm e.

**SPEAKER** : Zawhbelhna zawt turin a phar hmasa ber Member zahawm tak Pu Lalrintluanga Sailo ka sawm e.

**PU LALRINTLUANGA SAILO:** Pu Speaker, ka lawm e. Power Minister zahawm tak hnena ka zawhbelhna chu hei hi a ni:

- i) Power & Electricity Department hian power leina tun dinhmunah leiba neih a nei em?
- ii) Power & Electricity Department hian a hnuai contractor emaw, supplier
- iii) hnena emaw, sum bat sak a la nei em tih ka zawt e.

**SPEAKER :** Zawhbelhna pakhat a la awm thei a, Pu Lawmawma Tochhawng a phar hmasa zawk nain, Zo People's Movement lam atangin Pu C. Lalsawivunga, Member zahawm tak ka sawm e.

**PU C. LALSAWIVUNGA :** Zo People tih hi chuan an tam viau zel mai a Pu Speaker, i dinglam a mite hi. Tunah pawh Pu Lalduhoma'n min lo thlir reng a nia. Ka zawhbelhna chu Pu Speaker -

- i) Serlui 'B' Hydel Project-a khawl pathum, unit I, unit II leh unit III-te hi tun dinhmunah power pechhuak turin a rualin tlan tir an ni em? A nih loh chuan engnge a chhan?
- ii) Kum 2019 leh 2020 December chhung hian transformer thar lei a awm em? Awm ni se, engzat nge? Lei a awm lo a nih chuan lei tumna a awm em tih kha ka zawhbelhna a ni e.

**SPEAKER :** A theih ang ang chhang turin Minister zahawm tak Pu R. Lalzirliana ka sawm e.

**PU R. LALZIRLIANA, MINISTER:** Pu Speaker, ka lawm e. Zawhna neitu Member zahawm tak Pu L. Thangmawia khan a bial Kawllem 4 mega watt pekchhuahna turah bial tan eng percent nge hamthatna, bial development nan chan ve theih thil te a awm em tih a rawn zawt niin ka hria a. Hetiang ang hi tunah chuan ngaiantuahna kan neih ka hre hauh lo a. Tlunghuak solar power plant-ah khan lo chhita, midang aia chhit hnem deuh te pawh an han duh a, an ti thei mang si lo a, kawngte kha an han dal a, an han hawng tur te pawh kha harsatna te pawh min han siam deuh a. Amaherawhchu, khilaiah khian sub-station dang kan pek tak avangin tha takin kan awm tlang leh thei ta a. Keimahni leh keimahni, company dang dairi tena an rawn tih a ni hran lem lo a, kan rama awm tur, eng kan lo neih that vena tur, kan bialte chu eng kha khalaiah khan nidang aiin kan nei tha ngei mai dawn a, kan commission hnuah chuan, chung chu kan beisei leh kan chan tur ni mai ta se la, midangte tana luan chhuahna remchang tak, midangte tana malsawmna kan nih theih ang kha kan chan chu ni se la, thil tih ropui takah kei chuan ka han ngai deuh a. Amaherawhchu, ka lo en zui zel dawn nia.

Kawlkuh-ah hian sub-division hawn theih ve a ni ang em a ti a. Kawlkuh khuaah khian chutiang tur chuan proposal-te pawh kan han nei thin a, sanction ti thei deuhte hian kan hmu mai dawn e an rawn ti thin a, eng emaw supply beisei ve pah hian; an rawn sanction dawn emaw kan ti thin a, kan hmu hleithei lo a. Tunah hian sub-division puitling han ti tur hi chuan kan sorkar hrim hrim, sorkar hmasa lam atang tawh pawhin post creation banned-te, fill up te, banned vek a nih avang hian thil tih a harsa a ni a, kan indaihloh dan chu niminah kan sawi tawh a, inthen darh mai tur pawhin kan la harsa deuh hrih chu a ni e.

Tin, Member zahawm tak zawhna pahnihnaah Pu Lalrintluanga Sailo-in a rawn zawh kha, power leinaah hian leiba kan nei em tih a rawn zawt a. Power leina tunah hian cheque kan ziah sa pawh ka keng mai ta lo a, ka hre lova, zawhnaah khan a lo chhuak

hlawm a. Treasury-a tang ringawt hian cheque hi ziah a ni tawh a, hetiang hi power lei nan sorkar hian pawisa min pe a, chuta tang chuan a hun taka kan lei a, rebate-te kan hmuh ve theihna tur atan tiin tan kan la a, a hun takah kan han thawn dawn zat zat a. Tunah hian ka hriatsual loh chuan vaibelchhe 170 vel hi Treasury-ah ringawt hian a tang a ni. Chu chu a vaia kan leina tur la ni lovin, Treasury-a tang January, February thla vel atang khan a ni mai thei e, ka sawi sual mai thei a. Engpawhnise, vaibelchhe 170 bawr vel a ni tih chu kan hre thei mai a, tang a awm a ni. Chu chu Kan Chief Minister zahawm tak, Finance Minister pawh hi tunah hian a lo kal leh a, ka rawn keng chiah chiah leh nghal a, nimina ken tum ka ni a, ka theihnghilh a, a file hi enpui ka duh a, nakinah recess room-ah. Remchang a nih chuan hun min pe turin kan book nghal ni bawk se la.

Leiba hi kan ngah ang reng khawp mai a, contractor leiba hi vaibelchhe 3.8 chuang kan nei a, supplier leiba hi vaibelchhe 37,9,26,000/- chuang kan nei bawk a. A vai chuan vaibelchhe 77, 78 bawr vel hi leiba kan nei a ni. Hei hi tun hnai mai a mi ni lovin, sorkar kal ta atanga supplier liante, sorkar kan han thlak tak atanga rawn inhlau chhoh zel kha a ni a, leiba hi a awm nual a ni tih kha ka sawi duh a ni.

Serlui-B Hydel Project-ah hian khawl 3 bun a ni a, pakhat hi a chhia a, 2 hi an *run* deuh ngar ngar a, tunah pawh hian a la *run* turah ka ngai a, thu thar ka dawng lo a. Pakhat pawh hi siam that theih kan in beisei a, phai lam atangin diver-te hmanni lawkah khan 11 lai kan chah chhuak a, khatiang ang thiam mi kha, tui chhungah an zuk lut ngar ngar a, hun rei tak an zuk thawk a. Chu chu an siam tha dawnin ka hria a, kan lawm khawp a. Tunah khuan eng eng emaw thawm leh tur leh khatiang kha a la awm hlek avangin a pathumin a kal lo deuh mai a ni tih ka hriat hnuhnung ber ah chuan a ni.

**PU C. LALSAWIVUNGA:** Pu Speaker, a dang leh zawk kha ka zawt leh mai ang e, i remtihnain. (**SPEAKER:** *A dang sawi belh awih chuang loh*) Pu Speaker, Kum 2019 – 2020 December chhung hian transformer lei a awm em? Eng zat man nge? Lei a awm lo a nih chuan lei tum na awm em?

**PU R. LALZIRLIANA, MINISTER:** Kan pawl ni awm tak i ni. Kan thil tih thatte sawilang turin min han duh niin ka hria a, a lawmawm hle mai.

Tunhnai mai pawh khan kan Chief Minister thil phalnain transformer 10, (a hming ka hre leh tawh lo a) kan book mek a, a manufacturing company-ah hian siam sa hi a awm mai bik lo a, an siam mek a, kar leh lamah hi chuan rawn thawn theih an inbeisei a. Chuvangin tunah hian a thar 10 kan nei dawn a, a hma pawh khan nikum 2020 bawr chho velah khan 20 chuang lai kan lei bawk a, tunah hian ka beisei aiin transformer chhia hi hluihlawn mai lovin a thar han thlakna tur leh a thar pawh ni lo siam thata a thar ang tluka siam leh te pawh awm thei a ni a, chutiang chuan a chhe zual deuh te, a te deuh 50 te kha 200 a han thlak te, 250 a han thlak te, kha aia lian load la tam tawh 500 kVA-a han thlak te kan nei a, tunah hi chuan rawn sawi hi an tam lo tlangpui deuh a ni. Ka lawm e.

**SPEAKER** : Starred Question No. 206 zawhna zaws turin Member zahawm tak Er. H. Lalzirliana kan sawm e.

**ER. H. LALZIRLIANA** : Pu Speaker, ka lawm e. Social Welfare Department changtu Minister zahawm tak chhan a tan ka Question chu hei hi a ni e - Rawpuichhip khua ah hian EMRS Residential School din tumna a awm em? tih a ni.

**SPEAKER** : Chhang turin a changtu Minister zahawm tak Dr. K. Beichhua a kan sawm e.

**DR. K. BEICHHUA, MINISTER:** Pu Speaker, ka lawm e. Member zahawm tak Er. H. Lalzirliana zawhna chhanna chu - Rawpuichhip khua ah tun dinhmunah EMRS din tumna a awm lo.

**SPEAKER** : Zawhbelhna zaws turin a zawhna neitu Member zahawm tak Er. H. Lalzirliana ka sawm e.

**ER. H. LALZIRLIANA** : Ka zawh belh rualin Pu Speaker, kan Minister zahawm tak hian nimin khan Lengte-ah khan Vety Dispensary hawn tawh tih khan a rawn sawi a, kha kha min rawn sawi fiah sak se la, kan bialah hian kan hriat mang lova tih zeuh zeuh hi a awm thin a, kan hriat lohin an lo zuk hawng leh tawh emaw ni chu aw ka ti a, lawmawm lamah kan ngai a, mahsela min rawn hrilh fiah chiang thei turah kan ngai a.

Ka sawi thin a, ka sawi leh ang a, MLA bialah hian RD Block-4 (pali) handle awm chhun ka ni a, Mizoram Constituency hrang hrangah. Chutah chuan ka bial chhungah hian RD Block Headquarter pakhat mah a awm lo a ni. Tuna EMRS kan kalpui tum danah pawh hian RD Block Headquarter-ah deuh tih a niin kan hria a, chutih anih chuan kan bial chu kan kawt nghal dawn tihna a ni. Chuvangin, hei hi a thawm deuh kan han hriat a, kan sawi khan an phur khawp mai a, Rawpuichhip chu a ram pek tur pawh tunah khuan an nei sa vek tawh a ni, duh ai lian anih ka ring a. Reiek RD Block hnuaiah a awm a, a bialtu pa Pu Rintluanga pawh hian, "In neilo em mai, hei hi chu ti ve mai rawh" a tih duh ka ring a, chuvangin Rawpuichhip-ah khuan awm thei hram se la, tih hi ka duh dan a ni a. Chutiang tur chuan hma min lakpui thei a ngem tih kha thahnemngaihna nen ka han zaws pah a ni e. Ka lawm e.

**SPEAKER** : An phar tam khawp mai a, Dr. K. Pachhunga Member zahawm tak ka sawm e.

**DR. K. PACHHUNGA** : Pu Speaker, ka lawm e. Hon. Minister Social Welfare Department changtu chhan atana ka zawh belh duh chu, ka bial chhung Tawipui N-I leh Tawipui N-II, Tuipui South tihah te National Highway widening avangin Aganwadi building tih chhiat a ni dawn a, he deposit work hi kawng laih zawh hun a sak tur nge, kawng

laih zawh hmain tih kha chhan a harin ka ring lo a. Ka zawh belhna 2-na ah chuan, Article 275 hnuiah Lunglei South bial tan development project kan rawn siam ve thin a, mahse kan la hmu lo a, hei hi hmu ve tur hian eng priority nge ni ang, criteria a tul ang ang min hrilh theih se ka lawm khawp ang. Ka lawm e.

**SPEAKER :** Ruling in phar NASA a, tunah Pu Rokhaw te lampang, Congress atangin kan ti ve tawh ang a, Pu C. Ngunlianchunga, Member zahawm tak i lo sawm ang.

**PU C. NGUNLIANCHUNGA:** Pu Speaker, ka lawm e. Ka zawh belhna 1-naah chuan Lawngtla, Tuijang leh Chawngte-a EMRS building sak mek hi engtikah nge sak zawh a ni ang tih a ni a. 2-naah chuan, he hna thawktu contractor hi tunge? 3-naah chuan, engtikah nge Class tan theih a ni ang? Hman nia chhannaah khan admission lak tawh thu kan ngaithla tawh a, class hi school building-ah ngei engtikah nge a tan theih ang tih ka zawt a. 4-naah chuan, building sak hi hman ni a IR kan sawi tawh ang bawk khan a ceiling hi plaster loh tur em ni, plaster loh tur anih chuan a dik mai a, plaster tur anih chuan plaster loh anih hian a bill-ah deduct a ni ang em?

Tin, electric ban phun hi eng deparment thawh nge? He contractor hnuiah hian Pu Speaker a thlalak ka nei a, ban 20 an phun a, pakhat mah cement-in an chhilh lova, a then a awn a, a then chu 132 banah angle an tawn a, leh lamah thingkungah an kham kai a, chutiang chuan hrui te an zam a, an ti duhdah khawp mai a, chu chu tute thawh nge?

A tawp bera kan zawh duh chu, a bang (wall) atan hian estimate-ah brick nge hman tur ni a ACC block? Brick hmang lovin ACC hman lo ni ta se, plan leh estimate-ah khan ACC tura tih reng em ni? ACC an lo hmang anih chuan, brick hmang tura tih ni si, a man kha a inthlau fe mai a, bill-ah deduction a awm ang em tih kha Pu Speaker, ka zawhna a ni. Hei, a thlalak pawh ka nei leh vek mai, a ceiling-te, electric ban-te pawh hi han en ila, a then helamah a awn a, a then sawlamah a awn a, rul, utawk dawlh ang maiin, a in pawnhleih per pur mai a. Pu Speaker, khawngaih takin he laiah hian ka han sawi duh vena leh thlalak nen ka han tihna chhan chu kan Minister hian atih chu a ni hauh lo ang a, a monitoring-ah hian uluk se la, hna hi tha rawh se tih hi kan duh a ni. Chulai chu zawhna ka han zawh duhna chhan pawh a ni a. Contractor tihmualpho emaw, department tihmualpho emaw ka tum lam ni lovin, he ramah hian dikna lal se la tih kha ka duh a, chu chu Pu Speaker, ka zawhna a ni e. Ka lawm e.

**SPEAKER :** Minister din lai khan va tauh tawh suh aw. A theih ang ang chhang turin Minister zahawm tak Dr. K. Beichhua chhang turin ka sawm e.

**DR. K. BEICHHUA, MINISTER:** Pu Speaker, ka lawm e. Zawhna neitu Er. H. Lalziriana zawhna han chhang phawt ila. EMRS hi ka hriat angin tun kan term-ah hian 11 (sawmpakhat) kan zuk dil chhuak a. Chu chu guideline mumal tak nei niin, Ministry of

Tribal Affairs-in education-a tribal-te tan flagship programme anga neih a ni. Hei hi population 20,000 an awma 50% tribal an nih chuan EMRS hi din theih a ni ang tih a ni. Chutih lai chuan kan hriat angin tunah hian 17-na kan sak tan turte nen chuan Mizoram-ah a ni a. 17-ah chuan tun sorkar tharah hian 11 a ni ta a, a hmaa kan hotu hmasa ten an lo dil chhuah kha 6 a ni. Chung avang chuan vawi leh khata block zawng zawng min pek pawh hi an harsat deuh a, vawi khat kan zuk dil khan 5 min rawn pe a, a vawi hnighna-ah 6 min rawn pe leh a, min la pe chho zel turah ngai ila. A block anga kan zuk dil kha kan sawi tawh angin, vawi leh khat a tam deuh zuk dil kha chu an tih loh avanga inthlahrung deuh hleka kan zuk dil a ni a. A guideline ang anih chuan Rawpuichhip tan pawh hian dil theihna chance kan la nei ang tih kha kan inchhanna ni se.

Tin, Pu Speaker, nimin lam a kan wind up-a a rawn sawi kha a dik a, a zaghna kan lo dawnsawn dan kha a dik lo a, tah khan kan Member zahawm tak pawh kha bial chiang loah te kan han inti a, fiamthu ti tih deuh khan. Lengte hi RH centre zawk a ni a, Lengpui anga ka lo ngaih vang a ni a, Lengpui khu dispensary a upgrade a ni. Kan zaghna neitu hian a bial a hrechiang hle a ni tih kha ka chhanna a ni e.

Member zahawm tak Dr. K. Pachhunga zaghna, Tawipui North-II leh hmundang a bial ami National Highway-54 in a tihchhiat Anganwadi te hi hmundang a kan tih dan ang anih chuan a kalkawng an zagh phawt loh chuan a hmun hma han lak kha thil remchang a ni lova, compensation pawh kan dawn ngei ka ring a. Tuipang-ah te pawh kan dawng vek a, chutiang chuan kawng siam zaghna siam tur a ni ang tih lai kha kan inchhanna ni se.

Tin, Lunglei tan Article 275 (1) atanga criteria eng anga thlan nge anih tih lai kha, niminah pawh ka sawi chiang tawh a. Pu Speaker, Article 275 (1) a project kan siamte hi heta atanga direct a kan thawn ni lovin, District in DC Chairman-na hnuaiah he proposal hi siam a ni a. DC atangin proposal department-ah an lo thawn a, chu chu department-in State Level Evaluation Committee paltlangin central lamah thawn thin a ni. District duhsak bik leh duhsak loh bik a awm lo tih lai kha ka chhanna a ni.

Tin, Pu Speaker, member zahawm tak Pu C. Ngunlanchunga zaghna kha EMRS Chawngte, Lawngtlai lei Tupang hi Ni 18.10.2016 a work order tihchhuah a ni a, a chhuah atangin 36 months a zagh tur tih a ni. Chutiang anih chuan Ni 18.10.2019 hi a zagh ni tur ang a ni. Mahse a hmun hma awmna te hi a kilkhawr a, transportation-ah problem tam kan lo nei a, a bik takin Chawngte phei chu nimina kan sawi ang khan Lawngtlai - Chawngte pawh a kalna kawng khu a tha lova, furah phei chuan hnathawh khu a harsa a, Tin, Chawngte atanga EMRS awmna khu kawng awmlo tluk a ni a, chuvang chuan duh angin hna hi kan chak thei lo a pawi kan ti a. Chuti chung chuan theihtawpin kan intur ve bawk a, contractor te pawh thahinem an ngai a, tunah hian nasa takin hma an la a, nikum kha chu kum awmlo tlukah ngai ta ila hnathawh nan chuan, nikumah khan kan ti hleithei lova, pawi kan ti a. Kumin 2021-2022 inkarah hi chuan zagh kan tum a, a bik takin Lawngtlai phei hi chu contractor te sawi danah chuan April-ah hian kan complete ang tih min chhanna a ni.

Tin, a contractor hi North East Consultancy Services te an ni tih kha ka rawn chhanna a ni. Tin, school building-ah ngei engtikah nge school tan anih ang tih kha, hmannia kan inzawh khan class pawh tan tawh a ni kan ti a ni. Furniture engmah a awm lova, mahse furniture lam kha min zowt bawk si lova, class kha min zowt a ni. Chuvang chuan class chu kan tan a, online in tunah hian class kan kalpui map map a, la zo lo chungin thahnem kan ngai a, online in class kan tan a. Tun atanga reilo teah chuan a bik takin Lawngtlai-ah phei chuan furniture pawh kan order vek tawh a, class chhungah ngei class an neih theih kan beisei a ni.

Tin ceiling plaster chungchang hi, ceiling plaster ngai lovin readymade board hmanga tih a ni a, plaster aiin department-in tha te pawh kan ti deuh zawk niin a lang, plaster nen sum sen inang vela ngaih a ni ti lai kha kan inchhanna ni se. A that leh that loh .... (*Pu C. NGUNLIANCHUNGA: Pu Speaker, khawngaih takin khatah khan a estimate .....*) I zawhna dangte pawh kha ka han chhang phawt ang a i lo ding leh dawn nia. Pu Speaker, kan concentration te pawh a tibo a, a zawhna dangte pawh kha kan chhan thiam loh palh a hlauhawm a. Pu Speaker, amah ka chhang lo a, nangmah ka rawn address che. i dinglama mite hi chu tihdan ang thlapin kan ti thin Pu Speaker, mi kan tibuai ve ngai lo, kha kha ceiling plaster chungchang ni ta se, Pu Speaker.

Electric hi hmannah khan kan buaipui nasa khawp a, saw lam Electric Deptt. te kan va phone thul, class tan a hun tak avangin. Hei hi tuna a thar kan neih ah hi chuan electric hi anmahni contractor te hian an ti tel vek a. Tuna Lawngtlai te hi chu, a contract work pawh hi crore 16 a ni a, tuna kan neih mek te hi crore 24 vek an ni a, chuvang chuan hei hi department lam tum tur nge ni contractor tih tur hi ka chiang chiah lova, Pu Speaker, min lo hrethiam se, a remchang hmasa berah kan inhrilh turah ngai ang.

Chu lovah bang atana brick nge ACC, bill ah deduction a awm ang em tih lai hi, a bik takin Lawngtlai ami hi Covid Care Centre-ah khan hun rei tak kan hmang a, keipawh hian nikum lamah tlawh ka tum thin a, damlo an awm an tih avangin a hmun ka thleng lova. A bang hi a thlalakte lo nei thei leh phei se chuan kan chiang zawk tur ani a Pu Speaker, thlalak te a neih theih chuan kan lo enchiang ang a, plan and estimate mil thlapa tih a nih chuan sawi theih kan nei lo ang a, plan and estimate lo anga thil a lo kal anih chuan department chuan chu chu kan ngaihven turah kan ngai. Pu Speaker, ka lawm e.

**SPEAKER :** Starred Question No.207 zowt turin Member zahawm tak Pu Lalrinsanga Ralte ka sawm e.

**PU LALRINSANGA RALTE:** Pu Speaker, ka lawm e. Health & Family Welfare Deptt. changtu Minister zahawm tak ka zawhna chu hei hi a ni e.

Health Clinic Centre hi a mamawh khuaah te dah sak tumna a awm em?

**SPEAKER** : Chhang turin a changtu Minister zahawm tak Dr. R. Lalthangliana ka sawm e.

**DR. R. LALTHANGLIANA, MINISTER:** Pu Speaker, Member zahawm tak Pu Lalrinsanga Ralte zawhna chhanna chu – ‘Aw, awm e’ tih ka chhanna a ni.

**SPEAKER** : Zawh belhna zawt turin zawhna neitu Member zahawm tak Pu Lalrinsanga Ralte ka sawm e.

**PU LALRINSANGA RALTE:** Pu Speaker, ka lawm e. Health Minister min chhanna a thlamuan thlak hlein ka hria a ni. Nikum khan Covid avangin health clinic an lo pek tawh eng emaw zat kha khar leh niin ka hria a, khang kha hawn thar leh tumna a awm em tih kha ka zawhbelh duh a.

Tin, pahnihna ah chuan Thingthell ah khuan building kan nei sa a, official in health clinic ah min puan sak ve thei em, tih kha ka zawh belh duh a.

Tin, pathumna ah chuan, Saihaipui-V, North Chhimluang leh Rengtekawn ah te hian sub-center emaw clinic center emaw hi a la awm lo hrim hrim mai a. Tunah hian MLA fund leh thil dangin clinic center tur hi kan han sa risk ve tawp mai a, hengte hi clinic center-a min puan sakin, thawktu health worker te min dah sak thei ang ngem? Hei hi a pawimawh ropui si a, ramri kan buaina kha a ni a, MNF sorkar ah chiah hian development kan hmu thin a ni an ti a. Chuvangin an tan malsawmna kawl a lo eng leh a, MNF sorkar, Pu Zoramthanga kaihhruai a rawn awm leh a, hmasawnna thar an hmuh leh theihna turin tunah hian health clinic an mamawh hle mai. Hei hi min puansaka a thawktu tur min pek theih chuan kan lawm ngawt ang.

**SPEAKER** : Tunah zawhbelhna zawt turin Pu B.D. Chakma i lo sawm ang.

**PU B.D. CHAKMA** : Pu Speaker, ka lawm e. Ka zawhbelhna chu, Borapansuri PHC kha Pu Speaker, Health Minister inih laia sak zawh kha a ni a. Tin, CADC-ah CEM ka nih laiin, PPP in CADC leh Health Department te nen tang kawpin kan kal kha a ni a. Mahse tunah chuan PPP mode kha a zo tawhin kan hria a, chuvangin kan staff te hlawh hi CADC-in nge tum State sorkarin tih kha ka zawt duh a.

Tin, Lawngpuighat Primary Health Center building pawh hi sak zawh a ni tawh a, tunah hian a ding mai mai a ni. Kumin financial year chhungin hawn tumna a awm em tih kha ka zawt e. Ka lawm e.

**SPEAKER** : Zawhbelhna zawt turin Member zahawm tak kan zinga junior ber Pu Zothantluanga ka sawm e.

**PU ZOTHANTLUANGA :** Pu Speaker, ka lawm e. Nimin recess zawh khan Pu Rintluanga sailo member zahawm tak nen Civil Hospital Dental doctor te rawnin kan va kal a. Doctor tha tak tak kan lo nei a, kum 2015 atang khan Operation Theatre tur hi peih fel a ni tawh a, hmanraw zawng zawng engkim a in peih tawh a. Tin, Dental Ward tur pawh hi room a awm a, khum pawh awmsa vek a ni a. Tichuan a function theih lohna chhan chu staff indaihlohma avang a ni a, nurse leh IV Grade chauh an mamawh a. Tunah hian cancer zai ngai nitin deuh thaw an awm a, chutih lai chuan ENT OT ah ENT te remchang dan angin zaina hun an nei ve thin a, an patient te ward neihloh avangin Ortho-ah khum pahnih an reserved chauh a ni a. Hei hi engtikah nge hawn sak ve an nih theih ang? Engkim a awm tawh a, nurse leh IV Grade tlem lak sak mai hi a theihloh anih pawhin MHM atang talin emaw lak saka OT function tir theih dan a awm em?

Tin, Mizoram ah hian Dental Surgeon 27 chiah an awm a, kum 30 dawn lai thawk tawh te an nih laiin promotion-na tur post an nei lova. Hengah hian an dinhmun tur siamthata, ngaihtuah sak theih dan a awm em? Hun rei tak post thar lak a awm lo a ni tih kan hriat hian, an dinhmun hi kan Health Minister chak tak hian a ngaihtuah sak thei ang em tih kha ka zawh belh duh a ni e. Ka lawm e.

**SPEAKER :** Awle, a theih ang anga chhang turin Dr. R. Lalthangliana, Minister zahawm tak i lo sawm ang.

**DR. R. LALTHANGLIANA, MINISTER :** Pu Speaker, ka lawm e. A zawhna neitu zawhna - Covid avanga clinic khar tak hawn leh tumna a awm em tih kha chu, kan tum ang a, a tul bawk a. Tin, Saihapui-V, Rengtekawn, Chhimluang, leh a dang kha sawi belh a awm em ka hre chiah lova, Thingthelh building sak vek tawh tih te, kha lai kha a pawimawh kan ti a, a hmunah kei pawh ka kal tawh a. Tin, Rengtekawn, Chhimluang, Saihapui-V tih te pawh hi a pawimawh hle mai a, chuvangin hawn hram kha kan tum a ni tih kha ka chhanna ni mai se. Kolasib district hi Covid-19 chungchangah phei chuan an hah fal hle mai a, a pawimawh hlein ka hria a ni. Chuvangin ngaihtuahna kan seng mek a ni tih kha ka chhanna a ni e.

Tin, Dr. BD Chakma zawhna, Borapansuri PHC hi session tinah kan thingri a, a buaithlakna lai a awm a. PPP Mode khan tunhma khan a lokal a, mahse a zo tawh a thil chinfel ngai hi kan nei hlek a ni. Theihtawpin tan kan la chho ve mek a ni tih kha ka chhanna ni mai sela, rang taka tih dan kawng hi chu kan ngaihtuah ve khawp mai. Lawngpuighat a nih dan tur la ni lo tih lai a kha, kan harsatna lai bera chu tlang deuhvin sawi ila, doctor dah tur hi kan nei hlei thei lova. Tin, Sesih pawh kha rei tak Pu Vaivenga hun laia hawn tawh kha a han function ve tan chauh a ni a, a harsa deuh hlek a. Engpawhnise, Covid-19 avanga doctor lak kan han ti hlei theilo lai khan min ti buai deuh hlek a. Hei hi ngaihtuahna kan seng khawp mai a, kan meeting apiangin kan sawi deuh zel a ni tih kha ka sawi duh a.

Tin, staff sum pek leh pekloh tih lai council nge ni state sorkar tih lai a pawh kha ngaihtuahna kan seng khawp mai a, rin aiin a buaithlak ang reng a. Engpawhnisela, a pawimawh a khulai khu, hriselna lamah theih tawpin hma kan la mek tih khan ka han chhang mai ang e.

Tin, Pu Zothantluanga zawhna kha a pawimawh khawp mai a, Dr. Thiamsanga nen pawh hian tum hniih niin ka hria, dental civil hospital-a kan han tihna tur ang chi pawh kan han en tawh a. NEC atang khan sorkar hmasa hun lai atang khan equipment tha tak tak te an lo lei tawh a, dah a ni tawh a, mahse hman lovin a awm reng mai a a pawi pawh kan ti a. Nikum chho velah pawh khan dental doctor hi kan Chief Minister hova sawi niin lak kha kan tum a, vaibelchhe 50 lai mai kha Health Department hrim hrima hna lak tur khan phalsak kan ni vek lai khan, Covid avangin kan la thei ta lova, chung zingah chuan dental doctor 10 lak tur a pawh hi a tel a, MPSC kal tlanga lak a ni dawn a. Tin, dental doctor hrim hrim hi doctor zingah hian lak thar hi a ni ngai mang lova. Ka hriat sual loh chuan kum 20 kal ta atang khan kan la lo niin ka hria a, state sorkar hian. Hetiang em em hi chu a fel lo khawp mai a, khilaia ward khum 6 kan nei tih pawh kha a dik a, khami function tur khan doctor a ngai ta a. Tin, nurse duty tur ward anih chuan a ngai ngei ngei a, Grade-1V a ngai ngei ngei a, chu pawh chu hisab felfai tak kumtawp lam atang khan kan neih sa a awm a. Engpawh nise, financial year thar te a ni a post sanction pawh neih fel a ni tawh a, lak mai tura tih tawh tlema finance lamte nen pawh inbiaa *austerity measure* tih vanga kan kalpui theih loh lai kha a ni. Ti thei thuai turah beisei i la a tha awm e. Khawl rei tak hmanloh awm kha delicate tak a ni leh nghal a, hei chu tih ran tul kan ti khawp mai a, sorkarin ngaihtuahna kan seng mek tih kha ka chhanna ni se.

**PU K.T. ROKHAW** : Pu Speaker, Minister a din lai khan khawngaihin, Tipa PHC medical officer hi maternity leave a la a, tunah khian doctor kan neih lohna kar hninhna a ni tawh a, khawngaihina ai awh tur hi a rang lamin min pe thei ang em tih ka zawt duh a.

Tin, a pahnihna-ah chuan, Siaha Nursing School building hi zawh fel a ni tawh em? Zawh fel ni lo se engnge a chhan? Tin, Siaha Hostel hi sak tan a ni tawh em? Tunge contractor?

A tawp berna atan, PHC hi Community Health Center ah hlankai tumna a awm em tih te hi khawngaihin min chhan theih vek ka ring a ka zawh belh a ni e.

**SPEAKER** : Pu Speaker hi a fel ti raw? Zawh belhna ka pe teuh zel mai che a.

**DR. R. THANGLIANA, MINISTER:** Zawhbelh phalna hi 4 thleng a ni maw? Engpawh nise a tha e. ‘Tuipang’ kan tih thin Tipa kha kan lo hria a. Doctor han post mai tur hi a buaithlak khawp mai a, indaih lohna a nasa si a. PHC, CHC a lo awm a, tin damdawiin eng emaw zat kan lo neih karah hetianga leave la anih chuan ngaihtuahna seng i la. Tin, a theih hram chuan Member zahawm tak takte ka han chah duh che u chu, in hre thei anih chuan, MBBS doctor zir chhuak tawh si, hna hmulo te hian a hla deuha awm an hreh thin a

cheng 50,000/- tleng kan pe thei a, eng emaw tiin. In hre thei anih chuan min hrilh u la hla deuh anih pawhin tlwmngaia an lo awm hram khan min chhawk khawp mai a, chutiang chuan kan in adjust kual a ni. Khati zawng khan ngaiantuahna min senpui u la, Tipa kha a pawimawh a kan lo chhinchhiah ang.

Nursing School chungchang kha a buarchuar khawp mai a, kan hon. Minister sawlai bialtu Dr. Beichhua nen pawh kan tlawh a, sorkar hmasa hunlaia sak ang chi, thil chirik tak tak chinfel ngai a awm a ni. Helaia han sawi vek chi pawh a ni chiah lo a. Engpawh nise office-ah pawh lo la leng la, i hriat ve ngaite pawh a awm ve tho mai a, thil hi transparent vek se tha ka ti a, a buarchuar deuh nuai a ni. A buathlak khawp mai. Hna lo inhlan chhawn tam lutuk ang chi hi hna hian a tuar duh khawp mai tihte pawh hi hriat a thain ka hria a, kha kha ngaiantuahna kan neih tlan a pawimawh ka ti khawp mai.

Health & Wellness Center-a dah tur tih chungchang ah hi chuan Pu Speaker, a khaikhawmna ang deuhin han sawi ta i la.

Kan bial zawng zawnha sub-center 374 Mizoram-a kan neih hi Health & Wellness-ah hian kan dah vek theih kan beisei tih khan ka chhang vekin ka ring a. A hmasaa tih tur chi deuh hi chu a awm ve a, a chhan chu sub-center thenkhat health worker neihlohma hi kan la nei tlat mai a. Chuvang chuan health worker post 309 lai ruak hian mi a khawih buai khawp mai a. A awlsam zawng chi te pawhin kan CM ho hian kan sawi tawh a, chutianga tih te a ngai dawn a. Tin, Health & Wellness Center-ah kan dah chuan kha sub-center-ah khan Health & Wellness Officer kan dah ang a, IGNOU hnuiah M.Sc. emaw B.Sc. Nursing kha training thla ruk chhung kan pe a, damdawi a tlangpui han chawh ve theih ang te, eng eng emaw a tih ve theihna tur ang chi, treatment te, building repair ang te a keng ve teuh mai a, kan tih theih chuan awmzia a neih ka ring. Tikhan khaikhawm deuhin ka chhang mai ang e, min hrethiam dawn nia. Member dangte pawhin Health & Wellness Center-ah engatinge min hlankai loh tih kha a chhang thei vekin ka hria. Dah vek theih 2023 ral hma hi chuan kan beisei a, eng tak ang ang maw. Chu chu kan target a ni e.

**SPEAKER** : Starred Question No. 208, zawt turin Member zahawm tak Pu Vanlalhlana i lo sawm ang.

**PU VANLALHLANA** : Pu Speaker, starred Question No. 208, Minister zahawm tak, Urban Development & Poverty Alleviation Department enkawltu chhan atana ka zawhna chu –

AMC-ah hian thuneihna eng angte nge pek belh tum anih? tih a ni e.

**SPEAKER** : Chhang turin a changtu Dy. Chief Minister zahawm tak Pu Tawnluia ka sawm e.

**PU TAWNLUIA, DEPUTY CHIEF MINISTER:** Pu Speaker, Member zahawm tak zawhna chhanna chu –

India danpui schedule 12-na behchhanna siam, “The Mizoram Municipalities Act, 2007, section 57-in a tarlan danin, municipality thuneihna emaw, an hnathawh tur, function tur subject 18 dah a ni a. AMC hian sorkarin subject a pekte hi an capacity mil zelin a tahtawlin an khawih chho a. Tun dinhmunah hian subject 3 - Roads and bridges, Water supply for domestic, industrial and commercial purposes leh Fire services tih loh hi chu AMC khawih theih tura order pek fel vek a ni tawh a. AMC tlin tawk ang zelin sokar chuan subject zawng zawng pe tur pawhin ruahmanna a siam zel ang.

**SPEAKER** : Zawhbelhna zawt turin zaghna neitu zahawm tak Pu Vanlalhlana kan sawm e.

**PU VANLALHLANA** : Pu Speaker, ka lawm e. MNF Party hian election manifesto an nei a, chutah chuan Aizawl Municipal Corporation hi tih chang tlun, thuneihna pek belh zel a tum thu a tarlang a. Chuvang chuan, he ministry hian a hmain hemi pathum bak hi thuneihna a nei tih kan hria a ni. Manifesto hiala thuneihna pek belh an tarlan avang hian zaghna kha a lo kal a ni. Tin, ka zagh belh duh chu –

Lunglei-ah hian Municipal Council hi din tum a ni em? Tin, Local Council leh Village Council dan te hi en nawna, an thuneihna te hi pek belh tumna a awm em tih ka zawt belh e.

**SPEAKER** : Zawhbelhna zawt turin Pu L. Thangmawia, chumi zaghah Dr. Vanlalthlana.

**PU L. THANGMAWIA** : Pu Speaker, ka zagh belh duh chu, Mizoram-ah hian Notified Town han puan belh tumna emaw, khati lam zawnga hma lakna a awm em tih a ni e.

**DR. VANLALTHLANA** : Pu Speaker, ka lawm e. Ka han ti zung zung ang e.

SIPMIU enkawl dumping ground, Tuirial-a mi khu ka zuk tlawh tawh a, ka ngaihven viau nghe nghe a. Tawih theilo dahna tunah khuan a khat deuh vek tawh a, motor kalna khu a awm a ni mai a, han tih kian ngaihna khu an hrelo a, a khawihtute khuan. Tin, tawih thei an dahnaah khuan tunah a nihna angin a hman theihlo a, vermi compost tihna tur hmu tunah khuan a ruak hei huai a. Motor a han tlan a a tawih thei ho zinga an va kalin motor a uih chhuak leh vek a, a silna tur tui phuhna tur a plan-ah a awm vek chungin silna tur a awm lova tunah khuan. Tuirialah zuk chhukthlain an zuk sil thin a. Tunhnaiah pawh social media-ah, “kan tui tlan turah motor an sil leh si a” ti tein a lo sawisel tawk te an awm a. He thil hi eng tiangin nge sorkarin hma lak a tum tih kha ka zaghna a ni a.

Chumi dawt lehah chuan, plastic te, lehkhate in lampang atangin min dah hran tir a, bawmah a hrang te tein min dah tir a, khutah an paikhawm leh vek a. Hei hi kan la ti zel dawn em, in lampang atangin kan la dah hrang zel dawn em tih ka zawt tel duh a.

Tin, ka kal tumin, ‘JCB a hman theihloh, a chhia’ an ti a, bill-ah erawh kha chuan JCB hmanna bill awm niin ka hria a. Nikumah ka thawh tawh a, boruak han siam hluai ka duh loh avangin UD & PA Secretary kha ka phone mai a. (**SPEAKER:** *Zawhnaah lut rawh, hun a tawp dawn e*) JCB chhia te kha a awm laiin an bill bawk si a, tunah erawh chuan a tha leh tawh a. Hetiangte hi engtin nge ennawn theih anih ang?

A tawp ber nan, thing nawi paih dan hi engtia en fel tur nge ni ang? Furniture workshop te an buai viau mai tih kha a ni.

**SPEAKER** : A theih anga chhang turin Deputy Chief Minister zahawm tak Pu Tawnlulia ka sawm e. Ngawi rawh aw, Zawhna leh Chhanna hun a tawp a. Kan chhan zawhtir law law dawn em? Aw le, chhang rawh le.

**PU TAWNLUIA, DEPUTY CHIEF MINISTER:** Pu Speaker, AMC thuneihna pek belchhah theih hi kan chak khawp mai a, kan manifesto-ah pawh khan kan ti a, UD & PA lam atang pawhin hma kan lo la tan a. Chutah chuan, tuna an kenkawh tawh item 15 bakah Mizoram Municipal Act, 2017, Section 97 leh 98 hnuaia kenkawh tur hian Aizawl Urban Street Design Regulation Draft, 2021 hi department-in tunah hian kan zo tawh a, a tul angin cabinet-ah pe chhoiin, cabinet-in a approve chuan AMC-in thawk se la tiin kan dah nghe nghe a. Sorkarin min approve sak chuan thil tangkai tak tur a ni a. Kan kawthlera kawngpui zauh leh tet dan azira ramri siama pedestrian (kea kal) hote, dawr te siam te leh mipuiin kan chhawr theih dan tur mumal zawkin classification siam ni se tih a ni a.

Luangmuial rama Industrial Growth Centre-ah khuan AMC-in ram zau tak mai SMC (Solid Waste Management Centre) atan a lei a. Chumi chu tan bungin, Music City, thalaite intihhlimna tur siam tum a ni a. Hetah hian Smart City atangin Crore 12 dah a ni a. Hei hi siam puitlin anih chuan AMC hian a enkawl ang a, tax revenue te pawh he lai atang hian engemaw chen a la lut thei ang tiin a rukin kan lo inruahman lawk ve a ni.

Kan chhannaah khan leihlawn lian leh kalkawng te, tui in tur industry-ah te, sumdawnna lamah te hman tur tih te leh fire service tih ang te kha an hnenah pek a la remchang lo va. A thawktu tur leh a kengkawhtu tur officer mi thiam pawh kan la inpe thei lo va. Chuvangin, AMC-a thawktute pawh tiphusui chho zel turin kan inruahman a. Tunah hian sorkarin post 98 a create a, kum 2019 khan tuna a thawk lai mi 50 zet chu a regularize tawh a, post lian zawk, hna lian zawk, technician te leh mi thiamte pawh dah belh leh a la ngai ang a. A tul anga pek chhoh zel kan tum a ni tih kha thuneihna pek belh lam chungchangah chuan kan hma lak chin chu a ni.

Lunglei khawpuiah Municipal Council siam tum a ni em tih chu, department-in proposal a siam vek tawh a, Cabinet Memorandum pawh a buatsaih vek tawh a, a principle phei chuan tlang ngei tura ngaih niin, Ward then dan tur zawng zawngte pawh buatsaih vek tawh a ni a. Nikum lama Covid avang khan hma kan la hleithei lo va, kan ruahmanna ang pawhin kum thar 2021-2022 Budget chhungah hian tih puitlin theih turin ruahman ni se tih a ni hrim hrim a. Hmachhawpah kan nei a ni.

VC hi chu LAD lamin a enkawl a ni a. Local Council thuneihna ennawn tum a ni em tih hi, a tul ang zelin kan zir chiang chho dawn a ni. Tunah hian mipuite zarah AMC sorkar thar a awm a, hei hian hma a la tan a. Theihtawp chhuahin, a phuisui zawk dan turin AMC sorkar thar hian kawng tinrengin hma a la chho dawn a, chawlh kar khat emaw chauh an la thu a, thil an la ti hman lo a ni.

SIPMIU-in Tuirial kawnga Dumping Ground a enkawl chungchang te sawi a ni a. Tunah hian Dumping Ground khu kalsan a ni tawh a. Solid Waste Management Centre khu siam puitlin tawh niin, hman mek a ni a. Chuvangin, Central law hian khu Dumping Ground khu hman a phal tawhloh angin kan hmang tawh lova, a enkawl thianghlim lam pawh khu a tul angin tih chhoh zel tur a ni.

Solid Waste Management-ah chuan tawih thei thil te, tawih thei lo te, plastic te pawh hi thliar hran zel tur a ni. Dan ang thlapin kenkawh kan tum a. Mipuite pawh kan zirtir zel ang a. Thil tha nge nge chu mipuite pawhin an ngai thiam sawt em em a ni. Hnawhsaruma intihluihna lam ni lovin zawi zawiin kan kengkawh chho dawn a. Solid Waste Management Centre khu a hma kha chuan SIPMIU-in a kengkawh a, tunah chuan AMC sorkar thar hian ama kutah a kengkawh tan tawh a ni. Amaherawhchu, a technical handling lam te pawh training te a ngai ve a, SIPMIU nena intawmin an kengkawh mek a. Chuvangin, bawlhhlawh thliar hran hi chu dan ang thlapa tih kan tum a, mipui pawhin kan zawm tha sawt khawp a, kan lawm khawp mai. Chuvangin, MLA zahawm tak tak te phei chuan mahni vengah leh mahni theihnaah chuan dan zawm hi kan tih tur, mi changkang leh fing var zawk te thil tih dan a ni e tih hi kan inzirtir zel a thain ka hria a ni. Kha khan zawhna kha a khaikhawm maiin ka ring a ni.

Notified Town chungchang kha zawhna a awm bawk a. Tunah hian Notified Town 23 kan nei a. Kawrthah, West Phaileng leh Ngopa te hi Cabinet-in nikum December thla khan Notified Town-a dah chho turin thu a chhuah tawh a ni tih khan information atan ka han sawi duh a. Tunah hian census-in heng hi a hril ve deuh a ngaih thin avangin census operation titute hnenah pawh hriattir an ni a. Tin, bial zawng zawng hi kan en a. Bial hnih hi Notified Town nei lo an awm a, a bikin, East Tuipui te leh Chalfilh lamah te hian hmalak dan tur pawh department-in a en chho mek a. Vanneihtlak takin census operation-in January Ni 1 hnuah chuan a tih theih tawh loh a tih kha March Ni 31 thleng hian hun an la rawn hawng hlauh a. Chung bialah chuan kan bialtu ten proposal an rawn siam ang khan kan bawhzui a. Hun tawp hmain, census-ah pawh report theih turin cabinet approval pawh kan beisei a ni. Chuatiang chuan, Pu Speaker, Notified Town pawh siam belh zel kan tum a ni e. Ka lawm e.

**SPEAKER :** Tunah chuan Financial Business-ah kan kal tawh ang a. Vawiinah kan Minister zahawm tak tak pahnih, Pu K. Lalrinliana leh Pu C. Lalrinsanga te Demand kan sawiho dawn a, vawiin hian pass kan tum nghal dawn a ni. Tunah kan Minister zahawm tak Pu K. Lalrinliana kan sawm ang a, a Demand-te:

Demand No. 17 - Food, Civil Supply and Consumers Affairs,  
 Demand No. 19 - Local Administration,  
 Demand No. 35 - Fisheries te House-ah rawn submit turin ka sawm e.

**PU K. LALRINLIANA, MINISTER:** Pu Speaker, ka lawm e.

Mr. Speaker Sir, on the recommendations of Governor of Mizoram and with your permission, Sir, I move the Demand No. 17, 19 and 35 for ₹3,87,33,44,000/- (rupees three hundred and eighty-seven crores thirty-three lakhs fifty-four thousand) only for meeting expenses during 2021 – 2022 in respect of the following Departments –

<b>Demand No.</b>	<b>Purpose</b>	<b>Amount (in ₹)</b>
17	Food, Civil Supply and Consumer Affairs	2,77,00,50,000.00
19	Local Administration	1,00,44,79,000.00
35	Fisheries	9,88,25,000.00
<b>TOTAL</b>		<b>3,87,33,44,000.00</b>

Thank You, Sir.

**SPEAKER** : Tunah Minister zahawm tak Pu C. Lalrinsanga a demand te :  
 Demand No. 31 - Agriculture,  
 Demand No. 37 - Cooperation,  
 Demand No. 47 - Irrigation & Water Resources House-ah rawn submit turin ka sawm e.

**PU C. LALRINSANGA, MINISTER:** Mr. Speaker Sir, on the recommendation of Governor of Mizoram and with your permission, Sir, I move the Demand No. 31, 37 and 47 for ₹2,57,63,94,000/- (Rupees Two hundred fifty-seven crores sixty-three lakhs ninety-four thousand) only for meeting expenses during 2021 – 2022 in respect of the following Departments:

<b>Demand No.</b>	<b>Purpose</b>	<b>Amount (in ₹)</b>
31	Agriculture	1,84,22,75,000.00
37	Cooperation	14,94,60,000.00
47	Irrigation & Water Resources	58,46,59,000.00
<b>TOTAL</b>		<b>2,57,63,94,000.00</b>

Thank You, Sir.

**SPEAKER** : Kan Minister zahawm tak pahnihte'n House-ah an Demand sawiho turin an rawn thehlut a. Tunah chuan kan sawiho ang a. Minute engzat nge kan in pek leh ang le? Minute sawm ti leh ang aw. Tunge han sawi hmasa ber leh ang le? Aw le, Member zahawm tak Pu Lalrinsanga Ralte i lo sawm ang.

**PU LALRINSANGA RALTE:** Pu Speaker, ka lawm e. Vawiina kan Minister pahnihte Demand kan sawi tur hi a phurawm hle in ka hria a. Thingtlang kuthnathawkktute leh mirethei zawkte innghahna department pahnih a ni a. Hmasawnna hmel thar tam tak heng department pahnih-ah te hian kan hmu a. Vawiin chu sawi teuh chakawm viau mahse hun kan nei tlem si a, ni danga kan tih dan ang deuhin department kan ngaih pawimawh leh tul kan tih zual deuh te ka han sawi leh pawr pawr ang e.

Pu Speaker, Demand No. 17 – Food, Civil Supplies & Consumer Affairs Department hi sawi hmasak ber ka duh a.

He Department hi a lawmawm hlein ka hria a, a changtu Minister a viak a tha a, tin, a inpekna a sang hlein ka hria a. Nikum, kan hriat theuh angin Covid- 19 avangin rampum kan buai a, harsatna namen lo kan tawk anih kha. Aizawl khawpuiah pawh ei leh in a harsa kan ti a, chetlak a buaithlak kan ti a. Thingtlang ah phei chuan kan buai khawp mai a, kar hniih, kar thum anih kha chuan ei leh barah kan harsa a, kan tlachham ti tih nghal mai a ni. Khanglai khan Supply Department te theih tawp chhuahin kan Chief Minister hmalakna leh remruatnain Supply Minister nen theihtawp chhuahin hma an la a. Thil ropui tak tak kan tawng chho a a lawmawm hlein ka hria a.

AAY, mirethei leh harsa zawk kan tihte tan thla 9 chhung vel buhfai, dal leh channa a thlawnin an sem a, a lawmawm hlein ka hria a. Tin, PHS tan thla 9 chhung a thlawnin buhfai an sem a, chu mai ni lovin ‘Card Var’ kan tih pangaiah pawh mi harsa leh rethei zual, khawtlang hruitute leh VC-te hriatpuinain a thlawnna pek tam tak an awm a ni. Heihi a lawmawm hle in ka hria a. A bik takin ka bial chhungah Covid-19 leh ramri buai avangin harsatna namenlo kan tawk a. He Supply Department-a kan Minister chak tak remruatna leh a hmalakna te leh kan Chief Minister nena theihtawp an chhuah tlanna hi a chhawr ber bial kan nih ka ring a. Rethei tak tak ten a thlawnin buhfai, channa leh dal kan han dawng thei kha kan lawm hle a ni tih ka sawi hmasa ber duh a. Tin, nikum chhung zawng khan, sawi tawh angin natna hripuiin min tibbuai lai pawhin gas a ni emaw, buhfai a ni emaw, oil emaw lamah harsatna em em tawk loa kan han khawsa thei kha a lawmawm ka ti a. Minister-te inpekna leh an thawhrimna Pathian-in mal a sawm niin ka hria a, ka lawm takzet a ni.

Tin, Pu Speaker, Supply Department a han sawi ka duh chu kudam tam tak sak that a ni te hi a lawmawm ka ti em em a. Chutih rual erawh chuan kudam tam tak, chhe tak tak leh sak that ngai tam tak a la awm a, hengte hi kan Minister hian remruatna te neiin engtin nge hmalak anih dawn tih kan hre chak deuh a. Tin, Vairengte-ah khuan Supply kudam sak that ngai pahnih kan nei a, hengte hi sak that a ngai tawh hle a ni tih kan sawi duh bawk a.

Tin, Pu Speaker, Saipum-ah khuan Supply Department-in kudam tha zet mai, a hmun hma pawh zau tha tak mai a nei a. Sorkar hmasa khan Saipum-a kudam hi an lo ti tawp a, khu khu engtia kalpui zel nge department hian a tum? Khulaiah khuan Supply Department hian building hmunhma leh building tha tak khu chhuahsan an tum hlen anih

chuan, khu hmun khu a land lease khawtlangah pechhuakin, khawtlangin tangkai zawk leh department dangte pawhluh theihin a land lease hi pekchhuah theih a ni em tih kha react-naah min chhang thei se ka lawm ngawt ang.

Tin, Demand No. 19, LAD hi han sawi leh ka duh a. LAD hmalakna a ropui hle a, hmasawnna tam tak kan hmu a. Khawtlang develop-na tur leh khawtlang cheina tur direct-in VC-ah a kal chho a, hei hi a thain ka hria a. Hmasawnna tur sum kan neih ang ang te anihna tur ang taka an han hmang chho thei hi a lawmawm hlein ka hria a ni. Chutihrual erawh chuan LAD changtu Minister-in min hriatsak se ka duh chu, VC House neilo khua engemaw zat an la la awm a, sak that ngai tam tak a awm tawh bawk a. Ka bial chhung ngeiah pawh khuan Saihapui-V, ramri dep a awm, nichina Health Department zawhnna ka rawn sawi tel thoah khan VC House an lo la nei miah lo mai a, khungte khu ruahmanna min siam sak thei ang em? Tin, Saipum leh North Hlimen-ah VC House an lo la neilo hrim hrim mai a, hengte hi min tihsak theih chuan a lawmawm ngawtin ka ring a.

Tin, Bilkhawthlir Joint YMA park cheina turin LAD-in ruahmanna min siamsak a, a lawmawm hlein ka hria a. Kan Chief Minister zahawm tak leh Finance changtu ni bawkin verbal approval min pe tawh a kan lawm takzet a. Hetiang anga ruahmanna min siam sak hi LAD te chungah lawmthu kan sawi a ni.

Demand No. 35, Fisheries Department hi sawi tel ka duh a. Kan hriat angin Serlui bial khu Fisheries-ah ani emaw, Agriculture ani emaw, potential area kan ni a. Sangha dil te kan ngah em em a, kan Minister zahawm tak pawhin min rawn duhsak thin avang hian kan lawm hle a ni. Ka sawi duh tak chu, Tuirial leh Serlui-ah hian Pisciculture hi siam belh thain ka hria a. North Hlimen leh a chhehvel khua te chuan eizawnna atan an hman theih turin Pisciculture hi siam ni leh se tih hi a tul hlea ka hriat avangin ka rawn sawi leh a ni.

Demand No. 47, Irrigation & Water Resources ah hian kan lut ang a. He department hi lian lo tak anga lang si pawimawh tak mai a ni a, thingtlang kuthnathawk tute leh huan lo ram nei tha tan he department tello hi chuan tlhai a thar hleithei lo a ni. Sorkar hmasa atanga irrigation channel hluihlawn tawh maintain lohva hun rei tak awm tawh project 97 lai mai tunah hian special assistance sum 274 lakh hmangin thawh tan leh a ni hi lawmawm ka ti hle a, hei hi kuthnathawk tute tan malsawmna tak tak a ni. Phur takin huan te leh leilet te an han nei a, mahse tui thatloh avangin kan tlhai thar te a hlawk thei thin lo a ni. Kan tlhai te hlawk zawka kan thar theihna tura Irrigation Department hmalakna hi lawmawm ka ti hle a ni.

Pu Speaker, Demand No. 31, Agriculture Department hi ka han sawi leh ang a. Ka sawi tawh ang khan Serlui bial hi Agriculture-ah Mizoram-ah hian potential area tha ber pahnih zinga pakhat anih hial ka ring a, hmalakna pawh a tam hle a. chuvang chuan kan Minister chungah pawh lawmthu ka sawi ani. Thingtlang kuthnathawktu te tan he department hi a luangchhuak nasa khawp mai a. Abik takin nikum chhung khan theihtawp

chhuahin hma an la a, kuthnathawktu ten tun kum lokal turah hian an thlai thar te leh an leilei hmunhma te a buai lohna turin department hian ruahmanna nasa tak a neihpui a, a lawmawm takzeten ka hria. Ka bial chhungah ramri buai avang te, covid-19 avang tein leilet nei ho hian vai an enkawl tir thin te an tlan haw deuh vek mai a, kan leilet te a rova, kan buai phah khawp mai a. Lei let turin bawng kan lo nei bawk silova, leilet hi a neitute enkawl loh hi a tam zawk a ni a, chungah te chuan kan Minister ten ruahmanna min siamsakin leilet enkawltu neilova awm tawh kha a thlawnin lei min rawn leh sak vek avangin lawmthu ka sawi a ni. Vawiin niah chuan kan thlai tharte a pangngai chho ta a ni.

Tin, kan Minister ruahmanna hi ropui deuh awma ka hriat chu, vaiho leilet lo enkawltu te *force* tako chhuah tir lovin ruahmanna thar an siam takah chuan leilet neitute hnenah power tiller te, tractor te Custom Hiring Centre-ah te a pe a, chungte avang chuan ka bial chhunga mi tam takte khuan an vaite an ko let tawh loh avangin, anmahni ngeiin an huan/loram an enkawl ta hi a lawmawm ka ti hle a ni. Hetianga ngaiantuahna siam thiam Minister kan nei hi lawmawm ka ti hle a ni. Tractor eng emaw zat he department hian a sem a, power tiller te subsidy-in a semchuak bawk a, link road min laih sak bawk a, kan thlai tharte man man zawka kan hralth theihna tur te, huan kal nikhuua kea kal ngat ngat ngai lova motor luh theihna tura ruahmanna min siam sak te hi a lawmawm hlein ka hria a ni.

Pu Speaker, Agriculture Department hmalakna hi ropui tak tak a tam khawp mai a, kan buh leh thlaite tun aia a lo pun theihna turin ruahmanna tam tak an siam a. NABARD Fund atangin hectare 484 lai leilet laih belhna tur fund an hmu te hi lawmawm ka ti hle a ni. Kan Minister-in thahnem ngai tako ruahmanna siama, kuthnathawktu te buh leh thlai thar a pun theihna tur te, Mizoram chhunga kan buh thar te sorkar-in a lei ngeina tura ruahmanna siamin tan a la nasa hi ropui ka ti takzet a ni. Mizoram hmun 8 lai atan NABARD atanga siam turin ruahmanna an siam a, ware house sak tum niin ka hria a. Hei hi a lawmawm hle a ka hriat laiin kan Minister hnena dil ve ka duh chu, an ruahmanna siam, an kal chin chu ka hre miahlo naa, Serlui bialah hian ware house hi chu min dah sak ve se, hei hi a district ang pawhin kan mamawh takzet a ni tih kha min hriat sak se ka lawm ngawt ang.

Tin, tunah hian kuthnathawktu ten kan hahpui ang leh thahnem kan ngaih ang hua kan thlai tharte a hlawk theihlohna hi chu, kan leilet zau hrang hrang kalna kawngte hi *All weathers road* anih loh vang niin ka hria a. Chuvang chuan a fur a thal a motor a luh theih phawt chuan tun ai hian a letin kan thar tam ang a, a hralthna pawh a hlawk ngeiin ka ring a ni. Kan minister hian theihtawp han chhuah leh se, leilet hrang hrang panna kawngte All weathers road-in min siam sak leh sela a lawmawm hlein ka ring a ni. Pu Speaker, ka lawm e.

**SPEAKER** : Tunah Member zahawm tak Prof. F. Lalnunmawia sawm ila, chumi zawahh Pu L. Thangmawia.

**DR. F. LALNUNMAWIA :** Pu Speaker, ka lawm e. Kan Minister zahawm tak tak pahnih Pu K. Lalrinliana leh Pu C. Lalrinsanga te demand sawihona hun tha tak kan nei hi a lawmawm hlein ka hria.

A hmasain minister zahawm tak Pu K. Lalrinliana department chan 3 te hi sawi hmasak ka duh a. Demand No. 17 - Food, Civil Supplies & Consumer Affairs hi ka han sawi hmasa ang a.

Budget-a kan hmuh ang hian *Supply & Materials*-a sum dah a pung hret hi a lawmawm ka ti hle a. A bik takin mipui vantlang mamawh essential commodities, buhfai leh gas te leh POL te hnianghnarin kan awm chho leh dawn ta niin alang hi a lawmawm ka ti a. Kum kal taa hrileng harsa tak karah tlachham lova kan awm te kha a ropuiin ka hria a, kumtharah pawh kan hnianghnar zel hi ka beisei a ni. Tin, heng sum hmang hian kan ram buhfai thar ngei te lei tur han thar tam lehzual thei ila ava han lawmawm lehzual dawn em; chumi atan chuan kan Minister zahawm tak pawh a inhawng em em si a, tih kha ka sawi duh a ni.

Gas chungchangah home delivery tura hmalak a ni te hi a ropuiin ka hria a, buhfai te pawh hi home delivery tur hian kalpui thei ila a tha hlein ka ring. Buhfai bo thlau thin leh hlemhletna awm thin check nan hian system tha deuh te hi ngaiantuah a tul mang e tih kha ka sawi duh bawk a. Minister zahawm tak duhsakna-in kan bialah godown leh quarters te sak that mek zel a ni a, kan lawm hle a ni. Supply chungchangah hun lokal zel turah hian nasa takin hma kan sawn zel hi ka beisei tlat a ni.

Demand No. 19 - LAD hi hi khawpui pawn lam V/C nei khuate innghahna pawimawh tak a ni a. Khawchhung hmasawnna kawng hrang hrangte hi Finance Commission rawtna leh sum lokal te an mahni kaltlang hian pek a ni thin a. LAD hi khawchhung inkalpawhna step leh khawchhung cheina lamah hian nasa taka hmala thin a ni a. Nikum hmasa lampang khan Pu Speaker, engemaw khawchhung development thilte pawh kha han beisei viai viai kha kan nei a. Mahse sum harsatnain min nang zui a, kan hmu ta rih lo a ni a. Heng ang zawngte atan hian LAD-hian sum han nei belhin, sum pek belh han ni selangin, kan bialchhung hmun hrang hranga khawchhung hmasawnna han thawh leh ava han chakawm em tih kha kan tarlang duh a.

Tin, keini bial bikah chuan 'LAD Park' kan ti a, Hlimen-a Lalsavunga park-ah sawn LAD enkawl park nuam tak mai kan nei a. Thalai leh nunau, nu leh pa thleng pawhin an va hawiharhna hmun, an chawlhna hmun a ni a, nasa taka tih changtlun a ni hi kan lawm hle a ni. Tin, sawlai-ah sawn tui a awm thatloh avangin tuikhawlna tha emaw solar water pump-te hi han awm ve se chu a tha leh hlein ka ring a ni. Tin, hmun hrang hrang ka bial ah VC House sak that leh thawm that te kan nei a, hengah min duhsakna-ah kan lawm a, kan dawn zel turah pawh hianin VC House chei leh sak thatna tur tam zawk kan beisei a ni.

Tin, Demand No. 35 - Fisheries chungchang hi, hei ka bialah Fisheries kaltlanga hmasawnna tur eng emaw zah kan hmu a, PMMSY leh RKVY hnuai atangin tuikhuan thahnem tak kan lai a, kan lawm hle a ni tih kha ka han sawitheih ni se langin.

Tin, Minister zahawm tak Pu C. Lalrinsanga chanah hian ka han kai ang a. Agriculture Department - Demand No. 31 hi, hei kumin kal ta BE aiin kumthar BE-hi a tam hlek a, lawmawmin ka hria a. Kan hriat angin Agriculture Department hi restructure niin Crop Husbandry leh R & E te kha chhunfin a ni a, a lawmawmin ka hria a, nasa lehzuala hma an lak chhoh ka beisei a.

A bik takin buh chinna atan Land Development lamah nasa takin hma an la chhoh mek a, ka bial bikah pawh Minister-in thahnem min ngaihpui hle mai a, a hovin official-te nen ramhnuai pilril tak taka leilet hmun te min rawn hmuhpui a, kan lawm hle a; chu chuan rah tha a chhuah a. Tin, Custom Hiring Centre eng emaw zat min pe bawk a, kan bial buh thar pawh a pung a ni. Kum kal taa phur 100 thar thin ten phur 150-te an thar a, phur 200 chuang thar pawh an awm a ni Pu Speaker. Hengah hian kan Minister leh department-ten hma min lakpuinaah hian he House kaltlang hian lawmthu kan sawi duh a ni. Tin, Agriculture link road-te pawh min laihsak nual bawk a, a bikin Sialsuk Agriculture Circle hnuiah sawn potential area kan nei tha a, Aizawl district-ah chuan potential area neih thatna ber pawl kan ni a, Tuorial kamah te alo awm bawk a. Tin, vaimim leh antam hriak nei chin tir an ni bawk a, chungah te pawh chuan hma min laksak a, kan lawm a.

Tin, chutih rual chuan Phulpui-ah sawn Red Oil Palm an ching a, a phurhna kawng a harsa hle mai a, han lakchhuah leh kal manah khan kan inhmang zo deuh mai a, hengah hian transport subsidy-te hi min ngaihtuah sak se chu a va han tha lehzual dawn em tih ka han sawi duh a. Tin, Kurtai thar nasa bial kan ni a, Lungleng kurtai te, Phulpui kurtai, Sumsuih te, kurtai tui tak tak a ni. Hengah hian kurtai sawngbawl dan tha zawk leh tuihnai, mawihni zawk te pawh hi min han kawhhmuhin min han tihpui thei se kan duh hle a ni tih kha ka tarlang duh bawk a ni. Agriculture department hmalakna ah hian kan lawm a. Kum lo awm leh turah pawh hian land development lamah te leh thlai leh buh chinna lamah, Alu thlengin; Alu chinna hmun tha te pawh kan nei a. Chungah chuan nasa zawka hma min lak sak kha ka han beisei a ni.

Demand No.47 - Irrigation & Water Resources-ah hian ka han kai leh ang a. Helaiah pawh hianin kum kal ta BE aiin kumthar BE hi crore 18 zetin a tam a, ka lawm hle mai. Tin, major works-ah hianin crore 45 lai dah a ni a, Pu Speaker, ka zo tep a. Tichuan, Irrigation channel, tuikawng siam leh water reservoir-te min siam sak a, khaw hrang hrangah kan lawm hle mai a. Heng hian nasa takin kut hnathawktute thlai tharchhuah a tipung a ni tih kha ka sawi duh a. Irrigation department hmalaknaah kan lawm a, ka bialin kan chhawr hle a ni tih kha ka sawi duh a ni.

Tin, a tawp berna atan, Co-operation Department - Demand 37-ah hian tawite sawi duh ka neih chu, cooperative society eng emaw zat kan nei a, hengte hi tangkai lehzuala hman an tul hlein ka hria a. Kan flagship programme SEDP tih hlawhtlinna kawngah pawh heng society-te hmang tangkai leh kaltlang hianin kan sorkar-in nasa takin hma a lak ka ring a. Chutih rual chuan, Cooperative Society hi kan la hmang tangkai thiam tawk lo a, nasa lehzuala tan kan lak a tulin ka hria.

Awle, chung chu Pu Speaker, ka sawi theih ni se, heng kan Minister zahawm tak tak pahnih-te demand hi vawiinah hian pass a phurawm hlein ka hria a, chuvangin, phur takin, ‘pass pui ang u’ tiin kan thlawp a ni e. Ka lawm e.

**SPEAKER** : Member zahawm tak Pu L. Thangmawia, ka sawm e.

**PU L. THANGMAWIA** : Pu Speaker, ka lawm e. Vawiinah demand pass chakawm tak tak mai Minister pahnih chan kan han sawiho leh a ni a. Hun te a tam lova, kan han sawi leh hmawk hmawk ang a, Pu Speaker, i remtihna in.

A hmasa berah chuan Demand No.17 - Food, Civil Supplies & Consumer Affairs-ah hian sawitur tam tak a awm a. Covid vanglaiin kawng te min han khar hnan thin bawk nen, a changtu Minister leh department lama kan hotute an mangang ve viau thinin ka ring a. A changin Manipur lamah te, ka bial kaltlang te khanin petrol leh thildang te kan han phur chho a. Tun hi, Pu Speaker, remchangah i remtihna kan la mai ang a. Khangah khan kan driver han kal te kha an lo dawngsawng tha em em mai a, Manipur lama kan unaue te khan. Chuvangin, harsat mangan kan tawh laia kan chakkhai lam lo duattu zawng zawng Manipur lama kan unaute hnenah pawh lawmthu he House zahawm tak kaltlang hian kan sawi ve ni sela.

Tin, gas supply home delivery-a tih hi ka huphurhpui khawp mai a, ti thei tak tak dawn maw ka ti a. A chhan chu vairam leh Mizoram hi a inang tlat lova. Kawngpui thlang In 5-na vel ang pheiah hi chuan gas han put dawn hian tih fe a ngai thin a; mi In kan han luahlai te khan a gas la pawlah te kan han tang a. Mahse, tunah hlawhtling takin an ti chho niin ka hria a. Tin, heliaih hian kan sorkar zia hi langin ka hria a, engatinge maw ni le, Aizawl West-II bial kan MLA-na te hi an thlan loh le kan ti a, a la awm em aw, Aizawl South-I bialtu zahawm tak kha? A bial chhung, opposition bial College Veng an han thlang a. mahse an phu khawpin ka hria a, College Veng hi. Veng tangrual an ni a, kan lo hriat mai maiah, fai lawmman te pawh hi vawi 13 an la tawh a ni. Tin, college kan kal laia hostel kum 6 chuang kan lo awmna veng a ni a, veng tangrual tak mai an ni a, chuvang te pawh chuan an phu hrim hrim bawk a, a veng khan ka lawmpui viau a ni.

Hei, zawhna te pawh ka lo zu zowt a, kan phone thin a, ‘engnge, inti tak tak thei em’ ka han ti a, hlawhtling taka an tih thute kan han hri a a, ni 10 chhungin an order te an rawn dah zat zat thu te min hrilh a. Hemi han enchhinna hlawhtlinna-ah hian ka lawmpui viau a

ni, kan Minister leh a department pawh. Hetiang anih chuan gas chang tur inngifik awm bawk silo, thenawmte kan han tahawh a, khatiang chi kha thla 1-ah vawi 1 emaw kan tawn thin a ni a. Office kalte alo ngai si a, nupaa kal tan phei chuan buaithlak deuh mai a ni a. Chuvangin, home delivery system kha hlawhtling taka an enchhinna-ah khan ka lawmpui a. Tin, sorkar hmalakna tha taka lo thlawptu College Veng mipuite chungah pawh lawmthu ka sawi bawk a ni.

Tin, hei mamawh tam tak a awm a, kan sawilo thei lova, Pu Speaker. Ka bialchhung kudam-te pawh hi sak that ngai a awm a. Nikumah Hliappui kudam-te phei chu a chung rialin a deng chhe vak mai a, engtin tin emaw department lam khan an thawm tha nawk nawk kha a ni a. Buhfai te pawh kha a chhe nualin ka ring a, nikum khan. Tichuan, hei khawnvartui lampangah hian, an va dahna turah hian Ngopa hi an la telohloh avang hian Kawkulh lam atang tea kan lak a ngai thin a. Mipuiin khami lak man kha kan thawhkhawm a ngai thin a ni. Hei hi kan Minister zahawm tak pawhin min hriatpui tawhin ka hria a. Hei hi, Ngopa ah chuan petrol pump te pawh a awm ve a..... (**SPEAKER:** Chair kan lo inthlak lawk ang e aw)

(Dy. Speaker-in Chair a la)

Pu Dy. Speaker, in inthlak chhung kha minute 3-vel aniih ka hria. Chuvangin, hengte hi mipuiin thawhkhawm ngailo hian, tanker te a kal thei vek tih a chiang tawh a tun dinhmunah chuan. Kan minister leh department lam hotute pawhin Ngopa-ah ngei min bunsak thei tawh se tih kha khawnvartui leh thildanga kha kan ngen duh a ni.

Tin, a dawt lehah Demand No.19 - LAD-ah han kal ila. Pu Dy. Speaker, 15<sup>th</sup> Finance Commission Grant hi khawi VC mai pawh hian an dawng vek mai a, hei aia rualkhai grant hi a awm dawn em ni ka ti a, a lawmawm khawpin ka hria a, VC House repair-na te leh thil tam tak min tihsak a. Tin, kan Minister zahawm tak phei chu, nikum lam khan VC tha ber lawmman Chiahpui-in an dawng hlauh mai a, a lawman-ah te min rawn kal sak a. A rawn kal a, a rawn hmuh tam tak tih hlawhtlin ngai te min rawn tih hlawhtlin sak bawk a, lawmthu ka sawi mawlh mawlh a ni.

Tin, ka bialah hian Ngopa te, Kawkulh te hian Recreation Centre kan mamawh ve em em a, LAD Park emaw Picnic Spot emaw ang te kha, a department tan pawh ram an ui lova, khawtlang hruijute pawh ka be tawh a. A enkawlna lamah kha chuan PPP Mode anih pawhin khawtlang an inhawng em em a ni. Tunlaiah thalaite an lo chep chho tawh a, kawngpui kama lo that ringawt kha a ni tawh lova. Chuvangin, eng emaw changa pawl leh midang te pawh an han picnic ve theihna tur te ni pah fawmin hei hi chu kan Minister zahawm tak pawhin a hre tawh niin ka hria a, Pu Dy. Speaker. Kumin chu covid pawh a reh chho turah ngai bawk ila, hei hi chu kumthar lama hawn theih turin hma min laksak se tih kha ka ngen duh a.

Tin, Demand No. 35 - Fisheries hi eizawnna rei tawh tak a ni a. Kan Bible-ah te pawh kan hmu thin a, Lal Isua'n a zirtirte a koh pawh kha, an sangha man lai te a ko anih kha. Department pawimawh tak a ni a, ka bial chhungah pawh hian chhungkaw sawmhnhih vel chu Fisheries Department-in tanpuina pein an tharchhuah te pawh min thar tem a, Fisheries Department zarah hian ka lo ei ve nawk nawk a, a lawmawm em em mai a. Amaherawhchu, a chi hi an duh khawp an hmu lo thinin ka hria a, min rawn phone leh thin a. Keini MLA-te kha a chi khawihtu kan ni silo a. Chuvang chuan a chi pawh hi a hun takah leh an mamawh ang zat pe thei turin ka bialah mai ni lovin Zoram hmun hrang hrangah pe thei turin department pawh hian tan la se a thain ka hria a. Fisheries hi kan tuipui a ni ang, khawtinah hian sangha dil ka nei tiin a chi duh hi an lo awm zel a. Ka bial Saitual atang te pawhin nikum lamah pawh khan min rawn phone a, sangha ti duh kha chu a chi pek theihdan tur a awm em tih kha ka sawi duh a.

Tin, Demand No. 31 - Agriculture lamah hian kal ila. Hei, Co-operation leh Irrigation & Water Resources te pawh hi a inunau hlawm viauin ka hria a, keima rilru lamah chuan. Agriculture lamah tha taka thar chhuak tur chuan tui lak te a ngai a. Ka bial chhung Pawlrang-ah te pawh kuminah hna min thawh sak mek a, a lawmawm khawp mai a, tui an lakluh theih chuan buh leh thlai an thar pawhin awmzia a nei thei dawn a.

Tin, Agriculture hmasawnna tura ka ngaih pakhat hi chu Agriculture pawn lama ngaih theih, amaherawhchu, Co-operation hnaih lam a ni a. Hmanni pawh khan Pu Dy. Speaker, he House zahawm takah pawh hian ka sawi tawh a. A chin lama hi chu, "ching rawh u" kan tih chuan an ching phur em em a ni, hun kal tawh ah pawh kan hria a. Amaherawhchu, tharchhuah a lo awm khan a buaipuiawm ta a. Chuta tan chuan Co-operation, Cooperative Movement kan tih chak kha a pawimawhin ka hria a.

Hei, tunlaiah Korean film te kan han en a, Indian film te nen chuan a inang lo khawpin ka hria a. India-ah chuan in hre vek tho ang a, kan society an tilang a, a tha vek tho a, ka va sawisel lova. Korea-ah chuan sawrkar hnathawk awm ang pawh an awm vak lovin ka hria. Society ang chi te kha anmahni ah a lian em maw ni chu aw ka ti deuh a, ka en fuh ve ho-ah hian. Chutiang deuh chuan Cooperative Movement hi lian sela, an thar chhuah bakah motor te, a dahthatna cold storage te hial pawh sawrkar ni lovin anmahni society-in nei thei turin tan lak chhoh a ngaiin ka hria a.

A chin lam thu-ah chuan ching rawh u kan tih ni miah lovin ka bial chhungah pawh ground apple te, purun te, dawnfawh te an ching a ni. Dawnfawh phei chu a inpui loh theihloh a, nikum lam khan hlawhtling takin Pu Rokunga'n Ngopa ah a lo ching a, Member zahawm tak thenkhat te pawhin in lo hmuh ka ring a. Kuminah erawh chuan Pawlrang, Lamzawl leh Ngopa-ah chhungkaw 26 hi kan han chin tir a ni, khilai Tuiphal zawlah hian. An hahpui em em mai a, greenhouse ang chi, sarang-in hniam te te in an khuh a. Pathian zarah tluang taka an rawn ching chhuak anih chuan, dawnfawh hi chu hmun dang atanga lak luh ngailo khawpin Ngopa lam atangin kan rawn thar chhuak dawn a ni. In khat lekin an

chin pawh kha a tam khawp mai, In 26-in tunah hian an bei mek a. Keipawhin MLA Fund hmang in a chi man tur te, mithiam anmahni enkawl tura dawnfawh chin dan thiam deuh te pawh ka rawih sak nghe nghe a. Chu chu beiseina sang tak nen nikumah a hlawhtlin tawh avangin kan han ti a. Chuvangin Pu Dy. Speaker, rei lo te .... (**Dy. SPEAKER: I hun a tawp a**) Khawngaitakin i remtihnain, ka sawi zo trep e.

Chuvangin, a processing-te, tin, society anga kalpui thiamte khatianga semi-process tal emaw kan ngaantuah tel loh chuan; chumi ngai lo, a tha ber chu *buh* hi a ni. Buh hi land development-te tiin leilet kan neih theihna zawng zawng, ka bial chhung, ka hriat chian ringawtah pawh hian Tuisaphai, Tuidam, Tuivai, Tuila, Tuiphal, Tuithil te, khang zawng zawng ringawtah pawh khan ka bial kumkhat ei aia tam hi buh kan than thei a. Chu chu a processing a har lo a ni, a chhan chu hetia buhher-khawla her kha a ni mai a, a dang erawh chu process dawn i la *side effect* thil leh thil dang tam tak a awm a ni a. Chuvangin kan sorkar hmalak mekna pawh a niin ka hria a, buh-a intodelh hi. Kan Minister pawhin khilamah land development lam chi project-te pawh min siamsakin, keini siam ve te pawh hi min phalsakin ka hria a, hma nasa takin department nen kan la chho turah ka ngai a, buh-a kan intodelh thuai pawh ka beisei a ni tih kha ka sawi theih tawk ni se.

Vawiin-ah hian ram a han buai chiaha kawngte an han dan chiah khan kan mamawh ngawih ngawih mai department pahnih-te Demand anih avangin, Pu Dy. Speaker, ka thlawp em em a, pass pawh ka chak tawh hle a ni tih kha ka sawi theih a ni e. Ka lawm e.

**DEPUTY SPEAKER** : Tunge kan insawm leh ang le? Aw, Pu BD Chakma, Member zahawm tak i lo sawm ang.

**PU B.D. CHAKMA** : Pu Dy. Speaker, ka lawm e. Hei, department hrang hrangte zinga department buai ber pahnih RD leh Food, Civil Supplies & Consumer Affairs Department te a ni a, Demand No. 17 atangin ka tan ang a, Pu Dy. Speaker.

‘Supply chain’ chungchanga tlem sawi ka duh chu, bial dangah pawh hetiang hi a awmin ka hria a, a bik takin keima bial zawk hi, mipui hian an tuar nasa khawp mai a, hemi ‘supply chain’ avang hian; engtin nge hmalak dan tur zawn chhuah a ngai a ni. Supply godown-a buhfai a luh laiin buk kim takin dawn thin a ni a, mahse pekchhuah hian a buk tlinglo-in a chhuak thin a ni. Ka sawi duh chu, buhfai hi sazu nen an dah pawlh thin emaw ni ka ti a, Chawngte leh Borapansuri godown pahnihah te hian. Borapnsuri kudam hi Chawngte aiin a senior zawkin ka hria a. Kan naupan laiin an sawi fo thin a, Dumka pa pakhat Sikaram hi a awm a, senior tak, tunah chuan a pension tawh a. Buhfai a buk laiin buara bag buk tlinglo deuh kha chu a kea rapin a buk tlinglo thin a, a pension hnuah a ke a bai a, bed ridden-in a awm nghe nghe a ni, Pu Dy. Speaker. Borapansuri mipuite chuan, ‘he pa hi Pathian-in a hrem a ni ang’ an ti thin a ni. Chutiang chu a ni a, a buk tlinglo hi a retailer-te tih dikloh pawh a ni lo, hetah SK ten supply go-down atangin a buk tlinglo sain an khulh thin a, chu chu consumer-te hnenah pawh buk tlinglo lovian an pe lo thei lo a ni. Ka bial bika

ka hmuh danin, digital weighing machine emaw, khatiang ang bukna khawl kha an hmang ngai lova, consumer-te hnena buhfai pek nan plastic bur hmangin, bur 1 hi kg 10 hisap-in an pechhuak thin a ni a, a dik takah chuan kg 8, kg 7.5 vel a ni thin khang kha.

Khatiang kha kan dinhmun a ni a, khang dona tur khan engtin nge hma kan lak ang? Pu Dy. Speaker, an tih diklo te uluk taka han en theih nan buhfai, a lut lai emaw a sem chhuah lai emawa uluk taka a en anih theih nan CCTV hi go-down ah leh khami bukna hmunah dah ni theih se thain ka hria. Tin, ka bial chhung Kukurdollai-ah buhfai buk tlinglo avangin buaina a chhuak NASA a, Guwahati High Court, Aizawl Bench thlengin an kal a, chutah chuan Guwahati High Court, Aizawl Bench-in September Ni 30, 2020-ah thutlukna a siam a. Lawngtlai DCSO, a hmunah kala action la ngei turin judgment a pechhuak a. Mahse tun thlengin DCSO-ah action lak lohin a la awm char char a, nitin a khaw mite atang hian phone call ka dawng reng thin a ni. Chuvangin, Minister chak tak hian khawngaih takin hma min lak sak se ka duh khawp mai.

Tin, Parva-ah hian hmanah supply go-down a awm thin a, tunah a awm tawh lo va. Fur lai hian Parva mite hian an tuar NASA hle thin mai a. Damdep hi a nearest stocking point a ni a, mahse fur laiin eng motor mah a kal thei lo va, lawng pawh kal thei lovin cut-off zel a ni. Chuvangin, Parva-ah hian go-down awm thei lo mahse monsoon stock tal hi chu hetah hian dah theih ni se, YMA te, YCA te pawh a tul chuan an duty mai ang a, tiin ka rawn rawt a ni. Chuvangin, khawngaih takin temporary monsoon stock monsoon hma ngei hian Parva-ah min dah sak thei se, Minister chak tak hmalakna-in tih kha.

Tin, Demand No. 35 - Fisheries-ah ka lut leh ang a. Minister chak tak enkawlnaa zarah ka bialah Fisheries lamah hma kan sawn NASA hle a, tunah hian private fish farmers pawh an tam hle tawh a ni. A bik takin *common carp* sangha chi kha technical thil pawh a ngai lem lo a, *tilapia* leh *common carp* seed kha CADC area hrang hrangah hian min pe thei se. Kan han zawh duh leh chu, fish farmers/fish growers khatianga hlawhtling tak te kha Accreditation Certificate pek theih an ni em? Kar hmasa khan CADC hnuai-ah Accreditation Certificate an pe chhuak a, a lawmawm hle a, tunge nei tha, tunge hlawhtling, khango chawimawina kha. Hei hi State sorkar atanga heng Accreditation hi an neih si loh chuan CADC emaw, Autonomous Council emaw atanga an dawn hi a tawk mai em tih kha ka zawt a ni.

Tin, Demand No. 31 - Agriculture ah hian, nichina Member zahawm tak Pu L. Thangmawia sawi ang khan, Agriculture leh Irrigation & Water Resources epartment te hi chu unau ang chiah an ni a. A bik takin Agriculture lamah, ka area bik hi agriculture potential area tak tak a ni a, Pu Deputy Speaker. Theka leh TuiChawng bialah WRC land leh vegetable growing land tam tak kan nei a. Chuvangin, Minister chak takin mini-power tiller leh power tiller hi supply theih dan min ngaiantuah sak thei se, a dan chiah chu ka la hre lova, mipui ten subsidized rate-a lak theih dan min lo zawt thin a, hei hi Minister-in min lo hriatsak se la.

Tin, Irrigation lampah pawh, Tuichawng Lui leh Theka Lui te hi lui lian tak tak an ni a, helai vela vegetable growers te chuan manual-in tui an la thin a, a hahhlak em em a ni. Chuvangin, vegetable growers te hnenah diesel pumping emaw, electric pump emaw, khatiang kha sem theih ni se an hlawkpu viau ang tih ka ring a. Tihian Agriculture leh Irrigation chu vawikhatah ka sawi rual nghal a ni e.

Chu chu ka sawi theih ni mai se, vawiin chu hun pangngai takin ka hmang a ni e, Pu Deputy Speaker. Ka lawm e.

**DEPUTY SPEAKER :** I va hmang tawk chiah chiah ve, a lawmawm e. Tunge kan sawm leh ang le. Member zahawm tak Pu V.L. Zaithanzama ilo sawm ang.

**PU VL. ZAITHANZAMA :** Pu Dy. Speaker, ka lawm e. I ding lama thu te an sawi malh malh a, kan in balance lo deuh dawnin ka hria a ka han ding a ni. Vawiinah hian Minister zahawm tak tak Pu K. Lalrinliana leh Pu C. Lalrinsanga Demand kan sawi ho dawn a. Ka han en thuak hian kan Minister zahawm tak Pu K. Lalrinliana Department pathumte Demand hi an budget a tla hniam vek a, kha khan ka mit a la deuh hlek a. Tichuan kan Minister zahawm tak C. Lalrinsanga department chan Demand No. 37, Co-operation kha tun MNF Ministry pian tirh atang hian ala tla hniam char char a, budget tlahniam char char awm chhun a ni awm e, kha khan ka mit a lak deuh avangin kan ti ri hmasa a ni.

Pu Speaker, Demand No. 37-ah hian ka han lut ang a. Lengteng bialtu kan MLA zahawm tak Pu Thangmawia kha a rawn tui khawp mai a lawmawm ka ti a, ka mithlaah co-operative society te ka lo buaipui ve thin laia a hnung ka zui thin Pu Biakliana ka mithlaah alang a, ka lung a leng khawp mai a. A sawi ka la hriat reng chu, "Mizoram rorelna sang ber Assembly House-ah hian Co-operation hi sawitu pawh an awm ngailo a, dik manglo a chhe zawng pawh hian rawn sawi ve hrim hrim se ka va lawm dawn em" a ti thin a. Hei, kumin leh kum kal taah te pawh khan sawitu kan awm ve ta nak nak mai a, keipawh ka lawm hle a ni. Lengteng bial Kawlbem te pawh kha kan kal tawh a, a chhuak ta emaw ni, society buaipui hian ka lo vir ka lo vir ve thin a, chungte chu kan lo sawi hmasa a ni.

Co-operation hi department khawngaih thlak tak ang deuh te hian kan chhuah a, Pu Deputy Speaker. Covid-19 hripui len lai khan kan chhawr rim viau mai a, Co-operation department hnuiai society Mizofed te pawh kha kan hmang tangkai a, a hming te pawh kan sawi ri viau a, chuti chung chuan 2019 atang khan kum tin budget tlahniam ziah department awm chhun a ni a. 2019-2000 ah khan 3.17 % in a tlahniam a, 2021 ah 6.75 % in, tunah 6.22 % in a tlahniam leh a. Tin, SEDP te pawh hi a chang ve vak loin ka hria a, ka hresual anih loh chuan department khawngaihthlak tak a niin kan hre deuh a ni.

Tin, thil pakhat, Co-operation hnuiai hian Mizoram Co-operative Development Council hi din a ni a, Government Notification-in June Ni 18 June, 2020 khan din a ni a, amaherawh chu he Co-operative Development Council hi vawiin ni thlengin an la thu lo a.

Minister hoin, MLA engemaw zat pawh an tel a, Director te pawh member eng emaw zat an ni a, mithiam tak tak te an la khawm a. He department hi hmasawn tir kan tum chuan, han that khawma ruahhmannna te pawh an nei turah kan ngai a. Tin, tun Ministry mai pawh a ni lo a, Congress Ministry-ah khan Mizoram Co-operative Development Council hi dina vawi khat mah thu loin Ministry kha a tawp ta niin ka hria a. Kan thiante awm loh lai a ni a, khatiang em kha chu a nilo turah ngai ila, remchang hmasa ah hei hi din a nih tawh si chuan, thukhawma hma lak te ka rilruah a lang deuh a ni.

Tin, an budget hi a tlahniam mawlh mawlh mai a, hna hi an ngah ve khawp mai a. Mizoram-ah hian Co-operative Society primary sang chuang zet an awm a, State level 10 chuang zet nen, heng te hi audit vek an ngai a ni. Audit statement ringawtah pawh hian a sang chuang han audita audit statement siam kha chu hautak tak a ni. Chuvangin heti tak maia an tlahniam hi kum lo kal leh turah chuan pung ve tawh ngei se tiin ka rawn ngenpui a ni.

Tin, kan budget speech ah khan nikum leh kuminah vaibelchhe 10 subsidy awma loan an lak theihte tihpun zelna atan dah a ni. Hei hi society-te tan dah anih thu kha kan hmu a, amaherawhchu budget bu-ah hian nikum emaw, kuminah emaw estimate-ah vaibelchhe 10 hi Co-operation hnuaiah dah a ni lova, finance lamah a awm daih mai a, hei hi engatinge Co-operation hnuaiah dah anih ve mai loh tih te kha keimahah zawhna a lo awm a, chungte chu Pu Dy. Speaker, ka han ti ri ve a ni.

Pahnihnaah chuan Demand No. 19 - LAD-ah hian ka lut thuk vaklo ang a. LAD-ah hian kan budget hi a tlahniam a, 19.76% in. Mahse, a tlahniam han tih hian hriathiam loh ka nei a, LAD budget hi a up/down vak vak mai a 2019-2020 khan 47.72% in a tlahniam a, 2020-2021 khan 201.78% in a up vak mai a, tunah 19.76% in a tlahniam leh a. Hei hi engvang nge ka hrethiam chiah lova, nakinah kan Minister zahawm takin min hrilhfiah theih chuan. V/C inthlan vang te kha han ti dawn ila khami avanga za zela zahnih chuanga pung thuta kumina a hniam lehna hi a tlem ang reng viau si a, khatiang vel kha zawhna kan nei a ni. LAD-ah hi chuan kan ngaihthlak tawh ang kha V/C te rualkhai tak leh felfai takin an enkawla 15<sup>th</sup> Finance Commission atangin, rual leh fel taka sum hman tur ruahman anih avangin han sawibelh em em tur ka hre hran lova.

Demand No. 31, Agriculture-ah hian ka han lut leh zawk ang a. Kan budget hi Agriculture-ah hian 4.17% in a pung a, a lawmawm khawp mai a. Ka hmaa mite sawi kha ka pawm khawp mai a, Agriculture ka ngaihtuah lai hian Irrigation nen hian a inzawm a, a inzawm mai ni lovin ka rilru takah chuan Agriculture hi hmasawnna tur chuan *number one* ah chuan kawngpui a that a pawimawh a ni. Kawngpui a that loh chuan hma a lak theih lova, link road mai ni lovin, nichina kan ngaihthlak tak ang khan kawng tha number one a ni a, a dawtah chuan irrigation, tui a ni. Kawng leh Tui a awm chuan sorkar tanpui vak loh pawhin mi tak takin leilet leh terrace angah pawn thlai an than thei a ni. Amaherawhchu kuminah Agriculture budget hi a rawn pung a 4.17%-in; chutih lai chuan Irrigation kha a pung bawk

a nasa takin, kha khan min tilawm khawp mai a, thil tha tak niin ka hria. Amaherawhchu, Agriculture bik hi 2018-2019 a kan budget kha a la pha lova, engemaw lai khan a tlahniam a, a punna hi hei ai hian la sang chho zel sela tih kha ka rilrua a awmdan a ni. “Buh-a intodelh hi kan programme pui ber a ni” kan Chief Minister zahawm tak khan a ti a, chanchinbuahte kan lo hmu a, leileta siam theih zawng zawng hi siam ila Zoram mihring chawm zo zan buh kan than thei tihte kha kan ngaithla bawk a, a dik thawkhat pawhin a rinawm e.

Kum khatah Mizoram-in buh kan mamawh zat hi 2020-2021 census, mihring awmzat atanga chhutin metric ton 1,80,000 a ni a, tichuan 2019-2020 a buh kan than kha metric ton 60,239 a ni; hmun thuma thena hmunkhat vel chauh kan mamawh atangin kan la than tih alang a.

Tin, kan buh than zat hrim hrim pawh hi hma kan sawnlo riau maiin ka hria a, department lamah te ka zawk kualin 2015-2016 khan metric ton 62,089 kan than tawh a, tun 2019-2020-ah 60,239 a ni a, kan tlahniam zawk niin a lang a, singruk bawr velah hian kan then mai mai a ni. Chumi atanga hmasawn tur chuan leilet siambelh nasat kan ngai a, leilet siambelh tur chuan hma kan la chho turah ka ngai a, kan minister zahawm tak hian leileta siam tur hectare 74,644 zet kan neihe zingah hian kan siam tawh tlemte hectare 17,302 bakah, la siam loh zingah hian a zahve emaw tal chu tun ministry hian siam hman hram sela, chu chuan chaw-a intodelh kawngah nasa takin min pui ang tih ka ring a ni.

SEDP atangin Agriculture-in nikumah nuai 79.119 chauh a chang thei a, hei hi kan budget pumpui atanga chhutin naia 10 pawh a tlinglo. Chuvangin, kuminah engzat nge SEDP atangin Agriculture-in a chan dawn tih kha kan zawt a ni e. Pu Dy. Speaker, ka lawm e.

**DEPUTY SPEAKER :** Tunah chuan Pu Z.R. Thiamsanga ka sawm ang a, a niin a sawi zawk hian Pu Biakzaua alo inring dawn nia.

**DR. ZR. THIAMSANGA :** Pu Dy. Speaker, ka lawm e. Vawiinah hian kan Minister zahawm tak pahnih Pu K. Lalrinliana leh Pu C. Lalrinsanga te demand kan han sawihi hi a nuam khawpin ka hria a, a lawmawm hle a.

Pu Dy. Speaker, demand-a ka luh hmain i hnenah hian lawmthu sawi ka duh a, niminah MLA-te zingah Hnam inchei nallh ber kha thlan a ni a, i mit a dik hlein ka hria a, i mit hi a lo tha a ni, mit tha tak i neih zarah lawmmman ka dawng a. Lengteng bialtu MLA zahawm tak khan Ground Apple, Teikhang a mi ngei mai tam tawk tak min rawn hlan a, HPC lam atangin Artui tam tawk tak kan han dawng bawk a, anni chungah pawh khan lawmthu ka sawi a, chumi zarah chuan minute 5 te chu vawiin chu min pekbelh dawn em maw ni le ka ti deuh a; i veilama mite pawh hian an phal chu ka ring.

A hmasain Pu K. Lalrinliana Demand No.17 - Food, Civil Supplies & Consumer Affairs hi han sawi hmasa ta ila. Kan hriat ang leh kan sawinawn fo tawh angin covid avangin kan ramin hun khirh tak mai kan tawk a, ei leh barah te kan tam mai ang a, tih te pawh kha kan han hlauthawng a ni. Amaherawhchu, khatiang karah khan kan CM te, Supply Minister te leh department-te an tang hle mai a, thlathum ei lai mai an lo indah khawlte kha a ropui ka ti khawp mai a, kan Minister-te an fakawm hlein ka hria a. Silchar-ah Assam hovin kawngte min han dang a buhfaiah harsatna nei lovin kan awm a, Covid karah pawh miretheite'n a thlawnin thla engemaw zat an han dawngte kha a ropui khawp mai. Chuvangin, he sorkar hi chu 'mirethei sorkar' hi chu a ni chiang a ni tih Pu Dy. Speaker, a langin ka hria.

Gas ah leh thildang dangah te pawh kan hnianghnar khawp mai a vawiin thlengin, a lawmawm khawp mai a. kan han buai nak naka covid boruak leh kawng min han dan karah pawh khanin kan Chief Minister-te leh kan Supply Minister-te, Department-te tan hona avangin, kha khawchhak lampang oil-te pawh kha kan nei hman a nia, Myanmar atangin oil tha tak tak kha engemaw zat chu kan nei hman a ni. Ruahmanna kha a chak khawp mai a Manipur atangte pawhin ei leh bar turte nichin khan Lengteng bialtu khan a rawn sawi tawh a, a lawmawm khawp a ni.

Food, Civil Supplies & Consumers-ah hian fur lo thleng mai tura tana an lo chhek khawl te hi a tha khawpin ka hria a. Buhfai te pawh engmah harsa lovin, fur chhia atan te pawh tiang hian kan han chhek khawl a.

Kuminah te pawh a bik takin Champhai khua chu kawng double lane-in an han ti chho a, khang-ah te pawh khan hma min han lak sak tan leh tawh a. Engtinng fur a lo ni ang a, kawng a lo chhia ang a, buhfai an nghei mai ang tih hlauin kan Minister ten hma min lo lak sak a. Kudam te pawh tam tak kan han sa chho a, a lawmawm khawp mai a. Chung zingah chuan ka bial Rabung-ah te pawh min sak sak dawn niin ka hria a, a lawmawm khawp mai a.

Hmun hrang hrangah kudam repair te kan nei a, a bik takin Champhai Fangtlang-ah khian in kan CEM ten hma min laksakna a zarah DCSO office leh staff quarter building te kha min sak sak zo tawh a, sorkar hmasa atangin a ni a. Amaherawhchu, luah loh khian a awm reng a, khing te pawh khi tlema zawng han repair-a luah mai theih te kha a niin ka hria a, khing te pawh khi min han hriatsak se kan duh a.

Tin, Weigh Bridge hi Champhai Godown ah khian kan neih lohna a rei tawh a, kan Minister hnenah pawh hian kan thlen tawh a, hma kan rawn la ang e an ti a, tun atanga rei vak loah nei ve thei turah te pawh kan inngai a ni. Chu chu Supply chungchangah khan ni mai se.

Tin, LAD chungchangah hian, VC House thawmthatna te kha kan hmu dawn te pawhin kan han hria a, tin, a thar sak tur te pawh awm tur khan kan han hre bawk a. Ka bialah Selam te, Ngur te, Pamchung te khian VC House kan nei lova, kan chan ve ngei pawh kan inbeisei a ni.

Tin, hei Dak Runner te pawh hi a pawimawh khawp mai a, DLAO-ah computer set te pawh khi kan indaih lo khawp mai a Champhai ah khian, chutiang atan bike te pawh hi thil lian tham chu a ni lova, a pawimawh khawp mai a, hengte pawh hi min lo hriatsak sela ka duh a. Hemi LAD bik hi a pawimawh khawp mai a, thingtlang mite tan chuan kan innghahna tak tak a ni a. Khawchhung faina kawngah te, vengchhung inkalpawhna kawng te, tuiluan kawr te leh hand railing kan han tih white tapping te hengah hian thingtlang te hian kan innghahna ber ani a. Hengah hian SEDP hi thingtlang ho tan a pawimawh lehzual a, hei hi min ngaih pawimawh sak se ka duh a ni.

Tin, Fisheries Department-ah hian lawmthu sawi tur hi ka ngah khawp mai a, lawmthu kan sawi mawlh mawlh a. Kuminah hian new-pond tih te, pudding-cum-fish farming tih te, hatcherry leh rearing pond te pawh Mizoram pumah a thar han siam tur te pawh kan nei a, Champhai-ah ngei pawh khian chhungkaw 91 zet in eizawnnaa hman turin kan han dawng dawn a ni a, kan lawm khawp mai a.

Tin, Champhai hi potential area tha ve tak a ni a, 2019 ah pawh khan ‘Best fish farmer Awards, Northeast’ kha kan dawng a ni Champhai khua khan. Pu F. Laldingliana, Champhai Kahrawt-in a dawng nghe nghe a, lawmman te pawh an zu hmu a, chung chu kan sawitel duh a ni. Tichuan, new pond han siamtur te tam tak a la awm a, chungte pawh chu kan la siam chho zel turah ngai ila.

Tichuan, hei fishery hian office building an la nei lova, Bethel ah khian ram zau tak mai an nei a, khingte pawh khi a theih hun hun ah min han sak sak se ka ti a, chubakah motor, lirthei te office-in an neilo bawk tih kha ka sawi duh a. Kha kha Fisheries Department-ah chuan ni mai ta sela.

Tichuan, Agriculture Department, Pu C. Lalrinsanga Demand hi, Agriculture hi kan Chief Minister pawhin a ngaih pawimawh a ni a, a ngaih pawimawh em em pakhat, mechanisation hi kan han uar chho tan dawn a ni a, a lawmawm khawp mai a. Tunah hian kan hriat angin buh thar tihtam nan NABARD fund atang khan hectare 484.67 lai mai ngaihven ani a. Tichuan, warehouse te pawh 8 lai NABARD sumin kan han buatsaih hi a lawmawm khawp mai a. Tichuan, Hnahthial ITC, School of Agriculture Science hi upgrade niin, degree course-ah hlankai tum a ni te hi Agriculture lamah chuan hma kan sawn dawn hle niin a lang a.

Tin, organic fertilizer kan han ti a, bio-fertilizer siamna turin hma lak mek an ni te hi a lawmawm khawp mai a. Neiwbawih-ah tunah khian a building te pawh sak mek a ni hi

a lawmawm a. Tichuan, thlai chite pawh hi ramdang atang a la lut tawh lovin, helaiah keimahni ram ngeiah tharlam taka kan tih theihna turin seeds village, district tinah kalpui a ni tur te hi a lawmawm hle a ni.

Ka bial chhungah potential area thatak mai hei Agriculture lamah hian kan... (Pu Speaker, ka zo tep e, pakhatna nih manah min ngaithiam ang chu maw) Hei, land development chungchangah hian hma nasa takin lak a ni a, nikumah tractor kha custom hiring centre atangin 78 lai mai a ni a, power tiller pawh 105, khatiang khan buh sengna turte leh thildang tam tak te pawh kha nikumah khan pekchuah a ni a, ka bialah te pawh khan In eng emaw zatin an dawng ve a. A pawimawh khawp mai a, mi tam takin tunah hian buh tam tak an thar phah a ni.

Tin, chubakah link road kha a pawimawh khawp mai a, buh thar tam tur chuan link road kha neih phawt a ngai a, kan bialah pawh link road engemaw zat kan han nei a, kawnga buh phur thin te, kawnga hah tako buh leh bal an han phur thin te kha, Selam-ah te tunah chuan motor-in an han phur zer zer tawh mai a. Tuisephai pawh hi a thleng tep tawh a, chutiang chuan ka bialah pawh tam takin balu lak nan te, buh phurh nan te, thlai phurh nan te kan hmang tangkai khawp mai a. Amaherawhchu, tunah khian hmabak tam tak kan la nei a, khingte pawh khi beiseina sang tak nen kan la thlir mek a ni tih te pawh kha ka sawi duh a.

A tawp nan chuan, Pu Deputy Speaker, Co-operative chungchang hi sawi loh theih a ni lova, Irrigation nen hian a pawimawh khawp mai a. Irrigation-ah tun hnai hian hma an la nasa a, Champhai zawl mai bakah Zotephai leh Hnahlan-ah te pawh buh leh thlai chinna, chhungkaw tam takin eizawnna tur a awm a, mahse irrigation, tui kawng thatloh a vangin tam takin kan la ti thei lova, khingah te pawh khian hma lakna tur tam tak a awm a.

A tawp nan tak tak chuan, Co-operative Movement kha nichinah an rawn sawi tawh a, a pawimawh khawp mai a. Thalaite pawh hian tunah chuan Co-operative Movement-a an tui theihna tur hian ruahmanna sorkar pawhin a han siam chho a. Champhai khi tunah hian co-operative movement-ah chuan a tha pawl tak niin kan inhria a, chhungkaw tam takin eizawnnan co-operative hi an hmang tawh a ni.

Hei, 2020 leh 2021-ah hian Co-operative Society cheng vaibelchhe 10 lai mai ruahmanna sorkarin kan Chief Minister leh Co-operative Minister hoa an han ruahman hi a lawmawm khawpin ka hria a, hengte hi mi tam tak tan eizawnna pawimawh tak anih a rinawm a ni. Nichinah te pawh kan han sawi a, Co-operative Development Council te ding siin committee pawh koh a la ni lo tih te kha a ri a. Nikum chhung zawng khan Covid-19 a vang khan in hetiang Society leh thildang ang hi committee a theihloh a vangin kuminah chuan a Council te pawh kha an thutkhawm tawh ngei ka ring a. Hma thar te pawh hi nasa zawkin kuminah hi chuan kan la thei tawh ang tih hi beiseina nen pawh kan lo thlir a. Chung chu kan Minister te leh kan hotute ngaihdan pawh anih ka ring a ni.

Pu Deputy Speaker, hun minute hnih khat min han pek belh avangin lawmthu ka sawi e. Tichuan, kan Minister-te pahnih demand hi pass ngei turin ka rawn thlawp a ni e. Ka lawm e.

**DEPUTY SPEAKER** : Tunah chuan Member zahawm tak Pu H. Biakzaua i lo sawm ang.

**PU H. BIAKZAUA** : Pu Deputy Speaker, ka lawm e. Ka thianpa hnam incheinaa pakhatna lawmnaah hun tlem i han pek belh a, dar 1 kha chawlh hun a ni si a, hun in a daih lo a ni tawh lo maw, ka sawi tho dawn nge? (*Dy. SPEAKER: Minute 10 chu a la daih khawp mai khi*). A awm chiah tawh lovin ka hre deuh a, (*Dy. SPEAKER: I hmang thiam ang a, i leng vek thei ang*). Pu Deputy Speaker, ka lawm e.

Vawiina kan Minister zahawm tak tak pahnih Pu K. Lalriniana leh Pu C. Lalrinsanga te demand kan han sawi leh tur hi a lawmawm hlein ka hria a, department pawimawh tak tak an ni a, department zawng zawng hi a pawimawh ber rualin, a pawimawh ber kan han ti theuh mai a, vawiina kan sawi tur Agriculture hi chu a pawimawh lehzual elo maw aw ka ti a, Supply a lo ni leh bawk si a, a pahnih hian inzawm tlat kha an ni a, an pawimawh zual hlein ka hria a ni. Lawmthu sawi tur deuh hlir a awmin ka hria a. A hmasaah Demand No. 17 - Food, Civil Supplies & Consumer Affairs lam hi sawi hmasa ta ila.

Pu Deputy Speaker, Covid-19 hrileng karah kumdanga Covid-19 hri a len loh lai aiin ei leh inah/essential commodities-ah kan hnianghnar zawk niin ka hria a. Hemi chungchangah hian kan Chief Minister zahawm tak leh Supply Minister zahawm tak an fakawm hlein ka hria a. gas leh buhfai te, oil te leh thildang tam tak harsatna awm lovin, ‘Covid period’ han ti ila, lockdown kan nih chhung pawh khan kan nei thei thin a, stock eng emaw zat nein, buhfai unload-na turte pawh awm lo khawpin truck-te pawh an ding a, unload lohin, chutiang khawp chuan kan pute leh sorkar hian hna, ei leh in chungchangah a thawk tha a, a lawmawm hlein ka hria a ni.

Tin, mahni bial lamah lawmthu han sawi tur ka nei leh a Pu Deputy Speaker. ‘Lawngtlai transit go-down’ kan ti a, go-down lian ber a ni a, tunah hian an sa a, a zo deuh thaw tawh a, Lungtian-ah an sa mek bawk a, Vawbuk leh Lungpher kha hmannia question min chhannaah khan Minister zahawm takin sak turin hma kan la leh dawn a ti a, a lawmawm hlein ka hria a, lawmthu ka sawi a.

Tin, Lawngtlai District-ah Legal Metrology Department office hawn tum a ni leh bawk a, min chhannaah khan, lawmthu ka han sawi leh bawk a ni. Monsoon stock-te, kalkawng siam mek leh hnathawk awm mek a tam avangin a ngai nasa zualin a lang a, kuminah hian. A bik takin Sangau lam saw, Darzokai Tuipui lei a rintlak loh hle mai a, buhfai thiar nan, mar-boat hmanga buhfai thiar a nihin a phur theilo bawk a, furah harsatna a awm bawk a. Thalah saw lai bik saw ngaihven anih loh chuan Vanlaiphai leh Sangau lam

saw stock neih that loh chuan furah communication gap awm thei a ni a, hriat ngun a tul khawpin ka hria a, chungte pawh chu ka han ngen tel a. Supply Department-ah hian achievement a tha ka ti a, lawmthu ka sawi a ni.

Demand No. 35 - Fisheries-ah hian han sawi leh ka duh chu, Pu Deputy Speaker, sanghaa kan intodelh theihna turin nasa takin kan Minister leh sorkarin hma a la a, sangha dil thar laihna tur tam tak, hmun hrang hrangah, District tinah sem a ni thin a, sangha chi sem a ni thin bawk a. Sangha chi erawh chu a thang thei lo chi hi a tam an ti a, duhthusam dil neitute'n kan dawng lo an ti thin a. Covid avang khan hmundang atanga supplier awm thin ten harsatna an tawk a ti a kan Minister pawh khan, a dikan ka hria a. Sangha-ah hian intodelhna turin tan nasa takin an la mek zel niin ka hria a, a lawmawm pawh ka ti a. Sangha khawitute pawhin an dil bula thlam an neih theihna turte thlengin tunah hian pek an ni a, a lawmawm hlein ka hria. Tin, ka bialah fish seed hatchery/sangha note keu tirna tur hmun 2-ah buatsaih tan mek a ni a, lawmawm ka ti khawp mai a, lawmthu ka sawi a ni.

Demand No. 31, Agriculture-ah hian lut nghal ta mai ila. Pu Deputy Speaker, Agriculture hi kan sawi tak angin department pawimawh berte zinga mi a ni a, 'eng vang nge' kan tih chuan ei lovin tumah kan awm thei lo a, ei in min petu department, ei in thawk chhuaku department anih avangin a pawimawh a. Kan Bible pawhin thlan tui fara hna thawka eizawng turin min ti a. Agriculture hi a intanna a bul hle awm mang e ka ti a. Chutiang khawpa department pawimawh a nih avang chuan vawiina kan demand han sawi turah pawh hian thil tam tak a awm a, hun a tlem si a, kan sawi hman dawn lo a.

Tawitea ka han sawi duh chu, leilet, WRC leh jhumming system, shifting cultivation kan tihte hi kan practise ber chu a ni ta mai a Mizoram chhungah chuan. Leilet leh tlanga lo neih te hi kan tih theih tawk chu a ni mai a. Kan buh thar, leilet leh tlang lo neia kan buh thar hi a tlangpui thuin a inzat deuh thuak elo maw tih turin a awm thin a. Mahse, policy hrang hrang a awm a, tlanga lo neih bansan han tih zawng hi kan kalpui theih tur niin ka hre lo a, a chhan chu nichinah pawh kan ngaithla tawh a, Kolasib District lamah phei chuan pawn lam atangin hnathawktu, hnamdang rawih an ni a, mi eng emaw zat an thawk a, share neiin, buh an thar kha an share an han inseum chu, buh thar kha a kiam hawk mai a, a zatve emaw a lo kal ta daih mai a, tlang lo neia kan buh thar hi a tam zawk a ni.

Chuvangin tunah FOCUS kan han tih te pawh hi tlang lo neih lampang te tih hmasawnna hi a hawi khawp mai a guidelines-ah pawh hian, chutiang te anih avang chuan tlang lo neih lam hi tihhmasawn a ngai hlein kei pawhin ka hria a, kan buh thar ti pung tur hian keimahnin hna kan thawh theih loh te hi khawl hmanga kan mechanise-a kan beih tak tak hi chuan nasa takin improvement leh kan thar chhuah tih pun theihna tur hi a awm mek ni hian a lang bawk a. Covid-19 hripung avang khan Agriculture Department lamah, Vice Chairman ka nih ve na angin kan pu te, kan Chief Minister zahawm takin Vice Chairman-ah min dah a, kan Minister zahawm tak Chairman-na hnuaiah meeting neiin Covid-19 hrileng avanga Lockdown-te a nih avangin kan thar chhuah a tlem palh ang tih hlaui district

zawng zawngah feh chhuah nise kan ti a, team insiamin kan kal chhuak a, Mizoram District awm zawng zawng kan tuam a. Chuta kan thil tih chu Agriculture lama harsatna loneitu ten an neih leh an harsatna tea tanpui dan a awm em tih leh an thar chhuah a tlem phah palh ang em tih hlaevin a hmunah kan kal a, district zawng zawng kan fang chhuak a, hemi kan tihna hian rah tha a chhuah ni pawhin ka hria a, loneitute an tang zual nasa hle pawhin ka hria a, tin, thar chhuah pawh a tlem loin ka hria a, lockdown, hrileng karah kan awm chungin thar chhuah a tha viau pawhin ka hre nghe nghe a.

Tin, SEDP atanga Vaimin chin leh pulses, Be lampang a hnulama kan han tih tur kha kan buaipui ber kha a ni bawk a. Vaimin pawh eng emaw zat chu Ranchaw atan te Vety Department-in an lei a, chutiang chuan kum kal ta khan Argiculture Deparment-hian kan phak tawkin hna kan thawk a, hma an la a ni tih te, Pu Deputy Speaker ka sawi duh a.

Hnam dang leileta kan chhawr thin te hi han sawi lei leh ta lawk ila, thawktu kan indaih loh avang hian leilet tam tak kha leh theih lovin nikumah khan a awm a, hnam dang ho an haw bawk si a covid avangin. Kan zuk kal a, khulamah te pawh leileta an hman thin kha leh lovin a awm a, kan Chief Minsiter zahawm tak hnenah sawi leh thlen a ni a, chuvang chuan... (**Dy. SPEAKER:** *Kan hun a tawp a, dar I a ri a, kan chawlh hun pangngai kha, kan sawi zawh tir mai dawn em ni, a laklawh deuh in a hriat a?*) Pu Deputy Speaker, a laklawh deuh bawk a, tawi te a ni tawh ang a, ka han sawi chhunzawm lawk a nge.

Tichuan sorkarin ngun taka ngaihtuahin leilet a tan a siam thin hnam dang haw tak avanga leh theih loh te kha ngaihtuahin a thlawnin nasa takin khu lamah, a bik takin Kolasib District-ah lei leh sak an ni a. Tin, Custom Hiring Centre atangin power tiller te Mizoram hmun hrang hranga lei lehna a tan nikumah khan tam tawk tak sem chhuah a ni a, hei hian kan thar chhuah pawh a tipung ngei niin a lang a. Tin, thlai chawmna turin tui dahkhawlna tur tanky-te, thlai tui pekna tur pipe-te enge maw zat sem a ni bawk a. Tin, tunah pawh hian land development lamah hma lak chhoh mek a ni a, eng emaw chen chu a kal tawh a.

Tin, Agriculture Link Road pawh nasa takin hmalak a ni a. Link Road hi tunhma pawhin ka ngaih paawimawh ve thin a ni a, ka tum leh ka beisei angin Link Road-ah sum kan ngah thei lo a, hmun tha leh ram tha potential area kan nei hi link road-in a chhun chuan loh chuan ke-in kan kal thei tawh lova, thlai chi kan phur thei tawh lova, thlai thar pawh kan la chhuak thei tawh lova. Chuvangin link road-in kan ram tha te hi a chhun loh chuan awmzia a nei tak tak lo va, ke-a kan kal phakna chu ram chhia a ni deuh vek tawh a, kan kal phak lohnaah ram tha a awm a, chuvangin link road hi a tam thei ang ber kan tih loh chuan awmzia a awm thei lova. Ram tha eng ang pawh nise, thil hlu eng ang pawh awm se, communication a awmloh chuan thil hlu-in hlutna a nei lova, thil tha-in thatna a nei bawk lova, lak chhuah theih loh leh phurh theih lohna hmunah hlutna awm chuang ngai lo a ni.

Pu Deputy Speaker, Irrigation leh Water Resources, Minor Irrigation-ah nasa takin hma lak a ni a, hemi pawnna tui awm sa mai bakah, lei hnuiai tui awm ground water pump

thlengin tunah hma lak a ni a, NABARD atang tein sum hmuh a ni a, tui kawng repair leh a thar siam te pawh tan lak chhoh a ni zel mek a. Tunah hian tui kawng hlui tha tawh lo tam tak repair hnathawh mek te a ni.

Kan ngaihthlak tak angin, Fostering Climate Resilient Upland Farming System, ‘FOCUS’ kan tih hi District 6, Champhai, Kolasib, Serchhip, Mamit, Khawzawl leh Saitualah te Kuhva tiak te, Sertlum tiak te, Papaya tiak te, Hmarcha chi te, Aieng chi te, Sawhthing khatiang kha eng emaw zat sem chhuah a ni bawk a. Heng hi a pawimawh hlein ka hria a, hei hian kan thlai thar chhuah nasa takin a ti tam a. FOCUS hi a tangkai khawp mai a, tin a thil tum tam tak zinga pakhat pawimawh em ema ka hriat chu, Value Addition leh Market Exchange-hi a ni a, he lampangah pawh hian tan tunah hian lak chhoh mek zel a ni a, a lawmawm hlein ka hria a ni. Pu Deputy Speaker hun min pek belh a, ka lawm e.

**DEPUTY SPEAKER :** Minute 5 dawn lai i hman belh a ni. Engpawh nise kan chawlh a lo hun ta a, vawiin tlai dar 2:00-ah rorel kan tan leh dawn nia. I chawl ang u le.  
(Recess)

**2:00 PM**

**SPEAKER :** Awle, tunge sawi leh ang le? Ziakah chuan Pu Lalrintluanga Sailo a inti sa a. Aw le, Member zahawm tak Pu Lalrintluanga Sailo ka sawm e.

**PU LALRINTLUANGA SAILO :** Pu Speaker, ka lawm e. Vawiina kan Minister zahawm tak te pahnih Demand kan sawitur hi sawi a chakawm hlein ka hria a, a chhan chu a bikin he department enkawltute enkawlna atang hian kan ram hmel te pawh heng department te kaltlangin a lo danglam tawh thin a ni tih Pu Speaker ka sawi duh a. A hmasa berin Demand No. 19 - Local Administration Department chungchang hi sawi ka duh a, hun kal tawh te pawh tlem han tarlan duh ka nei a.

Pathian kaihhruaina zarah vawiinah he department kal tlang hian kan ram hi zauh a lo ni tawh thin a ni tih hi Pu Speaker, ka tarlang duh a. Thinglian khua tuna Serlui bial ni ta, tunhmaa Bilkhawthlir bial ni thin khu kan Founder President, kan Hnampa Pu Laldenga sorkar hun tawi teah khan ‘Nanai’ ni thin kha ‘Thinglian’ tia phuahin LAD kal tlang hian Village Council kan lo pe tawh a ni a. Chutiang bawk chuan Saihapui-V kan han tih hi Pu Zoramthanga sorkar hmasa ah khan bialtu zahawm tak Pu Lalchamliana vawiina kan Home Minister ni mek bial anih lai khan Village Council te pek a lo ni tawh a. Chutiang bawkin tuna ‘Tripura Phuldungsei’ kan tih mai hi kan House Leader zahawm tak hovin Ni 10.1.2020 khan kan LAD Minister te kan zuk zui a. Khulai khu tun hma atanga ‘Tripura Phuldungsei’ tih ni thina kha kan House leader zahawm takin khu lai khu a zir chiang a, tun Village Council inthlanah khan thar VC pek a ni ta a, chu mai ni lovin retailer pawh pek a ni.

Chuvang chuan, kan MNF Leader-te kaltlang hian kan ram hi zauh a lo ni zel a, tunah hian Thinglian leh Vairengte thlengin, chu lai chu he department hnathawh ropui tak hi a niin ka hria a, lawmawm ka ti a. Chuvang chuan he department hmalakna te han sawi hianin, fak hla siamtuin a sawi ang deuh a ni a, “fak zel che ka nuam” tih hla kan sak thin ang deuh hlek khan fak hi an phu hle niin ka hria a, lawmawm ka ti a ni.

Tin, ka bial lamah han lut zawk ila. Keini bialah pawh tun VC inthlanah khan Village Council 2 kan Minister kaltlangin pekin kan awm a, amaherawchu nakinah lo chhinchhiah se tih ka duh lai a awm a. Village Council min pek kha Lianbuang a ni a, pakhat kha Chhippui a ni a. Amaherawhchu ‘Chhippui-I’ tiin Village Council kha hming phuah a ni a, amaherawhchu a remchang lo a an khaw hming pangai ‘Chhippui’ leh ‘Kawnmawi’ tia then mai kha a remchan chuan min lo chhinchhiah sak se. He department hi kan ram zauhna atana department pawimawh tak lo ni tawh thinin leh thingtlang bialtu keini tan phei chuan kan Village Council tena kan sorkar hmuh theih hmasa a ni a, an hmalakna ropui tak te hi Mizoram khawvel hriatuh han tarlan nawn leh a thain ka hria a, ka han sawi lang a ni.

A dawt lelah chuan, Demand No. 35 - Fisheries Department hi kan bial lamah hian kan hmelhriat ngai vakloh a ni a. Amaherawhchu tunah kan Minister chak tak enkawlna hnuaih kan potential neih dan te hriain hma min lak chhoh sak mek a, a lawmawm kan ti hle a ni tih ka sawi duh a. Chu mai nilovin Mamit leh Kolasib District tan hian Fisheries Deptt. kaltlangin project te pawh central lamah siam niin a hlawhtlinna kan hmu tep a ni tih kan hria a. Kan hlawhtlin phei chuan khulai atang khuan khawpui lam te pawh sangha-a rawn chawm che u kan tum a ni tih kha Pu Speaker ka rawn tarlang duh a.

A dawt lelah chuan, Demand No. 17 - Food, Civil Supplies & Consumer Affairs Deptt. hi ka hmaa Member zahawm tak tak ten an sawi tawh ang khan, he deptartment kaltlang hian Covid-19 in kan ram nasa takin a nuai a, hrileng karah leh ramri buai tak mai karah pawh politics-a kan inchirh thehna ber thin gas, buhfai, khawnvar tui, diesel, petrol harsatna chungchang thuah, kan inchirh thehna zawng zawngte um bo a lo ni ta hial a, Minister hmalakna hi a ropui ka ti a. Chu mai ni lovin Mizote in-unauna atan Manipur lama kan zofate kaltlang tein harsatna kan tawhna te pawh a han su tlang a, tin, Myanmar lamah te pawh chutiang zel chuan record a niin ka hria Pu Speaker, hetiang khawpa he department katlanga kan rama harsatna sut kian a lo ni ta hi lawmawm ka ti a, vawiin niah hian kan sawi duh a.

Tin, ka bial chhungah han lut leh zawk ila. Kudam kan nei tha ngai lova, a bikin tun hunah Reiek-ah te Darlung-ah leh Pukzing-ah te kudam tha tak mai min sak sak mai bakah staff quarters te leh toilet tha tak te min buatsaih sak a, kan lawm hle a ni tih ka tarlang duh a, vawiina kan la neih that tawk lohna Phuldungsei pawh hma min laksak dawnin kan hria a, kan lawm hle a ni tih ka sawi duh a. Amaherawhchu kan lo hmaih palh Khawrihnim, UT laia sak tawh khu kan lo hmaih palh hlauh a, hei hi kan Minister hian min lo hriatsak se ka duh khawp mai tih ka tarlang suh a ni.

A dawt lehah chuan Demand No. 37 - Co-operation hi Pu Speaker, ka han sawi leh lawk duh a. ‘Van Dhan Mission’ kan tih hi Co-operation atangin TRIFED kaltlangin hma lak a ni a. Ka bialah hian kan hmuh leh kan hriat hlawm angin West Lungdar-ah te, Reiek-ah te NASA takin aieng kan ching a, hma pawh kan la a, heng atana aieng pack-na tur khawl te pawh hi min buatsaih sak dawn niin kan hria a, Minister chungah lawmthu kan sawi a. Chutih rual chuan kan chenna Luangmual-ah amah kaltlang hianin Co-operative Bank te tak te kan ti a, amah ngei, a changtu Minister zahawm takin a hawng a, keipawh ka tel nghe nghe a, tunah hian depositors te pawh kan ngah hle tawh a, loan pawh NASA tak kan pechhuak a. Tukin zing dar 6:30 khanin NABARD hruaitu central lamah vai ho pawh an lo kal a, keipawhin ka lo receive nghe nghe a, chutiang chuan loan te pawh min pek an tum a ni. Hei hi a bik takin kan Co-operation Minister hmalakna a ni a, khawtlang kan lawm hle a ni tih ka sawi duh a.

A dawt lehah chuan, Demand No. 47 - Irrigation & Water Resources Deptt. hi, hei hi mi tam takin kan hre lo a, department te tak te Agriculture Department-a bet mai thin kha niin, tunah chuan department puitling lo ni tawhin, sorkar hmasa khan project tam tak mai kal san neiin leh hectare 4,889 lai mai a lo hlamzuih tawhte thar thawh leh niin tunah hian Special Assistance sum atangin ₹284 lakh hmanga hmalak chhoh a lo ni ta te hi, lo neitu leh thlai chingtute tan a hlimawm hlein ka hria a, ka rawn tarlang duh a. Tin, NABARD sum ₹227.15 lakh hmanga Serchhip Chawnzau rama lei hnuai tui pump chhuahna te pawh buatsaih a lo ni ta zel te hi a lawmawm ka ti a, ka tarlang duh bawk a ni.

Tin, chu bakah chuanin Demand No. 31 - Agriculture Deptt. ah hian, kan hriat angin keini bial te pawh a khawih a, helaiah hianin warehouse hmun 8 lai maiah sak tum a ni tih te kan lo hria a. A bikin ka bial West Phaileng-ah pawh tunah hian tumna awmin ka hria a, kan lawm hle a ni tih ka sawi duh a.

Tin, Covid karah manpower, hlawhfa kan neih theihloh avangin kan Chief Minister remtihna Minister kaltlangin tractor 78, power tiller 105, paddy reaper 40, paddy thresher 20, paddy transplanter 34 te kut hnathawktute hnenah Pu Speaker, sem chhuah a ni te hi, intodelhna tura hma kan lak zel nan a tangkai hle dawnin kan hria a. Tin, ka bial chhungah thil awm ngailo, panhnah chingtute tan tanky 10 ngawt mai min rawn pe a. Helaiah hian Pu Speaker, tarlan duh ka neih chu i veilama mite khan, ‘MNF ho induhsak bik a ni’ an ti a. 10 an pek zingah hian 2 chiah hi MNF party an ni, chutiang khawp chuan rorelna lai takah kan ding a ni tih he House hi ka hrilh duh a ni.

Chutiang chuanin vawiinah hian keini bial hawisan thin leh changkang lo takah te pawh link road te min han laih sak chho zel a. Tin, chubakah Block Agriculture Officer hi West Phaileng-a dah min remtih saka a taka kan lo hmuh ngei ka beisei a, a bial mipuite’n an nghakhlel a ni tih kha ka sawi duh a ni.

Vawiin niah ram rorelnaah kan han thu ve a, thiamna, finna te, hausakna te leh experience engmah nei miah lo, kan House Leader kal tlanga bial hnufual em em chawi kan a kan lo

awm ta te hi a a lawmawm hlein ka hria a. Vawiin niah hian ‘fak zel che ka nuam’ tih piah lamah hian thil a awm a ni tih kha Pu Speaker, ka sawi a ni e. Ka lawm e.

**SPEAKER** : Awle, tunah Pu C. Lalsawivunga ka sawm ang e.

**PU C. LALSAWIVUNGA** : Pu Speaker, ka lawm e. Vawiinah Minister zahawm tak tak, Pu K. Lalrinliana leh Pu C. Lalrinsanga te demand kan sawi ho a ni a, Demand No. 17-ah hian lut nghal mai ila.

Ka bial chhungah gas, home delivery an han tan a, College Veng hi veng entawn tlak tak an ni a, an ti tha hle a, an hmalakna leh an thil tih dana khu zir chiana veng hrang hrangah hian kalpui ve a thain ka hria a, kan Minister zahawm tak pawhin lo chhinchhiah se a thain ka ring a ni.

Tin, buh hi mizote chuan chawa kan rinpui ber a ni a, mahse kan thar chhuah a la ni lova, state dang atanga kan la lei vek a ni a. Kumin budget-a an dah dan han en hian a thlaphan thlak lek lek em aw, tih hi ngaiantuahna ah a awm a. Chulai chu kan Minister pawh hian lo chhinchhiah se la, theihtawp chhuaha tan lak a ngai dawn a ni tih hi budget atang hian a lang a ni.

Tin, Demand No. 19 - LAD hi, ‘thingtlang lam enkawltu’ ti mai ila, Village Council hrang hrang tuam hlawmtu a ni a. Budget hi nikum aiin 19.76% in a tlahniam a, hei hi enge a chhan? Thingtlang khaw kil khawr tak tak atang pawhin he department hi innghah nana an hman a ni a, hmasawnna tur hna thawh ngai tak tak anih laiin budget-a hniam lam a ni hi eng nge a chhan? Thingtlang mite kan ngaipawimawh tawk lo em ni ang tih kha ka thinlungah zawhna a awm a.

Tin, 15<sup>th</sup> Finance Commission atangin vaivelchhe 93 rural local body te tana ruahman sa kha a awm bawk a, hengte nen hian thingtlang mite pawhin hma lam hunah beiseina sang tak neiin an lo thlir a ni a. Amaerawhchu, kumin kan budget *capital section* lamah hian pawisa dah a awm lova, chutiang chiah chuan *major works* hmasawnna tur pawisa dah a awm lo bawk a ni. Helai erawh hi chu enhian deuh a ngai a ni tih kha ka sawi duh a ni.

Tin, Fisheries-ah hian han lut ila. Sangha pawh hi kan la intodelh lova, phai lam atanga kan lak hi a la tam em em a ni. Department in zawhna min chhanna atang chuan 52.7% hi kan thar chhuak ve a, a lawmawm hlein ka hria a, achievement tha tak niin ka hria. Kan rama Pathian-in lui min pekte hi sangha kan intodelh theihna tur atana enkawl hi a thain ka hria a, hengte hi enkawl anih theihna turin NGO te leh kohhran thleng pawha thawk hovin, sangha-a kan intodelh theihna tura Lui Pathian-in min pek te hi hman tangkai theih ni se tih kha ka sawi bawk a.

Tin, zawhna ah khan ka zawt a, Kolasib Dum luiah Chakai farm buatsaih a ni a, nuai 45 vel senna tur pilot project siam a ni a, hetah hian nuai 16 sen ni tawhin, chakai pawh hi sangthum vel dah nia hriat a ni a. Chuta min chhannaah pawh India rama hmahruaitu ni turin pilot project anihna hi tihhawhtlin anih chuan kan ram economy tan pawh a tha hle dawn a ni. Mizoram economy chawi kanna atana bul tanna tha tak anih beisei anih thuin chhan kan ni a.

Khawvel ram zau zawkte pawh zir chian zela, kan economy chawikanna atana tangkai tak *chakai farm* atanga kan hmu thei dawn anih phei chuan, thil chi tak te pawh a ni mai thei a. Keini ram hi chu ‘fresh water crab’ an tih chakai hi kan neih dan a ni a, vai rama an chakai ang khu nilovin *dum chakai* a ni a. Chuvangin, theih pa tawp chhuaha tan lak zel a thain ka ring a. Pawisa tam tak kan seng tawh a, kan sen tawhna hi chu theih pa tawp chhuaha kan economy chawi kanna tur atan a hmalak zel pawh hi kan tih tur a ni.

Tin, Agriculture-ah hian ka han lut ang a, a pawimawh khawp mai a. Kan ram economy innghahna bulpui a ni a, mahse buh leh balah kan intodelh miah lova, thlaiah pawh kan intodelh lova, state dang atanga kan lak luh vek a la ni a. Kan ramah hian buh thar theihna terrace leh WRC hmanga buh tam tak thar theihna ram kan nei a ni. Mahse hengah hian tui lak hi kan problem a ni a. lonei tute-ah. Chuvangin tui lak theihna chi hrang hrangah buh leh bal thlai thar chhuak thei tura chawmtu tur tui lakna chu tun aia nasa zawka kan beih pawh hi a tulin ka hria a ni. Mahse kan budget enin kha lam hawi zawng kha a lang lo khawp mai a. Tin, Pu Speaker, mechanized hi tun lai hunah chuan a tul tawh a ni. Kan ram zawl siam theih chi ang zawng zawng tui lak awmsa te pawh hi khawl hmanga siam ni zel sela a thain ka ring a, helaiah hian hma thui tak lak a ni tawh tih te kan hriain kan hmu a, a lawmawm em em a, tan kan lak lehzual zel pawh hi a thain ka hria.

Tin, Agriculture-a intodelh tak tak tur chuan, tuna kan kal kawng neih hi tlang chhip atangin luiah, lui atangin tlangchhipah, chutiang chu kan kawng neih dan a nih avangin vawiin niah kan hawi-her pawh a danglam hi a hunin ka hria a ni. Lui dung zui zawng zelin agriculture link road te kan siam hi a hun tawh a ni. Nghawngkawl leh hnam nena kan thlai thar kan phurh chhuah chhung hi chuan intodelhna kawng hi kan zawh thei tak tak dawn lo a ni. Kan system hi kan thlak danglama khati zawng khan agriculture link road te pawh hi kan buatsaih a tul hlein ka hria a ni.

Tin, Vaphai-ah khian leilet Tiau kam zawl tha tak mai East Tuipui Constituency chawm thei khawpa ram zawl kan nei a, khilaiah pawh khian tui lak a la chhuak lo a. Tin, office pawh khi AEO awmna thin a ni a, Irrigation lam te pawh an awm a, khi khi tihlen ni se, buh leh thlai tam tak kan ram tan hian a thar chhuak thei a ni tih kha, Pu Speaker, ka sawi duh a ni.

A tlangkawmna atan tawi tein, Cooperation Movement hi khawvel ram hrang hrang ram ropui kan tihte lo din chhuahna bul a ni a, India pawh cooperation hi kan din chhuahna

bul tur a ni a, an din chhuah pui nasa em em a ni. Kan ram pawh hian Cooperation hi kan dah pawimawha kan dah len zel a pawimawh a, budgetah a tlem mah mah a. Kuthnathawkute mi chi hrang hrang dawm kanna hmanrua atan hmang tangkai turin Cooperation hi tun hma aia uar lehzuala kan kalpui hi a thain ka hria a ni. Pu Speaker, ka lawm e.

**SPEAKER** : Member zahawm tak Pu Ramthanmawia ka sawm e.

**PU RAMTHANMAWIA** : Pu Speaker, ka lawm e. Vawiinah kan Minister zahawm tak tak Pu K. Lalrinliana leh Pu C. Lalrinsanga te demand sawihona hun a awm hi a lawmawm ka ti a. Department pawimawh tak tak pahnih an ni a, a hmasain Pu Rintea Demand No. 17 - Food, Civil Supplies & Consumer Affairs Department hi sawi i la.

He department hi a fakawm khawp mai a, kan ngaihthlak tawh ang khan covid avangin harsatna nasa kan tawk a, chuti chung chuan gas ah te harsatna neilo in hniang hnar takin min siam a. Buhfai pawh a thlawn in an sem hial anih kha. A changtu Minister leh a thawktute an rim em em a ni tih kan hria a, a lawmawm tak zet a. Tin, kudam te min sak sak a, Khuangleng kudam, quarter leh toilet min sak zawh sak tawh a, tunah hain Khawbung-ah kudam, quarters leh toilet min sak sak leh mek a. Hei bakah hian ka bial, Dungtlang leh Farkawn-ah khian kan mamawh khawp mai a.

Farkawn khi khaw lian tak a ni a, tuna a awmna khi a chep em em mai a, motor lian han luh chhuahna tur a len tawk loh avangin a buaithlak khawp mai a, a panna a rem bawk lo a. Chuvang chuan hmun remchang zawkah a thara min sak sak kan beisei khawp mai a, min lo chhinchhiah sak theih chuan a lawmawm khawp ang; a hmun khi sawn ngai a ni. Tin, staff quarter leh toilet te pawh a thar a sak kan mamawh dawn a ni. Dungtlang pawh khatiang bawk kha kan ni tih kha ka sawi duh bawk a. Tin, store keeper hi kan indaih lo tih kan sawi tawh a, hei hi a remchan hunah min la ngaiantuah sak se kan ti bawk a ni.

Tin, hei kan hriat angin Myanmar raltlan te kan bialah kan lo mikhual a, mi za rual an awm tawh a, kan Minister in min lo hriat sak se ka duh chu, buhfai hi kan bialah khian thahnem tak min chhek sak se tih kha ka ngen duh a ni. Tunah hian eng emaw zat chu a awm naa mikhual te hi an lo la pung zel dawn te pawh a ni ang a, chung atan chuan kan lo inven lawk hi a ngai dawnin ka hria a ni.

Fisheries, Demand No. 35 hi han sawi leh lawk i la. Ka bialah khian fisheries lama hmalakna tur atana remchang deuh mai a awm a. Kan Minister zahawm tak hmalakna ‘Blue Revolution Scheme’ hmangin eng emaw chen chu hmalakna a kal tawh a, hma pawh kan sawn viau ta a. Fishermen house te, fishpond 14 lai te min siam sak a, PMMSY scheme hnuaih tunah hian hmalak chhoh zel a ni bawk a, a lawmawm khawp mai a. Kumthar 2021-2022 atan hian PMMSY scheme hnuaih khaw pathum - Samthang, Khuangleng, Bungzung

cluster based hmalakna tur action plan demand DPR kha department-in an lo siam tawh a, khang te kha Minister-in min lo hriat sak se.

Tin, LAD - Demand No. 19 hi, ka biala khaw 15 velin VC House tih tlak kan nei tawh lo tih kha ka han report a, ka dil nghal a ni. Remchangah min siam sak se la.

Minister zahawm tak Pu C. Lalrinsanga Demand No. 31 leh 47 hi ka han sawi kawp mai ang a. A hmasa in, Irrigation & Water Resources Demand No. 47 hi sawi hmasa ila.

Mizoram-in buh leh thlai kan thar tam theihna turin nasa takin hma an la a. He department hi a lian lo nain a tangkai zia kan hria a, term hmasa atanga khan irrigation channel hlui tawh tam tak maintain loh a awm a, heng hi project 97 lai niin, hectare 4,889 laia zau, special assistance cheng 284 lakh hmanga hmalak a ni hi a lawmawm khawp mai a, ka bial chhungah pawh Bulfekzawl-ah hmalak mek a ni hi lawmawm ka ti khawp mai.

Nichina kan ngaihthlak tak ang khan, ka bial chhung Vaphai, Saikhumpai, Hmawngpuizau tui lakna hi tuikawng laih tlang a ni tawh a, amaherawh chu lei thawlna hmun anih avangin tui hi a rel ru a. Tin, leimin avangin chu hmalakna chu tunah hian hman theih lohin a awm a. Helai hi buh thar tam tak kan neih theihna tur hmun anih avangin khawngaih takin kan Minister hian min lo chhinchhiah sak leh se la, Saikhumpai, Hmawngpuizau, Tuikhurlui te WRC canal km 3-a thui hi cement concrete hmanga min siam that sak turin leh, dilna kan rawn thlen tawh kha tunah hian Chief Engineer, Irrigation ah a awm mekin kan hria a, hei hi kumtharah chuan hma min lak sak thei turin kan beisei a. Solar tui pump-na PM Kusum hnuaih kan bialah hma min lak sak thei turah kan beisei a. Tiau tui khi pump chhoha tiau kam a leilet tam tak siam theihloha awm khi hemi hmang hian hma min lak sak chuan nasa takin buh thar hi a pung dawn a ni tih kha ka sawi belh duh a ni.

Sawi tur tam tak a la awm nain ka sawi lo mai ang a. Kan Minister pahnih te Demand hi vawiinah hian lungrial taka pass turin keipawh hian kan thlawp a ni. Ka lawm e.

**SPEAKER** : Member zahawm tak Pu Nihar Kanti Chakma ka sawm e.

**PU NIHAR KANTI CHAKMA:** Pu Speaker, ka lawm e. Vawiinah Minister pahnih zahawm tak te demand hi kan sawi ho mek a ni a. Pu Speaker, session apiangah mahni biala harsatna hrang hrang kan sawi chhuak thin a ni a. Vawiinah pawh ka bial chhunga harsatna kan neih ka sawi leh dawn a ni. Minister zahawm takin khawngaih takin min chhinchhiah sak thei se ka duh khawp mai a.

Demand No. 19 - Local Administration Department chungchang a sawi ka duh chu, ka bial Khojoisuri-ah VC member pasarih lai awm thin kha, inthlan hnuhnung berah khan panga chauh a awm tawh a, hei hi pawi ka ti hle a.

Kan hriat angin, Lushai Hills Village Council Act, 1953, Section 3-ah chiang takin a hrilhfiah a. A hma khan 7 a awm thei a, inthlan hnuhnung ber atang khan 5 chauh dah a ni ta a, he mi chungchangah hian ka vui a ni.

Revision tih that a ni lo-ah ka ngai a, ka hriat sual loh chuan Khojoisuri total population chu 3,690 a ni a, Mipa 1,854 leh hmeichhia 1,836 an niin, household 738 lai an ni a. Chuti a nih chuan pasarih ni ngei ngei tur a ni a, chuvangin revision hi an tidik lo ka ti a ni. Job Card holder te pawh 667 lai an ni ve a, polling Station pawh 2 lai a awm ve a ni. Chuvangin, Minister zahawm tak hian hei hi min chhinchhiah sak se, inthlan leh hunah chuan pasarih dah ni se kan duh khawp mai.

Chumi rual chuan, *delimitation* vangin ka bialah hian harsatna hrang hrang kan tawk nasa em em a, hei hi ka sawina chhan chu Thanzamasora leh Sedailui chungchang vang hi a ni a. MLA inthlan laiin ka bialah an dah a, mahse he veng pahnih Sedailui leh Thanzamasora hi Lungrang Village Council hnuiah dah an ni a, Lungrang chu Lunglei South bialah a awm ta a ni. A hma pawhin Pu Zodintluanga pawhin chutiang problem chu an nei ve thin a ni. Sumaisuri delimitation lai khan, MLA inthlan laiin an bialah an dah a. Mahse Puankhai Village Council hnuiah an dah bawk si a. Puankhai chu ka bial chhung a ni bawk si a. A hnuah VC hran pek niin problem chu kan ching fel thei ta a ni. He veng pahnihte hi MLA laiin an inpawt ve thin a, Village Council-ah Lunglei South bialah a awm bawk si a. Chuvangin, kan Minister zahawm tak hian he problem hi ngun takin min ngaihtuahsak thei se ka duh khawp mai.

Food, Civil Supplies & Consumer Affairs chungchangah tawi tea ka han sawi duh chu, kan Minister a fel hle mai a, Covid lai pawhin buhfaiah harsatna awm lovin, tun thlengin tha takin kan kal chho thei a. Mahse thil pakhat ka han sawi duh chu ka bial pumpuia retailer hian mipui chan tur buhfai hi dik takin sem se kan duh a ni. Complain pawh vawi tam tak thehluh tawh a, mahse action lak a ni ngai reng reng lova, hei hi a dik takin, dan angin sem se ka duh ber a, retailer thenkhat chuan an sem tha lo em em a, pawi pawh ka ti khawp mai. Buhfaiah a awm loh chuan mi rethei te tan harsatna a thlen zual thin tih kan hre vek a, Minister zahawm tak hian hei hi min lo chhinchhiah sak se ka duh hle mai. Tin, Tlabung hi Supply Inspector-in a enkawl a. A quarter hi a chhe em em mai a, hei hi min siamthat sak theih chuan ka lawm khawp ang.

Demand No. 31 - Agriculture lamah lut ve thung ila. Kan hriat angin Mizoram hi tun thlengin ei leh barah hian kan la intodelh lo va, economic survey-ah pawh kan intodelh lohzia chu a lang chiang em em a, nasa lehzuala tan lak a ngai a ni. Ka bial hi potential area a ni a, chuti chungin harsatna hrang hrang kan nei a. Indo-Bangladesh Border Fencingah

leivung pahna mumal taka siam a ni si lo va, hei hian leilet tam tak a ti chhe thin a, leilet engzat nge a tih chhiata hectare engzat nge tih hi Agriculture Department hian lo en se ka ti khawp mai. Fencing avang hian hmun hrang hranga leilet te water-logged anih phah a ni. He House zahawm takah pawh hian vawi tam tak ka sawi lang tawh a, mahse sorkar hian hma a la lo reng reng hi a pawi ka ti a ni. Mahni ram ngei an tichhia a, sawi ve bawk thin mah ila ngaihsak a hlawh lo hi a pawi ka ti hle. Ka bialah hian potential area hectare 450 kan nei ve a, Mizoram kan intodelh theilo anih pawhin, ka bial chhungah tal hi chuan kan intodelh thei a ni.

Oil palm chin kan ti a, kan fail a, kei pawhin tha tura ka ngaih avangin tam tak ka ching ve a, mahse engmah hlawkna a awm lo a ni. A kung kih pawh tum ila kih hleih theih pawh a ni tawh lova, heng vang hian farmer-ten harsatna an tawk nasa hle a. Chuvangin Agriculture Department hian kan thil chin tur a hmuna zirin ngun takin ngaihtuahna nei se tih kha kan Minister zahawm tak hian min hriatsak se ka duh khawp mai.

Member zahawm tak takte thusawi kan ngaithla a, intodelh turin kan Minister zahawm takin hma a la a, tractor leh power tiller te pawh hmun hrang hrangah an sem a ni. Mahse ka bialah pakhat pawh kan dawng ve lo hi a pawi ka ti a. Tun financial year-ah hian khawngaih takin ka bialah hian min sem ve thei se ka duh khawp mai. Pu Speaker, chu zawng chu ka sawi theih ni se. Ka lawm e.

**SPEAKER** : I hun pawh i hmang zo lo a, i ti tha e. Tunah tunge sawi leh ang? Pu C. Lalmuanpuia, Member zahawm tak aw.

**PU C. LALMUANPUIA** : Pu Speaker, ka lawm e. Vawiinah kan Minister zahawm tak tak, Pu K. Lalrinliana leh Pu C. Lalrinsanga te demand kan sawi thei hi ka lawm hle a. Hun tha min petu Pathian hnenah lawmthu ka sawi a ni. Sawi tur a tam khawp mai a, mahse kan sawi vek sengin ka hre lo va, tawi tea han sawi ka tum ang a. Demand No. 17 - Food, Civil Supplies & Consumer Affairs hi han sawi hmasak ber ka duh a.

Member zahawm tak takte khan an sawi tawh hlawm a, Covid-19 hri leng karah he department hian kan mipuiteah hmalakna pawimawh tak tak a nei a. Harsatna tinreng, Covid-19 in min tihbui dan leh kawng engkim maia harsatna kan tawh karah pawh buhfai nghei miah lo leh gas-te nghei miah lo tura tan an han la te kha a hluin a lawmawm hlein ka hria. Tin, buhfai phei chu a thlawna sem a ni hial kha an chhuanawm ka ti a. A Minister zahawm tak leh kan Chief Minister zahawm takin he department hi a ngai pawimawh em em a, mipuite innghahna pawimawh tak, mipuite ngheng hnai bik a ni a, hengah hian lawmawm ka ti khawp mai.

Tin, Pu Speaker, tihtur tam tak karah kan kudam-te a lo chhia a, hmalakna tur tam tak karah pawh sak that an ni hi a lawmawm hlein ka hria a. Furpui thleng ram kan ni a kan ram hi. Ruah leh thli ten min nuai fo a, kan kudam te a him that loh chuan buhfai te a lo nan

chhia a. Chutiang kara him taka a awm theihna turin a chhe tawh te sak that a ni hi a lawmawm hlein ka hria a ni.

Tin, Gas chungchangah hian Pu Speaker, kan indaihlo em em thin kha a ni a, tunhnaiah kan han indaih thar ta viau te hi kan Minister zahawm tak hmalakna a ni a. Tin, Mualkhangga gas bottling plant-te pawh tilian tur a hmalakna chak tak a kal mek hi a lawmawm ka ti a. He Department hian mipuite thla a timuang hle a ni tih kha kan sawi hmasa duh a ni.

Tin, Consumer Affairs chungchang pawh hi tawi tea sawi ka duh a. Consumer Affairs hi a pawimawh khawp mai a, district tinah hian consumer forum-te hi awm thei se la a tha hlein ka hria a, consumer ten an chanvo an chang em tih hi ngaiantuah ngaiin ka hria a ni. State level-ah hian a function thani ka hria a, amaherawhchu hei pawh hi duhthusam lohna lai te pawh a la awm maithei a. Consumer lamah hian district tinte pawh kan tan a tulin ka hria a. Helai erawh hi chu ka sawi lang duh a, kan Minister khan min lo chhinchhiah sak se, Consumer Forum hi district tinah hian dahtheih ni ve se la chuan a lawmawm ngawt ang tih kha kan sawi lang duh a ni.

Tin, Demand No. 19 - Local Administration Department hi, an hmalakna a lawmawm khawp mai a. VC-te kan nei a, VC house eng emaw zat sak that a ni te kha a lawmawm khawp mai a. VC-te hi an pawimawh em em mai a, kan khawtlang roreltute an ni a. An rorelna In tur ber VC House a chhiat chuan rorel te pawh a khaihlak thei a. Khang thuam thatna leh eng emaw zat sak that ngai sak that a ni kha a lawmawm ka ti khawp mai.

Han sawi tel hram duh ka neih chu VC-te hi an hah em em mai a, department zawng zawng hian an va tibuai emaw tih tur a ni a. Chutih laiin an lawmman hi ka vei deuh thin a, tun dinhmunah chuan VC-te lawmman han san dawrh erawh chu a har maithei a, an lawman zah tur enthat theih hun hi a nghahhlehawm hlein ka hria a. An hnathawh han en hi chuan an thawk nasa em em mai a, zokhaw lam unaute an hah em em mai a, an lawmman erawh chu a beitham khawp mai tih erawh hi chu kan hriat a thani ka hria. Amaherawhchu tun dinhmun vut vutah chuan a harsat te pawh ka ring a, hun lo kal zel turah erawh hi chuan hengte hi ennawn hun te hi awm sela a lawmawm ngawt ang tih te kan sawi lang tel duh a ni.

Demand No. 35 - Fisheries Department hi an thawkrim khawp mai a, an ti tha ka ti a. Kan ngaihhlut deuh pakhat chu, Pu Speaker, Mizoram lvia sanghate dil a khawi theih tura enchhinna an neite kha a tha riauin ka hria a. Fisheries Department ten Zobawk Farmah hian nghahrah breeding an nei a, heta enchhinna an nei te hi a hlu ka ti a, a lawmawm ka ti a. Lengpuiah nghaphusen, lengphar te an han enchhin bawk a, heng kan lui dunga awm sanghate hetianga vulh theih tura dil pangaia an tithei anih ngat chuan tha dawnin ka hria a, a tui pawh hi a tui a ni.

Tlem han thawh belh ve duh ka nei a. Nghahrah, nghaphusen leh lengphar te piah lamah hian Mizoram-ah hian luipui, Chhim luang leh Hmar luang kan neih te ah hian sangha tui tak tak nghanut leh nghavang te kan nei a, hengte hi tih ve chi em aw ka hre lo a, a enchhin theih chuan kan Mizo sangha tui te an ni a. Sangha hi a hrisel em em mai a han ei teuh pawh hian vawksa ei nen hi chuan a inang lo a ni. Khawvel pawhin an ngaihsan a ni a, sangha hi chu. Chuvang chuan a tih theih dan kawng a awm chuan tuna nghahrah te, nghaphusen leh lengphar te mai bakah hian nghanut leh nghavang te pawh kha enchhin theih dan kawng a awm em aw tih kan Minister in min lo chhinchhiah sak se la, kha kha ka request tel duh a ni.

Tin, sangha humhalh te pawh hi kan buaipui nasa khawp mai a. Kan lui dung sangha chhim leh hmara luang te tunah hian kan humhalh tan a. Nichina ka rawn sawi ang khan nghanut leh nghavang te pawh kan humhalh nasa a ni tunah hian. Tin, YMA leh NGO-te pawn an humhalh a a hmuhnawm em em a, chaw han pek te hian a hmuhnawm hi ka ti khawp a, an lawmawm ka ti a. Amaherawhchu hetia humhalh ringawt lo hian a man hun te pawh hi siam ve ta i la, chutah chuan darkar khatah bithliah te neiin, a lian chuti zat chu man theih a ni tiin emaw, humhalh ringawt lo hian a man hun te hi han siam thei se la, chhiah han lakluh nan te hian a tha khawpin ka ring a. Len leh nghakuai te inchiahsaka intihsiakna te hi han awm thei se la a nuam ngawtin ka ring a. Kan thalaite leh heti lam a tui mite tan pawh weekend hman paha intihlim nan a tha dawn riauin ka hria a, chungte pawh chu Fisheries Department tan a phurawmin ka hria a.

Tin, sangha hrim hrim hi nichina ka sawi tawh ang khan sa hrisel a ni a, sangha ei tam hi kan inzirtir a thain ka hria a. Tunlaiah kan awl tawh a, kan ei a tha si a, stroke tih te a tam em em a. Hengte pawh hi sangha kan eitam chuan min veng theiin ka ring a ni. Chu chu Pu Speaker, kan sawi ta deuh duah a nih chu.

Demand 31 - Agriculture-ah hian han lut ve leh i la. Agriculture Department hmalakna hriat a nuam em em a. Covid-19 kan sawi lo thei lo a, min chim nasa a. Heng karah pawh leilet neite a thlawna lei in han lehsak te kha a ropui ka ti a. Buh hi kan intodelh a tul a, kan Chief Minister zahawm tak pawh hian a vei em em a, buh leh bal a intodelh hi. Chumi tihlawhtling thei tura kan Minister zahawm takin hma lain a hmunah te a kal a, a hmel han hmuhte hi a nuam khawp mai a. Hmalakna kawng hrang hrang tunah pawh hmuh tur a awm a. Kan buh thar chhuah te, Supply Department nen khan a la inzawm zel a, nikum vela an han inleisak te kha a ri kha hriat a nuam ka ti a. Kan buh tharte Supply Department-in eng emaw zat a han leisak te kha kan loneitu leh kuthnathawkku te tan a lawmawm hlein ka hria a ni.

Agriculture Department hnuaih hian leilehna tur hmanrua kawng hrang hranga pek an ni te, tractor, leilehna hmanrua hrang hrang te kuthnathawkte subsidy-in an han pe te hi ngaihthlak a nuam a, kan hmabak hi a ti eng hlein ka hria a. Mizo mipuite hi nuai sawm kan pel ve det chauh a, kumin hi chhiarpui kum te a lo ni chho leh dawn mek a. Kan la tam

lo em em a, state dangte ngaihtuah chuan, intodelh hi a harin ka ring lova. Chuvang chuan a theihna kawng kawnga tan kan lak hi a tulin ka hria a.

Agriculture hnuai ah hian tuilakna tur pipe an sem hi a hlu hlein ka hria a. Tin, tui dahkhawlna tur tanky an han siam a ka bialah pawh kan han dawng hlwm a. Tangkai takin kan hmang a, a lawmawmin a thlamuanthlak khawp mai.

Demand No. 47- Irrigation & Water Resources hi ka han sawi leh ang a. Loneitute hlawhtlinna atan tui kan mamawh a. (...*Warning Bell*...) Pu Speaker, ka sawi zo tep e.

Sawi tur tam hle mahse ka duhtawk mai dawn ang a. Irrigation & Water Resources te hmalakna hi a lawmawm hle mai a, nasa zawka hma la zel tur pawhin ka chah duh a. Thlai thar tam zawk kan neih theihna tura Irrigation & Water Resources hmalaknate hi a chhuanawm ka ti khawp mai.

A tawp berah chuan heng kan Minister zahawm tak tak te pahnih - Pu K. Lalrinliana leh Pu C. Lalrinsanga te demand hi ka rawn thlawp a, pass ngei turin ka rawn ngen pui a ni e. Ka lawm e.

**SPEAKER** : Tunge sawi leh dawn? Pu Lawmawma Tochhawng ilo sawm ang.

**PU LAWMAWMA TOCHHAWNG:** Pu Speaker, ka lawm e. Demand No. 17 - Food, Civil Supplies & Consumers Affairs-ah hian lut nghal ila.

He department hmalakna hi kan ram mipui tan hian a lawmawm thlawt a ni. Covid-19 hrileng karah pawh khan hmun kilkhawr berah pawh buhfai a fur a thalin kan hmuh mai bakah man tlawm zawka lak theihin an siam a. A changtu Minister leh department-a thawktute hian engtin nge maw an tih theih zawk le tih mai tur a ni. Gas-ah kan hnianghnar te hi a lawmawm em em a, sorkar hmasa ngai lova kan awm te hi a nuam ve hrim hrim a ni.

Tunah hian LPG bottling plant siamna turin Bairabi-ah hmalak a ni leh te hi a lawmawm hle mai, a hlawhtlin hun a nghahhlelhawm hle a ni. Tunhma deuh te khan tih nachang lo hria se chuan ram mipuite tan a that dawn tehlul nen. Thildang tam tak an lo ruahman thinah khan hei hi chu an lo ruahman thelh deuh anih ka ring a, a pawi ka ti khawp mai. LPG home delivery kalpui tan a ni hi a ropui khawp mai, mipuite chhawk zangkhaina tur a ni a, Lunglei mipui pawhin kan nghakhlel khawp mai, Pu Speaker. PMGSY hnuia chhungkaw harsa zual tan a thlawna thlatin pakhat zel pek tura ruahmannna te hi alo awm leh nghal emaw ni? A dawngtu tur tan chanchin tha a ni thlawt mai.

Mizoram khaw hrang hrang khaw 10-a kudam sak a ni ta te hi, he department hian an mawhphurhna an hriain an hlenchhuahna kawngah an vuaicha lo hle tih a tarlang a. NABARD Loan atanga vaibelchhe 66.75 te hi hmuh anih hunah chuan Pu Speaker, kan Minister te hian Lunglei DCSO Office hlui lutuk tawh saw min rawn hre reng se tih hi kan Minister zahawm tak ka han ngen nghal bawk a ni. Manipur leh Tripura atanga LPG leh POL lakluhnna tura kalpui mek te hi thil tha, kan la chhawr em em tur a ni a. Thil lawmawm tak a ni.

Demand No. 35 - Fisheries Department hi sawi leh ila. Department lian nia ngaih ni silo nuaih 83 chuang zet sorkara a chhunglut thei hi a entawn tlak khawpin ka hria. Kan ram lui sangha khawi pun theihna tur atana hmjak hi thil tha a ni. Nghahrah, nghatun, nghavang puitling hmuh tur kan ramin kan nei ta mang lova, hei hi a veiawm khawpin ka hria a. Kan ram lui eng emaw zat hi lui thi, nungcha awm lohna lui a ni ta hi a pawi khawp mai a, a pawi zia hi nasa leh zuala he department atang pawha in zirtir hi a tul khawpin ka hria. Sangha-a kan intodelh theihna tura tul em em sangha note chi tha ngei kan neih theihna tura hatchery thar siamna tur te, fingerlings rearing pond thar tur hectare eng emaw zat ruahmanna awm te leh, a chithlahtu tur brooder bank siamna tur atana inbuatsaihna te hi ram tana tha, chhawr nahawm tak tur a ni a, a lawmawm ka ti hle a ni.

Sangha note chi ringawt hian kan thenawm Assam state-te pawh mi lianah an insiam a, Kolkata leh Delhi-ah te flat nei thei khawpin an insiam a ni. Bel an kawh nel nela an ben kawrh kawrh thin atang hian chutiang chu thil awm thei a ni. Kan ram pawisa sangha note leina atana luangchhuak ringawt pawh hi uihawm tham tak a ni. Chutiang te chu kan pumpelh thuai theih beisei ila.

Demand No. 19 - LAD hnuiaia hmjakna, VC zawng zawngte nena thawhhona ram tan a hlawk em em a, a bikin thingtlang lam tan a hlu lehzualin ka hria. Lunglei-ah sawn LAD hnuiah Park pahnih/pathum kan nei a, heng atang hian kum tin sorkarah sum chhunluh ve thin a ni. Tlawngchnara Zobawk, Lunglei District Park SEDP sum atanga kan Chief Minister zahawm takin a cheibawl na tur min pek atanga kan cheibawl mek te, Lunglei Children Park, Chanmari a awm te, kan Hnampa, Pu Laldenga Park, Pukpui te saw nasa zawka cheithat ni se chuan sorkar tan sum lakluhnna alo ni ang a, hlohna aiin hlawkna a ni dawn si a; min rawn ngaihpawimawh sak thei se kan duh hle a ni.

Demand No. 37 - Cooperation Department hi sawi leh lawk ka duh a. He department pawimawh tak, kan rama a hlutna leh tangkaina anga kan hmang lo hi kan ram thanmawh bawk lian tak a ni em aw ka ti thin. Department hrang hrangah kan thahnemngaihna ang angin kan phu suau suau mai a, eng emaw zawng phei chuan a insubuai lek lek thin a ni. He department hian fel taka khaikhwmin an hnuiaia society hrang hrangte hmjak dan tur te ruahmanpuia, a intahawl dan tur te sawi hova rel fel ni thin se chuan kan hlawkpui lehzual awm mang e. He department hnuiah hian loneitu lam society te, thlai lam society te, sangha lam society te an awm vek a, industry pawh an awm tho a ni.

Vety Department hnuiah vawk leh ar vulhte han kalpui dawn ila, a tel lova awm theih miah loh chu a chawmna tur a chaw a ni; chu chu Agriculture leh Horticulture lam ten an lo buaipui leh a. Mahse ar note lak hun te, a than nan a chaw tur te, a tui lai chaw tur te pek tur khan hmalakna hi a inkhuangrual thin lova, a inhne rem thei lo a ni. Kan ramin kan tih theih ve ngei siah hian ruahmanna mumal tak awm lo, thawhhona leh inpawhtawnna awm loh vanga kan harsatna niin ka hria a. Cooperation tha zawk hi awm sela chuan hlawhtlinna sang zawk kan hmuh ka beisei khawp mai.

Tun hnaiah he department hnuia mi, Van Dhan Mission hnuia khawl hrang hrang society ten an dawn kha a lawmawm hle mai a. Tunah hian Lunglei ah sawn Aieng, Sunhlu leh Vaimim te kan her thei ta a, kan tangkaipui khawp maia, lawmawm kan ti takzet zet a ni.

Pu Speaker, Demand No. 31 - Agriculture Department hi han sawi leh ila. He department hi ‘Kaina leh Abela’ te hun lai atanga intan tawh a ni a, a upa tawh khawp mai, kan Bible-ah kan hmuh kha; ram tana tangkai, tul leh mamawh em em, ram dinchhuah leh tlukchhiatna hril pha a ni. Enkawl hi a harsa ngial a ni ang, pipute hun laia kan intodelh bak kha ‘kan intodelh ta’ tia sawi tur hi kan nei manglo a ni. A englai ber hi nge kan mutan ni ang aw ka ti thin. Ram tha tak, thlai engkim thar theihna kan nei a, thawktu ni se hnam taima, thawh hlawh leh hlawkna a awm tih hriat tawh chuan engmah thawh hreh neilo Mizo hnam kan ni a. He department-ah hian sum vaibelchhe engzat tak luangliam tawh ang maw? A englai hi nge kan mutan ni ang le? Tunah Minister zahawm tak Pu Sangtea hovin kan bei leh dawn a. Ani hi mi taima, a hmun ngeia hnathawh tur ena fehchhuak ngat ngat peih mi a ni a. Nikum lamah Covid-19 hri avangin duh thala hnathawh theih a ni lo chungin Minister zahawm tak leh a department te hmachhawp leh thawh mekte hi ram tan beiseina sang tak a awmin ka hria.

NABARD fund atanga leilet hectare 484.67 laih na turte, NABARD fund bawk hmun 8 laia warehouse sak tura ruahman mek te, Hnahthial ITC school, School of Agriculture-a upgrade tak te, bio-fertilizer organic leitha siamna tura hmalak mekte Pu Speaker, khawngaih takin ka zo tep e. Tunah Neibawi-ah he bio-fertilizer siamna tur hi a building sak a ni a, sak zawh thuai beisei a niin ka hria a, farmer-te tan tangkai tak tur thlai thianghlim, damdawi chhia tello tharchhuah theihna tur a ni a, a nghahhlelhawm khawp mai. Thlai chi tha kan neihna tur, a seed related district tina awm tura hmalakna te hi a nghahhlelhawm khawp mai a. Vairam atanga lo chhuak kan han ching a, kuminah ngei pawh kei pawhin ka experience a, kan lak lo to ta miahlo, ava han beidawn tlak em! Chutiang te chu kan pumpelh theih a beisei awm a ni.

A tawp berah chuan, Pu Speaker, Demand No.47 - Irrigation Department hi tawite han sawi leh ka duh a. He department *special assistance* hnuia sum hmuh nuai 284 hmanga hmalak mek hian ram pumah thlai thar a tihpun kan beisei a. NABARD sum nuai 227.5 hmanga Serchhip Chawmzam-a leihnuai tui pump chhuah, anih hunah chuan, buh leh thlai

thar tam zawk tharchhuah a beisei awm. Solar pump hmanga hmalakna hian tunah hian Lunglei Phairuangkai velah chuan MLA zahawm tak Pu Mama bial a ni a, hei hi. Tunah hian rah duhawm tak a chhuah mek a, thalva-ekchar-ah pawh hian thlai chi hrang hrang an tharchhuak tawh a, cheng sing tam an hrall tawh der a ni, thil lawmawm tak a ni.

Chuvangin, Pu Speaker, beiseina reng neilo te anga awm lovin, leh mipui zirtir bawk lovin beiseina nen hmalam thlirin heng Minister zahawm tak tak 2-te demand hi thlawpin, ‘I pawm ang u’ tiin kan insawm a ni e. Ka lawm e.

**SPEAKER** : Member zahawm tak Pu Zothantluanga, chumi zawahh Pu KT Rokhaw lo inring se.

**PU ZOTHANTLUANGA** : Pu Speaker, ka lawm e. Vawiinah kan Minister zahawm tak tak te Pu K. Lalrinliana leh Pu C. Lalrinsanga te Demand sawihona hun tha tak kan nei a, a lawmawm hle mai a. Demand No.17 - Food, Civil Supplies & Consumer Affairs hi han sawi hmasa ila.

Ni e, Covid kan hria a, nikumah covid avangin Mizoram kan buai em em a, nasa takin harsatna min thlen a. Lockdown te a ngai a, tin, essential commodities lo lut tur pawhin vai driver screening te an ngai a. Chutianga hlauhawm, an tana hreawm ni si harsatna karah pawh supply tha takin a kal a, buh leh bal kan mamawh zawng zawng harsatna em em awm lova kan awmna chhan kha kan Minister inpekna a ni a.

Bairabi-ah buhfai a thleng a, wagon atangin, a loading leh unloading titu labour hnam dangte covid avangin an tlanchhia a, a ti tur pawh kan hmu mang lo a ni. Tichuan, labour an hmuh ang ang ten tunhmaa an tih ang rate-in ti thei lovin rate sang zawk an phut a. Kan Minister zahawm takin ama mimal sum, an tihtonaa thawh belha load te la-in, ‘Mizoram kan tam anga, Mizoram-in eitur kan neilo anga tih hlauh avangin khatiang khan hma ala a ni tih kan hriatin, a ropui ka ti a. Chuvang chuan, vawiin niah hian fak lo thei niin ka hre lova.

Tin, tun sorkar-ah hian kudam 10 sak that a ni tawh a, tunah hian 21 sak mek a ni bawk a. Tin, a dang pawh sak tura la ruahman chhoh mek zel a ni. Kan hria a, Mizoram chu fur chhungin buhfai a stock loh theih loh a, kan kudam te a thatloh avangin damage tam tak a awm a, chu chuan buhfai kan ei leh bar ruahmannaa harsatna min thlen fo a ni. Kudam chhiat avanga buhfai chhia te, tin, chumi kara eirukna lo awm thin te pawh hi nasa takin kudam tha, kudam him, buhfai chhiatlohn tur atana ruahmannaa siam hi sorkar ang pawhin, ram mipui ang pawha hlawkna nasa tak kan chan tur niin ka hria.

Chuvang chuan, a ropuiin a lawmawm ka ti a. Khami bakah khan kum hmasa lamah khan mizo tena an tharchhuah a rem ang ang buhfai an han lei ve te kha a tih zawngchhang thlak hlein ka hria a. Khami avang khan kan kawt kaiah buhfai kan thar te kan hrall thei

anih chuan, mizote hi kan thawh a ahlawk phawt chuan thawk peihlo kan awm lo. Chuvang chuan, hemi avang pawh hian kan buhfai leina atang hian hmasawnna kan hmu ang a, kan production pawh alo pung ngei ang tih ka ring a, ka beisei a ni.

Tin, Demand No. 35 - Fisheries-ah hian han lut leh ta ila. Tun hma deuh khan vur sangha kan ei deuh ber a. mahse eng emaw lai khan formaline pawlh nasat lutuk avangin, a uih lohna, a rimchhiat lohna tur atana damdawia kha tur anga a thawhna a awm nia hriat anih avang khan vur sangha eiloh kan tum nasa mai a. Tichuan, local, keimahni tharchhuah ei intihhmuhnaah khan kan kal chho a. Tichuan, a hrisel zawk bawk a ni tih hriatna nen tuikhuah sangha khawiah hma kan sawn a. Kan thian ten an sawi tawh ang khan, hmun hrang hrangah hian sangha khawi kan lo pung zel a, a bik takin khaw thlang lamah phei khu chuan kum khat leh ti-ah an tuikhuah an sah a, quintal 40, quintal 50 hralth tur han nei mai te pawh kan awm chho ta zel a. Tin, kan sa duh ber vawksa te, bawngsa te, arsa te anih lai hian a hriselna lampang ngaihtuah hian tunah chuan sangha hi chawhmeh tha, chawhmeh hrisel nia ngaihna avangin sangha khawi alo pung chho te hi a lawmawm ka ti a.

Tichuan, kan ramah hian potential tam tak ala awm a, thil chi hrang hrang ah hian intodelh vek nih hi a chakawm a. Amaherawh chu sangha-ah hi chuan a harsa lo lehzualin ka ring a, Pu Speaker. Chuvang chuan, vawiinah kan sorkar-in sum leh pai SEDP atang tein alo dah a, sangha chi te alo lei a, major carp te alo lei a, common carp te, tam tak kha kan lo lei a. A pawimawh ber chu, mi rethei tak tak ten kan siam avangin a chaw a hi subsidy-in min pe a, quintal 66,665 vel an lo lei bawk a ni. Amaherawh chu, subsidy chung chung hian a la to khawp mai a thingtlang mi tan, tam zawka a puarna khawp pek kha a harsa a. Hei aia tlawm hian la subsidize thei ila, tin, a pawimawh chu sangha chi dah fuh leh fuhlo hi a ni. Sangha chi tha kan dah chuan tuikhuah sangha khawiah kan hlawhtling ang a, sangha chi thalo kan dah erawh chuan hlawhtlinna a awm lo. Kum 2, kum 3 pawh vulh ila a ngai reng mai a ni. Chutiang ang chu hmun hrang hrangah hian a lo kal fo a, chungah chuan department leh kan Minister-te pawh an fimkhur a tha-in ka ring a.

Tin, a dang lehah chuan Irrigation & Water Resources - Demand No. 47 hi, PMKSY leh *Har khet Kaw Pani* scheme an tih maiah hian minor irrigation project thawh lai 36 lai mai kan lo nei te, tin, project chhunzawm mai tur central assistance atanga nuai 675.35 kan hmuh teah hian thawh tur tam tak kan nei a. Tin, Pu Speaker, ka laklawh khawp mai.

Demand No. 31 - Agriculture hi, hei pawh hi Irrigation nen a kal kawp loh chuan hlawhtlinna tak tak hi a awm lova. Kan leilet te, kan ram leilung a thain a fertile tha a, tui leh leitha a awm phawt chuan hlawhtling thei lo a awm lo. Hemi kawngah pawh hian kan Agriculture hmalakna hi hei aia nasain leh, thingtlang mite pawh kan mithiam ten min kawhhmuh anga kan kal theih chuan ei leh barah pawh hian kan hlawhtling ngei ang tih kha ka ring a. Chuvang chuan, kan Minister pahnih te Demand hi pass pui ngei ang u tih kha ka sawi duh a ni. Ka lawm e.

**SPEAKER** : Ka va han lawm ve. Niminah minute 4-in hun mi pelh tir a, i dawtah Pu KT Rokhaw an minute 4-in a pel bawk a. Hleih nei min ti ang tih ka hlau si a, ka lawm hle mai. A dik chiah leh a tawk chiaha hmang turin Pu KT Rokhaw i lo sawm ang.

**PU K.T. ROKHAW** : Pu Speaker, ka lawm e. Pu Speaker, vawiina kan Minister te chan Agriculture leh Food & Civil Supplies hi Mizoram mipuite tan a pawimawh ber department a niin ka hria a. A hmasa a ka sawi duh chu, Demand No.31-na Agriculture hi a ni a.

Kan Minister zahawm tak Pu Lalrinsanga hi tun kum hnii chhunga a hmalakna atang hian theihtawp a chhuah a ni tih hi a hriattheihin ka hria a. District danga a hmalakna hi chu ka sawi lo mai ang a. Siaha District-ah hian leilettute tan tractor panga lai min pe a, kan lawm hle a ni. Tin, chu bakah Tanky siamna Harvesting Structure leh Secondary Storage Structure te Ruling leh Opposition bial thlei bik nei miah lovin min pe hlawm a, a chungah hian kan lawm takzet a ni tih ka sawi hmasa duh a.

Tin, kum hnii kal ta khan Pu Speaker, Siaha District Food Security Consultative Committee kan din a, chairman atan Siaha bialtu Minister Dr. K. Beichhua ruat a ni a, Vice Chairman atan kei leh kan CEM, Mara Autonomous District Council, Pu N. Zakhai kan ni a. Member Secretary atan Siaha District DC ruat a ni. Tin, Department Head zawng zawng hi member kan ni bawk a ni.

Pu Speaker, he Committee-in a tum ber chu Siaha District hi engtin nge ei leh bar ah kan intodelh theih ang tih hi a ni a. He Committee hian Siaha District chhungah khaw tam tak kan tlawh chhuak vek a, ei leh inah kan intodelh a pawimawh zia te mipui hnенah theihtawpin kan sawi a, tin, thlai ching thei apiang thlai ching turin kan ti a, vaimin ching thei apiang vaimim ching turin kan ti a, chutiang tho chuan buh ching thei apiangin buh ching turin. Tin, chin tur nei lote erawh chu kan ngaihtuah sak ang kan ti a, kan ngaihtuah sak bawk a. Vaimim pawh hi quintal za chuang a chi tur kan pe a, buh chi pawh a chin tur nei lo te kan pe bawk a ni. Thlai chi pawh a then chu kan pe tel bawk a ni.

Tin, he Committee hian leilet neitute retheihna avanga leilet lai theilote tan JCB kan hire sak a, nikum khan hectare 144 kan laih sak a ni, Pu Speaker. Kumin hi a theih chuan Siaha District-a leilet hectare 300 vel hi chu lai thei tur ah kanin beisei a ni. Pu Speaker, kum hmasa 2019-2020 aiin buh, vaimim leh thlai dang pawh kan thar tam zawk fe a ni tih he House hi hrilh ka duh a ni.

Tin, Siaha District hian potential area tha tak kan nei a, kan Agriculture Minister hian vawikhat chu min rawn tlawh ve hram se tih ka ngen duh bawk a ni. Tin, Siaha District-ah chuan Opposition emaw Ruling emaw inthliarna awm lovin lungrual takin ei leh barah kan intodelh theihna turin hma kan la a ni tih kha Pu Speaker, ka han sawi duh a ni.

Tin Irrigation - Demand No. 47 hi tlem han sawi leh ka duh a. Siaha District-ah hian leilet nei si leilet chawmtu tur tui lakna tur neih loh avanga leilet siamthei lote an awm nual a. Chuvang chuan kan Minister zahawm tak hian Phura zawl te, Sala zawl te, Siasi zawl te hi tui kawng an neih that loh avanga leilet siam thei lo te hi min ngaihpawimawhsak turin ka ngen bawk a ni.

Demand No. 37 - Co-operation hi tlem han sawi lan ka duh chu, ka biala Zero-point khua hi Siaha thlen hmaa awm ni a. He khua hi Lawngtlai, Siaha leh Tipa kawngte intawhkhawmna a ni a, hetah hian engpawh ni se Apex Bank min dahsak thei se a lawmawm hle ang.

Tin, Pu Speaker, Demand No. 17 - Supply hi, kan Minister zahawm tak khan nikum khan Siaha District-ah Supply kudam pahnih min sak sak a, kan lawm hle a ni. Hmanni khan NABARD atanga kudam sak tharna tur pawisa an hmu dawn a ni tih he House kha a hrilh a, khawngaihin hetah hian ka kudam sawite hi min ngaihpawimawh sak ve hram se la tih ka ngen duh a. Khawngaihin Phura, Tokolo, Lopu, Siata leh Chapi kudam te hi a chhe tawh lutuk a, he pawisa atang hian min sak sak turin ka ngen duh bawk a ni.

Tin, Pu Speaker, DCSO quarter hi Siaha-ah tun thleng hian kan la nei lo a. DCSO hi Officer lian a ni a, hmun dang Champhai, Aizawl, Lunglei atang tea DCSO an rawn dah tharte hian quarter luah tur an nei thin lova, in luah tur zawn chawp a ngai thin a a buaithlak thin khawp mai a, engpawh nise kumin hi chuan a thar min sak sak hram se tiin kan Minister ka ngen duh bawk a ni.

Tin, Pu Speaker, a tawpnaah chuan National Highway-54 tunah hian laih mek a ni a, Aizawl atangin Lunglei, Lunglei atangin Lawngtlai leh Siaha laih mek a ni a. Hei, fur a lo ni tawh mai dawn a, fur a nih chuan motor a kal hlei thei dawn lo a, a nal viau dawn avangin engpawh ni se Lawngtlai, Siaha tih vel saw chu fur tlak hma hian buhfai a tam thei ang bera min stock sak turin ka ngen a ni e. Pu Speaker, ka lawm e.

**SPEAKER** : Member zahawm tak Dr. K. Pachhunga ka sawm e.

**DR. K. PACHHUNGA** : Pu Speaker, ka lawm e. Pathian malsawmnain kumin kan Budget Session kan zo tep a, naktuk hi a ni mai tawh a. Pu Speaker, thil tam tak zir tur a awm a, sap tawngte pawh mak deuh deuh kan zir a nia, a lawmawm khawp mai. Kan Minister zahawm takte pahnih Pu K. Lalrinliana leh Pu C. Lalrinsanga Demand-te sawi a chakawm a. Sawi tur tam tak a awm a. Kan Minister pahnih te hi an hnaah an sincere a, an ti tak zet a, a taka luhchilh, dawhkan atang chauha rorel lo an ni tih a lang chiang a. Chuvang chuan, support a pass ngei pawh kha a chakawmin ka hria a.

Demand No. 17 - Food, Civil Supplies & Consumer Affairs-ah hian kan sawi tam tawh a. Hripui harsatna karah pawh mipuite kan ei bel ber ruak loa buhfai kan rin ber, kan

*staple food* hnianghnar taka min han chhawp te hi a lawmawmin a chhinchhiah tlak a, an fakawm tak zet a. A Minister leh thawktute, Chief Minister te, kan hotu ber ram tana a inpekna a lang chiang em em a ni.

Tin, kan hriat angin gas pawh a hnianghnar a mi zawng zawngin kan hria a. Tin, lirthei a lo tam tawh a, kan veivahna ber a ni a. Chutiangin POL-ah pawh NASA takin harsatna karah kan harsa lutuk lo a. Tin, tun harsatnain a hrinchhuah a stock centre tha te, stock point te, chutiangin gas bottling plant tih len te pawh sawrkarin a ngaihtuah niin kan hria a, a lawmawm ka ti a. Tin, ka bial bikah kudam chhe tawh tak mai khawthlang lam bik Chawngte-ah kudam te min sak sak a, tunah hian an hmang tawh a, kan lawm tak zet a. Tin, Tawipui South-ah kudam chhe lutuk, a bo thei mai anga buhfai pawh tih tur, chutiang chu tunah min sak sak mek a, a lawmawm tak zet a, bial ang pawhin lawmthu kan sawi duh a ni. Tin, Lunglei District kudam hi ka bial chhung Luangmual-ah a awm a. Hei hi a tangkai a, kan ring vek a, a awmna pawh a tha a, a parking vel tlemin fur anih hian a chiau deuh a. Tin, a far bawk a, a thlang a min bawk a, repair te chu han awm ve mahse a lo chhe leh a. Hei hi min ensakin min chhinchhiah sak se tih kha ka han sawi tel duh a ni.

Demand No. 19 - LAD-ah hian, ka bial chhung bikah chuan lawmna deuh mai ka nei a. Kan VC thar te an tha em em mai a, pa tuai te te an ni a. Ei bela hmang lo development awm chhun chhunte khawtlang tan leh veng tan dik taka hmang an ni a, a lawmawm ka ti a. Development hi kan hmu tam emaw, a tlem emaw kan hman dika, tih tak zeta kan hman chuan khawtlangin awm zia a nei a ni tih a rawn lang chiang a. Ka bial a kan VC te chungah pawh lawmthu ka sawi a.

Tin, Minister leh a department kaltlangin house repair te, VC house te pawh min pe dawn niin kan hria a, kan lawm a. Tin, VC House thar sakna 150 ngawt mai a nei dawnin ka hria a, kan mamawh hle mai tih pawh kha min han chhinchhiah sak se ka duh a ni. Chutiangin, 15<sup>th</sup> Finance leh finance dangte development neuh neuh VC-ah a lut tha tan hle mai te hi hmasawnna ropui tak kan Chief Minister, Minister-te leh sawrkar hmalakna a ni a a lawmawm ka ti tak zet a ni. Tin, LAD in a enkawl heng park kan tih neuh neuh hi Lunglei-ah pawh kan nei a, Member zahawm takin an sawi ang khan. Heng park te hi sawrkarin enkawl lovin outsource a hlawhtlin zawk ka ring a. Lunglei-ah pawh Pu Laldenga Park leh District Park te hi outsource ni se la chuan a hlawhtlin ka ring zawk a ni.

Demand No. 35 - Fisheries Department chungchangah kan phur em em a. Nichina member zahawm takin a sawi angin Mizoram Fish Production kha 57% a lo ni hi a lawmawm ka ti a. Intodelh kan tum hle ni pawhin ka hria a. Ka biala fish farmer-te pawh an phur tak zet a. Amaherawh chu, tanpuina neuh neuh kan han chan te hi a la beitham deuh a, CSS te leh SEDP fund te nen convergence-a a tam zawka intanpui dan te hi awm se kan duh tak zet a.

Chutiangin sangha-a intodelh kan tum a, kan lui sangha-te pawh nichina kan ngaihthlak angin tihpun kan tum a. Kan local species, a tui tha te tihpun kan tum te hi a tha tak zet a ni tih kha kan sawi tel duh a. Tin, chakai farm te pawh kan sawi thin a, a tha dawn hlein ka hria a, kan phur tak zet a ni tih kha kan sawi tel duh bawk a ni.

Tin, Demand No. 31 - Agriculture hi, kan hriat angin Agriculture hi kan ei leh bar ber buha intodelh hi a harin ka hria a. Pu Speaker, Lal hun lai khan kan intodelh a, department leh sawrkar anih hnu hian kan intodelh ta lo riau mai a, tanpuina a tam hian kan thatchhe telh telh a, chutih lai chuan bazaaraw awlsam taka leitur a awm bawk nen, chuvang chuan kan intodelh theilo ni te pawhin ka hria a. Nimahsela kan sawrkar-a kan Minister chak tak leh department ten tui em emin a luhchilh a, buhfai thar te pawh a pung zel turah ngai ila, buhthar tih pun nan hectare 484.67 ngawt te laih zauh belh a ni te, tin, link road te pawh siam mek zel a ni a.

Pu Speaker, tunlai pawisa value han en hian link road laih man hi km 1-a nuai 5 hi chu a beitham lutuk a, keini pawh kan bialah kan lai a, lunghmun kan han su a kan chawi belh ti tih dawn tlat a, hei hi tih pun dan te hi a awm em tih kha min han chhinchhiah sak sela.

Tin, ei leh bara intodelh tur chuan a phurh chhuahna a pawimawh a, link road tha a ngai a, chu tih lai chuan a market pawh a ni bawk a, tin, ei leh bara intodelh turin food technology preservation te, packing te pawh a pawimawh takzet a, kha kha kan Minister te leh department te pawhin hma an la niin ka hria.

Tin, vairam atangin thlai chi kan la lut thin a, Mizo thar ngei kan neih theih nan tiin village leh district tina sawrkar hmalaknaa kan han siam te hi a ropui takzet a, hnam intodelhna leh inhumhalhna a ni a, lawmawm ka ti a. Tin, Hnahthialah ITC kan nei thin a, chung te pawh chu upgrade-in School of Agriculture Science, diploma, degree course thleng zir thei tura inbuatsaihna kal mek te hi hmasawnna a tih loh theih loh a ni.

Tin, ka bialah han lut ta ila. Ka bial hi potential nei tha kan ni a, Chhimtuipui Lui te, Mat Lui te, chutiangin Ngengpui Lui leh Ruang Lui te awmna a ni a, Chhimtuipui-ah pawh WRC land formation te, development te pawh kan thawk dawnin ka hria a. Chutiangin ka bial thleng ang, Chhimtuipua channa hring kan tih hi tin 20 hmun zet mai, agriculture hmalaknain tunah a kal mup mup mai a, a hmuhnawm thamin a lawmawm ka ti a, department chungah pawh lawmawm ka ti tak zet a ni. Tin, Thingfal-ah hian Ngengrual Zau a awm a, chutiangin Mualcheng-ah pawh Fenbeh Zau kan tih te, potential kan neih thatna Mamte, Chhimtuipui Zau kan tih te, hengah hian WRC emaw a tul leh rem intih anga mithiamte nen department-in rem intih angin hma min laksak thei ula tih kha Minister-in min chhinchhiah sak thei se ka lawm hle ang tih kha kan sawi duh a.

Tin, Demand No. 47 - Irrigation & Water Resources hi, hei kan hriat angin Member zahawm tak takte pawhin an sawi tawh angin sawrkar hmasain a lo hluihlawn tawh Irrigation Channel Project 97 enkawl chhunzawmna atan cheng nuai 284 hmanga hmalakna te pawh hi a fakawm ka ti a. Tin, farmer ho tui harsatna, kan hriat angin production nei tur chuan eng thlai pawh ching ila, buh pawh ni rawh se, tui a ngai a, chu chu solar pump technology te hmangin hma kan han la te hi a ropui ka ti a, tih zel tlak pawh a ni a, hmasawnna kan hmuh zel ka ring a.

Tin, Serchhip-ah leih nuaia tui pump tum te a ni a, tin, chutiangin ka bial bikah pawh hian han lut leh lawk ila, heng potential kan neih Lunglei bulhnai Thaizawl, Sabual leilet atan hemi irrigation hi a pawimawh em em mai a, tui lak loh chuan a production a tla hniam a, tin a thawkta tan pawh tih ngaihna a awm lo a, irrigation-ah nasa takin prospect kan nei pawhin ka hria a. Kan sawrkar leh kan Minister te pawhin project te nen theih tawp an chhuah ka beisei a.

Tin, Agriculture-ah han let leh lawk ila, production dahna tur warehouse hmun 8-ah ngawt mai tuna sak tura tih a han awm te hi a lawmawm ka ti a. Pu Speaker, hon. Minister pahnih, Pu Rinliana leh Pu Sangtea department chan demand te hi, ram leh hnam hmasawn nan leh kan bial theuh te tana malsawmna alo nih zel theih nan ka support a, pass ngei ni se tiin ka rawn sawi a ni e. Ka lawm e.

**SPEAKER :** Hun i hmang thiam hle mai. Tunah Member zahawm tak Pu Lalrindika Ralte ka sawm leh e.

**PU LALRINDIKA RALTE :** Pu Speaker, ka lawm e. Tawite tea han sawi ve ka duh chu, a hmasa berin Demand No. 35, Fisheries hi. Sangha-ah hian hma kan la a, Minister pawh a phur viau a, mahse ka rilrua alo awmdanah chuan Sangha hi kan buaipui dawn anih chuan, kan ram hian kan mamawh engzat nge ni ang, kan mamawh chu kan phuhru zo ang em tia, a market nena kan hriatsa loha buaipui hi hun kal zel tura tan pawh hian a thalo mai ang em aw, tih ngaihtuahna ka nei a. Sangha hi Andhra Pradesh atang tein a lo kal thin a, Sangha hmunpui Vizag-ah hian ka zuk kal ve tawh a, a hla khawp mai a.

Sangha hi *by-road* in lokal thin a ni bawk a, Andhra Pradesh-a Sangha awmna hmunpui atanga Mizoram lo thleng tur kha ka ngaihtuahin, Sangha a tha ve thei tho si a eng vangin nge kan compete theih loh ang tih kha ka rilruah a awm a. Helaiah kan thar tam tawk anih chuan state dang atanga lokal tur kha chu kan duh leh duh loh a ni mai a, kan khar thei a. Chuvang chuan hei hi mumal deuh hlekin ti ta ila, Sangha-ah pawh hian hlawhtlinna kan neih theih hi ka ring ve tlat a, chu chu kan sawi hmasa duh a ni.

Tin, Demand No. 17 - Food, Civil Supplies & Consumer Affairs hi nichinah pawh kan member thenkhat ten an sawi a. Buhfai buk tlinglo hi a ngaih pawimawh awm khawpin ka hria a, a serious-in ka hria a. Hei hi ka han chhut thuak danah Mizoram pumah hian ration

card holder hi mi 2,75,552 vel bawr (a chiah chiah chu a nilo maihei a) vel chu kan awm a. Buhfai hi a buk a tlinglo a ni tih hi kan hretlang theuh a, chung mi 2,75,552 te chuan kg 2 in lo titling lo tase, a pawisaa ka han chhut hian kal man pawh tel miah lovin nuai 151,44,360/- hi vawikhat quota kan laka a kimlo ringawt a pawisaa chantirin a ni. Tunah hian kg ah ₹27.50/- in buhfai hi kan lei a, chutiang ang rate-a chhut chuan a ni.

Chuvang chuan, hei hi a serious khawpin ka hria a, kan state pawh hi a upa ve tawh a, hman atanga hetianga kan kal reng ringawt laia hi a siam danglam theihin ka ring a. Buhfai buk tlinglo hi eng vangin nge alo awm theih? Buhfai hi kudam-a a luh dawn hian buk vek a ni a, a bag rihna pawh hi minus a ni, a buhfai rihna ngau ngau hi kudam-ah a lut a ni. Chuti chung chuan engtin nge buhfai buk tlinglo hi a awm theih tih laia hi chhuia, mipuite tan pawh helai hi a pawimawh viauin ka hria a, tun aia kan strict deuh zawk pawh hi a tha in ka hria, chu chu kan sawitel duh a. Tin, sum tam tak kan hmanna heng a phurh kual velna pawh hi sorkarin ngun lehzualin en se a thain ka hria a, to uchuak lutuk tein kan lo phur kual em tihte hi en a thain ka hria a ni.

Demand No. 31 - Agriculture hi a pawimawh hlein ka hria a, helamah hian sum dah tam pawh a tha tih te a hmalam pawhin ka lo sawi tawh a. ‘Ram dinchhuahna diktak chu leilung nghahchhan a ni tur a ni’ tih hi a dikan ka hria a. Kan eizawnna tura Pathianin min pek chu leilung hi a ni a, compensation lak vak vakna tura a siam hi chu a nilo tih kan chiang a. Chuvang chuan he leilung hi kan hman tangkai, a bik takin kristian-te phei chuan leilung Pathianin min pek hi kan hman tangkai a pawimawhin ka hria a. Chuvang chuan, Agriculture hi kan uar pawh a thain ka hria a.

Tin, Pathian-in min siam danah hian thawhchhuah ei tura a siam kan ni a, chuvang chuan kan thawhchhuah, leilung Pathian-in min pe a, he leilungah hian malsawmna pawh a dah a. Ka rilruah chuan thlaite kan han ching a, ‘a tam’ kan ti a, eng eng emaw harsatna chihrang hrangte kan sawi thin a, ka rilruah tak chuan he leilung hi Pathianin mal a sawm si chuan Pathian tihna nen, huan kan siam anih pawhin, leilet kan siam anih pawhin Pathian hre telin siam ila, Pathian-in mal a sawm ngei ngeiin ka ring a. Kan hnathawh rah hi rinawm taka kan thawk anih chuan he leilung atang hian Pathian hian mal min sawm ka ring a. Chu chu kan kaldan tur atan pawh hian a thain ka ring a. Kan ram mipuite pawh hian kut hna kan thawk anih pawhin Pathian hre chunga kut hna kan thawha, rinawm taka kan thawh chuan he leilung leh kan thlai hian kan tan malsawmna a thlen ngei ang tih ka ring a, chungte chu kan sawi ve duh a ni e. Ka lawm e.

**SPEAKER** : Member zahawm tak Pu Andrew H. Thangliana tunah ka sawm e.

**PU ANDREW H. THANGLIANA:** Pu Speaker, ka lawm e. Vawiina kan Minister zahawm tak takte Pu C. Lalrinsanga leh Pu K. Lalrinliana Demand-te kan sawi

chungchangah hian ka han en mai mai a, an department chan theuha te hi department chan awm tak, inhne tlat niin ka hria a.

Demand No. 31 - Agriculture Department te, Irrigation, Fisheries han tih ang chi te, keima duh thusamah phei chuan Horticulture te hi a tu emaw zawk zawkte hi chuan han chang tel phei se chuan, hei, a thut pawh an thudun a, an in-close deuh bikin ka ring a, han inrawn zung zungah pawh thil a awlsam phah lehzualin ka ring deuh a. He mite thil hi central scheme ang chi department hrang hranga han divert a ngaih pawha Agriculture te, Irrigation te khatiang anga kalkawp theite an nih avang khan, an department chan pawh hi a felin a tha tih kha kan sawi hmasa duh a.

A bik takin kan ram intodelhna lampang, department kan intodelh ve theihna Agriculture te, Fisheries lam te a rawn lang nuaih a, kan buaipui em em buh lam te pawh a lo lang ta zel a. Tunhmain chanchin te kan lo chhiar ve thin a, India ramin zallen a hmu a, bul a han tan chhova, *green revolution* atih vel lai khan an *staple food* chu wheat a ni mah mah a, modern methods hmanga technology leh farming te ramdang thiamna hmanga an han adopt atang khan India ram pawh a economy ang leh mipui ang pawn kan kang tih te kan lo zir a, kan lo chhiar tawh thin a. Chu chu nasa lehzualin kan ram pawhin theihtawpin a kalpui reng chungin tunah hian kan Minister hian nasa lehzualin helamah hian sorkar sumte leh mechanization lamah hian hma ala nasa hle a.

Chumi in a la ken tel leh zela chu seeds variety tha, *high yielding seeds* kan tih te, pesticides, insecticides emaw herbicides hlo chi thahna kan tih te, heng hi nasa taka hman ala ni zela tun thleng hi, ram ropui ber thleng pawhin. Chungte chu Agriculture Department hian tunhma lam deuh khan hei hi a buaipui nasa thin a, tunhnaiah khanin khatiang pesticides lama kha tlemin a insum ta deuh niin ka hria a. Amaherawhchu, farmers te hian kan hriattur chu heng thil tel lo hian a awm hleithei miah lo a ni tih lai hi a ni a, ‘Organic State’ kan han tih ang tak hi chuan kan kal hleithei lova, India ram pawh a kal thei lo a ni. A bik takin food stuff, field crops angah hi chuan a ngaihna a awm tawhlo tihna ang tluk a ni a. India State khawimah hi hetiang zawng hian a kal awm ka la hre lova, khang te pawh kha rilru ah kan neih tel tho a ngai a. Man to tak takin farmers ten mimal hnena heng thil hi an procure reng a ni tih kan hriat tel a thain ka hria.

Tichuan, Agriculture-a ka ha sawi tel leh zauh duh chu, hmanni khan ka sawi tawh a, Member pakhatin a rawn sawi tawh bawk a. Oil Palm Project kan neih mek, tunah sorkarin a vawn nung chungchangah price support January thla atanga pek tura ruahman tawh tun thlenga an la dawng hlei thei lo hian an rilru te a tihnual nasa a ni tih kha ka han sawilang duh a. Kha *price support* a kha a nihna tur ang takin pek ve ni tawh sela, miin an mangan pui lovang a, Oil Palm project-ah pawh hian mipuite an phur na na hi chuan nasa leh zualin hma kan sawn phahin, kan that phah lehzual ang tih hi ka ring deuh tlat a ni.

Fisheries lam kha ka han sawi leh lang a. Nichin-ah Member pakhatin a sawi a, Zoram ina kan chawkluh, kan tharchhuah ve kha 50% chuang lai a lo ni ve tawh a, a statistic kha dik turah kan ngai a. Engpawhnise, kan intodelh leh ramdang atanga kan lakluh chu a la tam hle tihna a ni a. Tun kum tir mai khan Hortoki-ah khuan, ahming pawh han sawilang ta ila, Pu Sangluiaia, sipai pension a ni a, a pension zawng zawngin sangha lama a tuina alo rei tawh nen tih takzetiin sangha dil chhawng 5 a bei tak tak a, quintal tam tak a thar theihna turin an neih zawng zawngin a han buaipui a, a atchilh a ni deuh ber a, a bulah thlai huan tha tak a nei bawk a.

Amaherawhchu hei kum 4 vel bawr an grant tawh hnu hian Sangha mumal tharchhuah hi an la nei thei bik lova. Tin, ka zawt mai mai a, sorkarah tanpuina te hi a dil ve tawh em tih te, “A chi chungchangah leh a chaw te leh eng eng emaw, dil tlang a lo bala, khatiang ang chhawmdawl na ang chi te, kan in seng kual viau tawh e” a ti nghe nghe a, “Chutiang sorkara tanpuina han dilna chang pawh kan lo hre bik lo a ni e” an ti a. Amaherawhchu, khulai bialtu te pawh tlema han demna ka neih chu, tih tak tak a ti, khulai Hortoki-ah pawh dil nei zau bera an sawi, tupawh zawt ila an hriat mai tur a chu, department lampang pawhin an lo bengkhawn ve deuh turah ka ngai a. An hmun pawh khua atang a hla lo te a ni a, “a site vawikhat pawh an la rawn tlawh lo” an la ti lehngthal a.

Ka han sawi tum tak chu, hemia tel lo hi, hei *party policy* thenkhat heng sorkar facilitator-a tang tur kan tih te *bana kaih policy* te hi apply hun tak niin ka hria a, sorkar purview tur tam tak awm niin ka hria a. Thil ti tak tak te hi chu lo vulh lian deuh pawh ni ila, saptawng takin ‘capitalism’ kan han tih ang deuh mai, private emaw, mimal han invur ngaih changte hi a awm thoin ka hria a. A tangkaina chin te pawh sawi kai ngai nise, sawitur a tamin ka hria a. Khalaiah Sangha dil tih tak taka lo ti, quintal tam tak lo thar theia kha sorkain a zu duhsak deuh emaw, a zu enkawla, kan beisei ang ngeia Sangha an rawn tharchhuak anih chuan, anmahni chhungkua chauh ni lovin an mi chhawr chhungkaw engzatin nge chhawr chhawng ve leh ang tih te.

Tin, Aizawl-a chhungkaw chawm Sangha zuar nuho hian chhungkaw engzat nge a chawm ang, ‘Mizoram product’ kan tih ang zawng zawng ka han ngaihtuah a. Khatiang deuha a ti tak tak te hi chu kan ngaihven ve deuh chu a thain ka hria a. Chu chu kawng dangah pawh a ni tho a, Industry lamah te leh engkimah pawh nisela, a lian sa invulh thur thur tih lam pu lova, mihring chu inzawm vek, inter-connected kan nih vekna laiah hian kan chhawr tlang a ni tih hi a mipui leh sorkar pawhin kan hriat a ngaiin ka hria a, chung chu ka han sawi duh a.

Hei, tanpuina tam tak kan dawng a, Sangha dil siamna tur ringawt pawh hmanni lawkah ka bial chhungah nge, kan district-ah kan Minister hian a hriain ka ring a, nuai 80 nge 90 vel kan neiin ka hria a. Khang kha eng ang chiahin nge kan hmanral ka hre lova. Sanghaa hlawhtlin tum tak tak lo, phur thuta ‘ka ti ve dawn’ ti a, a tui pawh khuap zo hleithei lova, a laih nana hmang mai mai pawh eng emaw zat an awmin ka ring a. Khatiang ang

selection chungchangah te, ti tak tak tur hnenah chuan khang kan pek tur chungchangah pawh fimkhur a ngai hlein ka hria a. Khatiang anih loh chuan, thil tak taka chhuah chuang si lo hian kan sum leh pai, central puihna emaw, state sorkar-in a a puihna ang te te-ah a luang ral mai mai ang a, thil chenfakawmah a thleng dawn lo a ni tih kha vawiinah hian kan tarlang duh a.

Kan member-pui Pu Muanpuia khan Sangha humhalh chungchang te kha a rawn sawi a, Mizo Sangha tha tak tak te kan humhalh a ngai a. Eng emaw chang chuan Mizote chu Sangha man nuam ti, lui kal nuam ti kan ni a, a man hun han siam leh intihhlimna hun han siam te kha ka support khawp mai a. A hun leh a hmun ni lova lo man chiam erawh hi chu mipuite hian kan tihtur niin ka hre lova. Ram hravaitute lek phei chuan bomb miah loh tur tih kha ka han sawi tel zauh duh a ni. Ka lawm e.

**SPEAKER** : Tunge sawi leh ang? Awle, Dr. Vanlalthlana.

**DR. VANLALTHLANA** : Pu Speaker, ka lawm e. Pu C. Lalrinsanga Demand ho-ah khan ka han lut hmasa ang a. Hei, vawiin demand hi ka tuina zawng tak ve ve a ni a, kan Minister chan te hi. Sawi tur a tam khawp mai a, theih ang ang chuan ka han pawt tawi leh dawn chu a ni a.

Agriculture hi kan hre vek a, ‘Zoram mipui 60% chuang innghahna’ tiin kan sawi thin a. Kan Minister-te, kan hotute, kan hotupa ber kan Chief Minister ngei pawhin a ngai pawimawh khawp mai a, ei leh bara intodelh a sawi fo mai a. 1998 leh 2008 sorkar hmasak tum khan Budget Speech tum 10-ah tum 8 ei leh bara intodelh kan ngai pawimawh ang tih kha an tarlang a, mautam te a ni a, khang hun lai kha chuan, sawi theih pawh a ni lo a. Kan ngai pawimawh a, kumthar thuchah tum-ah an han ti leh a, tum 3 lai, ‘ei leh bara intodelh kan ngai pawimawh dawn’ a ti a.

Amaherawhchu, SEDP hi ka lut lo thei lo a, a chhan chu ka rilru hi a na a ni, sawi leh a taka tih inang lo hi. Helaiah hian ka sawi fo thin, keini chu kan lo ching zel dawn a nia tih kha ka sawi duh bawk a. 2019-2020-ah SEDP-ah a nuai hlirin 65,000 chuang sem chhuah a ni a, khata cheng 1 kha nuai 650 a ni a, budget document kan en chuan actuals-ah khan nuai 500 bawr vel kha pek a ni chauh a. Chuti anih chuan kuthnathawk mipui 60% khan SEDP-a hmasawnna tur 1% pawh an chang ve lo tihna a ni. Tuna kum kan hman mek tawp mai turah hian, revised estimate-ah khan SEDP hnuaiah cheng nuai 46 a rawn lang a, SEDP-a kan sen zawng zawng kha nuai hlirin nuai 8,200 bawr vel a ni a. Chutah chuan 1% kha nuai 82 a ni. Nuai 82 chu pha lovin nuai 46 Agriculture-in SEDP atangin a dawng a, mipui 60% te hian SEDP atangin a kum zawnin 1% pawh kan dawng lo a ni a.

Hmanniah pawh ka sawi tawh, hemi chungchang kan sawi dawn anih chuan a takin i tilang ang, mipuite, kut hnathawktute, lo neia eizawngtute hi kan ngaih pawimawh a ngai. Thingtlangah kan kal a, kum 15 kal taa ka kalna te kha a harsa ngai tho, a bet ngai thote kha

engatinge an la beh tih hi ka rilruah a lang a, ka rilru hi a na thar leh thin a ni. Nitin an inhlawh a, loah an kal a, an theih ang tawkin hma an la a, khai chhuah an ngai, puih an ngai a, chumi ti tur chuan Agriculture Department hi a pawimawh em em a ni. A pawimawhna ang hian kan tanpui tawk lo thin ni tein ka hria.

SEDP-ah vaibelchhe 400 kan nei, kan hre vek, a tam thei ang ber i pe tawh ang hmiang tiin rawtna kan siam a ni. 15<sup>th</sup> Finance Commission-ah vaibelchhe 86, kum 5 chhung, 2026 thleng kan dawng dawn niin ka hria a, Agriculture-a ti tha ho tan central-in vaibelchhe 45,000 a dah a, land reforms ang chi te, be (pulses) leh wood based products tih ang chia ti tha te, ramdanga thawn chhuah (export) lampanga ti tha te, tui hman thiam lampanga ti thate State tanpui nan vaibelchhe 45,000 an dah rup mai a, heite pawh hi kan chuh thiam a ngai dawnin ka hria, kan tan a ngai khawp mai.

Crop insurance-ah hian ka lut leh duh a. *Fall army worm*-te kan han nei a, department-te an che thain ka hria, Minister pawh a che tha a, a lawmawm ka ti khawp mai. Kan kut hnathawktute, lo lama eizawngtute an manganna tam tak tih reh sakin a awmin ka hria a. Crop insurance-ah hian central scheme a awm a, kan hman tangkai a ngai khawpin ka hria, sorkar lam pawhin an buaipui thin a, hei aia ngaihven lehzual a ngaiin ka hria a. Tun hnaiah *yard per hectare*-te ka han chhut ve a, ka thiam ang angin, buh bikah hian. Kum 2000 leh 2001 chhoah khan hectare 1-ah kg 2000 kan thar ang a ni a, tun, a thar ber 2019-2020 ah hian kg 1-ah 1710 bawr velah a tla thla ta a. Ka han luh duhna chu, hei hi engnge a chhan, Engnge a bulpui a research hi kan tih thin a ngai, ka sawi ngun khawp mai. Research hmang hian ram hi i siam tha ang, i zir ang u, anih loha kan tih dan ngaia kan tih leh chuan harsatna ngai bawk kan tawk leh ang tih a hlauhawm thin a. Research lampangah hian tan la ila, data management centre-te hi kan neih a ngai, kan data, thil hi kan neih that, thil ziaha entur kan neih that chuan nakinah thalai zualte, mithiamte pawh an lo la chhuak zel ang, chungo tan chuan thil han buaipuite kha a awlsam lehzual dawn a ni.

Organic farming-ah hian tawite ka han lut duh a. Commerce lam, management lama kan sawi dan chuan ‘core competent’ te kan ti a, midang aia kan thatna deuh bik a ni a organic farming hi. Kan ram a la tha a, department pawhin hma chu a la a, hei aia zau zawka hma kan lak theih dan hi a awmin ka hria a, hetah hian tan kan lak a ngai takzeten ka hria a.

Demand No. 47 - Irrigation & Water Resources-ah hian ka han lut ve leh ang a. River diversion-ah pawisa te kan hmuh belh dawn niin ka hria a, hei hian budget pawh 50% dawnin a nawr chho pawp mai a, a lawmawm khawp mai.

Co-operation Department hi Agriculture ang deuh a ni a, Mizoram mipuite khai kang theitu a ni a, ‘Vandhan Mission’ tihte a awm a. Nuai 85 kum hmasa lamah kan han hmu a, kan englo dawn lo nge, hmuh tur kan la beisei deuh nge tih kha rilruah a awm a. Vandhan Mission hi tangkai deuha hman dan awm ta se la, State danga an neih Co-operative Society-ho tanpuina tur ang chi te, Meghalaya-in nuai 200-te an lo dah a, Tripura-in nuai 200 chuang

tho an dah a. State dang Co-operative Society ho, State-in a co-operative a neih bik nilo, a dang ho tanpui nan hian an lo dah nual a ni, heath hian tan kan laks a ngaiin ka hria a. Tun budget-ah hian nuai 25 hi a niin ka hria a, tihpun dan i ngaihtuah ang. Co-operative movement hmang hian state tam tak chuan sum an la lut a, an mi harsa zawkte an intuamhlawm a, tan an la a, hmabak tam tak te pawh an neih phahin ka hria a, hmabak han ti ila, an sumdawnna lamah te thil thui tak kha an kal thei a.

NLUP an sem khan tihsual ka nei ka ti a, tum khat ka sawi tawh a. NLUP dawng ho kha Co-operative Society din dan tur leh khang kha ka lo ngaihtuah pui lo a ni tih kha keini he lampanga tui, a zirtirtu kan ni bawk a, SEDP an sem hun chu ka ti ngei ngei tawh ang ka lo ti a, amaherawhchu, a rim a ra pawh kan la hre chiah si lo a, khatiang lampang tur deuh kha chuan an tih veleh ka rawn che chhuak vat ang.

Tichuan, Pu K. Lalrinliana Department, Food, Civil Supplies & Consumer Affairs hi in tin khawih department a ni leh a, heliaih hian ka dinpui ngun tawh khawp mai a, Gas chungchang chu ka sawi tawh lo mai ang. Ka vei a ni. In hre vek thoin ka hria. Buhfai phur motor-te hi zui ka duh a, kan Minister pawh hian a zui hial tawh a, chutiang chuan, ‘a buara tel lovin an buk a, a hrall chhuahna lamah buara an buk tel a’ tih te, thil tam tak hi a awm a. Hei hi chu a buaipuitu Committee emaw eng emaw kan din a ngai a ni, tel ve te pawh ka chak a ni. Ka ngaihdan chuan technology hmangte, thil eng nge hmang hian system fel duang ila, hei hi chu a vai chuan a reh lo ang. Amaherawhchu, a tam pui hi kan sut kian theih hi ka ring a, hei hi chu a vei-awm ka ti khawp mai.

LAD hi chu kan kal kan mai ang a Pu Speaker, hun a tlem tawh bawk a; Fisheries-ah hian ka lut duh a. Lui Sangha Mizo-in kan neih tui tak tak te a awm a, ‘foreign species’ kan tih Mizoram-a kan neih lem lo thenkhat hi Lui-ah kan chhuah teuh zel mai a, zir chianna awm lem lo hian ram tam tak hi chuan an rama lakluh tur pawh hian an phal lo a, cat fish ang chi te phei chu a dang hi an ei zo duak duak zel mai a, chuvang chuan helamah hian thil kan ti dawn anih pawhin awmze neia kan tih hi a ngaiin ka hria a.

Chakai Farm te kan ti a, ka han sawi duh chu, Pu Speaker, tawitein ka sawi ang a. Chakai hi kan lei thin a, zin kawngah te an zuar thin a, a chung lampangah chuan lianpui an dah a, a hnuai lampangah an thup bo a, te reuh te te hi a lo awm tawh thin a. Ramdangah te chuan Chakai te pawh a ni ang a, Sangha te pawh a ni ang a, thil dang ho Kaikuang an man te pawh hemi chin chu tui ah dah leh tur an ti a, man phalloh chin an nei a, hetiang dan te pawh hi kan neih a ngaiin ka hria a. ‘Chakai hetiang tiat aia te hi chu hrall phal a ni lo’ tih dan te hi nei ila, chutah chuan kan nungcha te, chakai lem lo thildang pawh kan nungcha te enkawlnaah pawh a dang pawh kan neih tam belhin ka ring a, rawtna ka han siam nghal a ni e. Ka lawm e.

**SPEAKER** : Dr. Vanlaltanpuia, Member zahawm tak kan sawm e.

**DR. VANLALTANPUIA :** Pu Speaker, ka lawm e. Vawiinah kan Minister zahawm tak pahnih, Pu K. Lalrinliana leh Pu C. Lalrinsanga te demand sawi leh thei tura kan ding hi a lawmawm ka ti hle a. He department pahnihte hi min chawmtu department, nu leh pa ang tea min hraipuwartu department an ni a, an department-te hi sawi sak a chakawm hle mai a. Khawngaih takin kan dilna te, kan sawi te, kan bial tana kan sawi te pawh min lo chhinchhiah sak sela a theih ang angin min lo react sak sela tih te kan sawi duh a.

Tin, Pu Speaker, vawiina ram rorelnaa kan din hi MLA kan nih chhan tak lai hi a ni a, ram aiawhin ro kan rel a, khawngaih takin kan laklawh deuh te phei hi chuan min sawi zawh tir la tih te ka ngaiantuah a ni. Kan rorelna hi a pawimawh em em mai a, chuvang chuan khawngaih takin min ngaih pawimawh sak la.

Tin, sawi tur ka ngah deuh hlek a, Demand No-17 - Food, Civil Supplies & Consumer Affairs-ah hian kan Minister hi fak a phu hlein ka hria a, a department official-te zawng zawng pawh an chungah House kaltlang hian lawmthu kan sawi duh a, kan hun harsa leh thim kan tawh laia min chawm dan te ka ngaiantuah a, buhfai tlachham miah loin, oil tlachham miah loin. Sorkar tha sawi hi chuan nitin mamawh ‘basic amenities’ hi a tha tur a ni tih a ni a, Pu Rintea leh a department hian he sorkar hi an chei mawi hlein ka hria a, chuvang chuan fak ka duh a.

Tin, Gas-te hi Aizawl khawpuiah ka awm a, kei pawh gas-te lo zawng kual ve fo tawh tu hi ka ni a, a harsat zia hi ka hre thin a. Gas a han tam a, kan kawt kaia ‘gas in duh em’ an han tih ringawt pawh hi a thlamuan tlakin ka hria a ni. He department chungah hian lawmthu sawi sen loh kan bain ka hria a, a mal te tein ka sawi seng lo a, kan fak che u a ni, kan ngaisang che u a ni. In Service hi ramin kan ngaihlu a ni tih hi kan sawi duh a. Tin, ka bialah a bik takin Supply kudam Chhipphir-ah min sak sak a, kan mamawh ka thlen te pawh min lo tih sak a, type-III quarter min sak sak bawk a, ka lawm hle a ni tih te pawh hi kan sawi duh a.

Dr. Mathlante-a, ka thianpa kha a phawk chhah ang reng khawp a, “kum hnii chhung hian ka rilru a na a, thingtlang hote a ngai rengin an la awm a ni” a ti a, a dik ka ti tho a, amaherawhchu kum hnii chhung hi chuan intodelh chu har ve deuh mai a nia, harsatna karah phei chuan. Chuvang chuan, “Rome was not built in a day” an tih ve bawk kha maw. Chuvangin, St. Petersburg ropuina an sawi te pawh hi hmanlaia tanga statue ropui tak tak leh khatiang hote kha lo indin tawh te an ni a, he rama hi kan kan tawh zia hi ngaiantuah fo tur a ni a, leh lamah chuan khawvel hi a kang chak a, kan in tehkhin fo thin a.

Hman deuhah chuan ka ngaiantuah a, keini chhungkua pawh hi rethei tak chhungkua kan ni a, kan pa hi zirtirtu chauh a ni a, mahse hmanni ka ngaiantuah a, pawnah hian tual zau ang reng tak hi kan nei ve thin a, kan in kawt ka han en a, motor kha ka naute ta ho nen kan In kawtah pawh a lo awm tam ve em em tawh mai a. Chumi awmzia chu, kan economy hi a lo tha a, chhungtinte hmania scooty it em em mai khan motor eng emaw zat hi kan lo nei

ta vek a ni tih te hi, kan ram hi a thang a ni tih te ka ngaihtuah a. Ei leh barah pawh hian kan intodelh zel dawn tih te kha ka han sawi duh a, tan a ngaihna a la tam a ni tih thu ka han sawi duh a ni.

Ka han sawi duh lai tak pakhata chu, kan bialah hian kan Minister-in min lo chhinchhiah sak sela, kudam hlui tawh tak tak mai a awm a, a bikin Haulawng-a kan supply godown bulah hian quarters-a awm thin a, mahse an thiat dhaih mai a, a chhan pawh ka hre lo a, hei pawh hi khawngaih takin quarters-te hi min pe thei se tiin ka han dil duh a. Tin, a hlui a awm nual tawh a, hengho a tawih tawh ho te hi min chei sak se nakinah kan la umzui anga tih te kha kan sawi duh bawk a ni.

Local Administration Department, Demand No.19 hi ka han sawi leh lawk ang a. Hetah hian kan hriat angin thinglanga VC-te ho enkawltu department ti mai ila a tawi zawngin, ka bialah hian ‘Pu Laldenga Park’ tih hi Ministry hluiah hian an siam a, Pu Mathana, kan Minsiter zahawm tak khan a siam a ti mai teh ang. Hei hi rin aiin a tawih hle mai a, kan Minister pawh khan min ensak tawhin ka hria a, khawngaih takin min lo ngaih pawimawh sak se la. MNF Ministry-ah phei chuan Pu Laldenga sulhnu, a hminga awm anih avang khan ngaih pawimawh a phu hlein ka hria a, khawngaih takin special attention min lo pek sak rawh se.

Pangzawl VC hi ama hnena ka thlen angin, Pangzawl VC hmun 2-ah min then sak a, ka lawm hle a. Tun inthlan hnuhnung berah pawh khan VC-II kan lo nei ta a. Amaherawhchu hetah hian tihsual kan nei deuh tlatin a lang a, Pangzawl South zawk VC population tam zawk hi 15<sup>th</sup> Finance Commission-ah te leh Rural Grant lo kal thinah hian a hmu tlem zawk kan ni tlat zel mai a, a population mila chhut anih avangin. Khawngaih takin Pangzawl North leh South-a population hi min lo enthat sak sela, an fund, an grant dawn hi a letling chiah thinin a lang a ni tih kha khawngaih takin min lo hriatsak se tih kan sawi duh a ni.

Demand No. 35 - Fisheries ah hian, Blue Revolution hnuiah, an sawi tawh a thil tam tak min tihsak a, kan lawm hle a, sangha dil te a bulah *hut* te pawh min siam sak zel a kan lawm em em a, khawngaih takin hei hi tang leh zel sela.

Sangha Mizoram thar hi keipawhin ka zawt a, 52% kan lo thar chhuak ve reng tawh mai kha a lo ni a. Hengah te pawh hian deptt. lam hi han fimkhur leh deuh sela, formalin-in an chiu thin a, mihring hriselna atan tha lo hle mai, phai atanga kan sangha lak luh te pawh a awm thin a. Khawngaih takin hengte pawh hi an purview chu a ni kher tawh lo em, ka hre lo a, khawngaih takin lo enchiang sela, sangha thianghlim hi min pe thin se tih te kha ka sawi duh a.

Sawi duh ka la ngah si a, ka kal zawt zawt mai ang a. Tun hnaiah hian complain pakhat ka neih deuh hlek a chu deptt. officials ten min lo ngaithiam sela, MLA ten kan

hriatpui mang lem loh information te hi an lo pe thin a, an lo thlang leh deuh mai thin a. Tin, kan duh zawnge leh a phu nia kan hriat hote pawh kan dah hlei thei mang lovin a lo kal thin a, hei hi khawngaih takin tun kum thar atang hi chuan sangha dil tanpuina thlan tur ang chi-ah te hian MLA te min rawn *route through* ve se, MLA ten lo hre ngei ila tih kha ka duh a ni.

Agriculture, Demand No. 31 hi ka sawi duh a. SEDP, kan programme pui ber hi a ziaktu zingah te pawh kan CM zahawm tak, khatih laia kan Party President hruaina hnuiah ka lo tel ve a. Agriculture hi kan bei nasa khawp ve a, buh leh bal, thlai, sangha, artui, bawngnute-a intodelhna tur hrang hrang, a hmingah khan ‘Green Revolution’ kan ti a, mahse hmanni chu Bangkok-ah FAO Office Prof. Nunmawia nen kan tlawh tum khanin French-pa pakhat khanin, ‘*Green Revolution* tih hi chu a organic tawngkam lo riau mai’ tih te kha a sawi a.

Engpawh ni se, hemi hnuiah hian hmalakna lian pui pui 3-in then ila kan ti a, pakhatna kha chu buh leh bal, thlai, sangha, artui, bawngnute intodelhna tur ‘*Green Revolution, Blue Revolution, White Revolution*’ kan tih ang ho chi inchawhpawlh atan khan ni se kan ti a, chu chu Land Reform nen kal kawp se kan ti a ni. Land Reform taka hi ka sawi thin a, kan sawi leh ang a. Mi lian ten ram tam tak tak enkawl sen loh an nei a, sorkarin han ti dawn tak tak mah ila, mimal ram a lo ni zel mai a. Tin, NLUP-ah pawh ram tang chhanchhuah ngai tam tak a awm a ni. Khawngaih takin hengte pawh hi uluk takin hma la ta sela.

Tin, a dawt lehah chuan kan hria a, department dang chu a ni tawh a, Horticulture hnuiah programme hrang hrang a lo awm ang a. Tin, a dawt lehah chuan sum chang thlai (cash crop) hote hi programme hranin kal ta sela. Cash Crop tam tak a awm tih te hi ka han sawi duh bawk a, chung hote pawh chu uluk deuhin enkawl ni ta se. Tin, Mizoram hi mak deuhin tunhnaia ka han hriat vea chu, kan soil composition-ah hian mi ram ang lo takin *acidity level* hi a lo hniam hle mai a. Lo kan halna chhante pawh hi kei ka lo hre mumal mang lova, lei ti tha tu emaw a nih ka lo ti a, mahse acid ti tam tur kha a lo ni a, thil ti to tur kha chuan acid tam tak kha a lo ngai zawk kha a ni a, mi ramah chuan phosphorus leh nitrogen te kha a tlem zawk a, keini chu a letling chiah kha a lo ni a.

Chuvang chuan kan agriculture system hrim hrim hi mumal deuh hleka, nichina Dr. Mathlana sawi ang deuh khan research nen mumal deuh hlek hianin kan soil testing system te pawh siam thain, tin, crop zone te pawh siamthain, theih tawpin han ti ta ila. Tin, WRC area potential area te pawh identify in SEDP ah te hian hei aia nasa-in han double, han triple hi a chakawm ka ti a, chuvang chuan khawngaih takin heti zawng hian hmalak ni ta se.

Pu Speaker, ka sawi tawh kha, khawngaih takin point 2 chiah sawi tur ka nei tawh a, min hrethiam la.

High yielding variety pawh hi a thar, hlawk zawk, a chi tha zawk te pawh hi lak luh a tha zelin ka hria a, hengte hi ka han sawi duh tel zel bawk a ni. Tin pesticide emaw insecticide emaw hman leh cancer natna hi a inkaihhnawih em, a in relate em tihte hi ka beng a verh khawp a. Farmer thenkhatina an duh duh dana an hmang han en phei hi chuan ka support mang reng reng lo mai a. Chuvang chuan khawngaih takin hei hi min ensak se, mumal deuhin tih te kha kan sawi duh a. Ka bialah hianin ama Agriculture Minister bial hlui tho a ni a, Zau tam tak an nei a, ka sawi vek tawh lo mai ang a, khawngaih takin heng hote hi min ensak se ka duh a ni.

Demand No. 37 - Co-operation, Pu Speaker, khawngaih takin hei leh Irrigation hi min sawi zawn tir lawk la. Hetah hian sawi duh ka neih chu, Apex Bank hi kan nei a, Co-operation hnuaih hianin. Tunah hian SEDP-ah pawh kan ziak a, khaw thenkhat khawlian lian ho, bank la nei lo te an pawisa neih ang ang te mumal deuha han dah ve duh te leh, bank awmze neia hman hi an chak ve em em a, khawngaih takin hei hi min react thei sela. Apex Bank nei tur hian engnge ni a criteria, a parameter leh engzat population chin nge bank nei thei tih te, mi haus a deuh awm khawmnaah chauh em ni tih tur tih ang chi te hi khawngaih min ensak se ka duh a. ka bial khawlian thenkhatah te hian Apex Bank hi min dah sak thei se kan va duh em tih kha.

Tin, Rural Bank, Serkawn hmun hi damdawiin awmna hmun anih avangin mi hi an buai thei em em mai a, Rual Bank-ah te hian an CSR fund te pawh ka dil sak ve a, an YMA thisen pe tein leh ruang dah chhuak tein an buai thei em em mai a, Serkawn YMA te. Chuvangin khawngaih takin CSR fund te pawh hi a thei angin Serkawn damdawiin leh YMA te hman theih turin min tih sak se ka va duh em tih te hi kan sawi duh a.

A tawp berah chuan Demand No. 47 - Irrigation Water Resources-ah te hian, an theih tawka Israel tena Jordan lui uluk taka an hmang ang te, tin, Egypt ina Nile an hmang ang te hian kan ram lui hote hi hmang tangkaiin, irrigation-ah ah pawh nasa taka lak hi a ngai hlein ka hria a ni. A thlaler nasa tawh em em mai a, chuvang chuan forestation te nen tang hovin theih tawpin hma i la ang u. Kan ram hi hma a sawn zel a ni a, nichina ka sawi tak ang leh Pu Thlana ten an sawi ang khan a sang zawng hian kan la kal zel a ni a, tih te kha kan sawi duh a.

Kan Minister zahawm tak pahnih demand hi he House hian pawmpui ila tih kha ka han sawi ve duh a ni e. Ka lawm e.

**SPEAKER** : Doctorate Degree nei ve ve, minute 3 ve vein in pel a ni. Awle, Member zahawm tak Pu C. Ngunlianchunga i lo sawm ang.

**PU C. NGUNLIANCHUNGA:** Pu Speaker, ka lawm e. Vawiinah Pu K. Lalrinliana leh Pu C. Lalrinsanga Demand te sawi theihna hun ka neih avangin a lawmawm hlein ka

hria. Hun hi a tlem a, duh ang pawhin kan sawi thei lo ang a, mahse minute 10 chhunga khung ka tum tho ang.

Pakhatnaah Demand No.17 hi, sawi tawh ang khan Lal Isua lokal hma hi chuan buhfai buk hi chu a dik dawn lo niin a lang a. Kan Minister-in a zui chung pawh khan Kudam leh Kudam inkar kha a kim thei chuang miah lo mai a, a mangan thlak hle mai. A bik takin he thilah hian a tuartute chu kan mipuite an ni a, a bikin keini bial thingtlang a mite phei chuan an tuar nasa leh zual a ni. Chutih ruala kan Minister ka ngen duh chu, kan bial hi thal chauha motor kal theihna, fura kal hleih theih lohna hi kan ni tlat mai a. A bik takin Vathuampui leh Tuithumhnar Kudam-ah te, Vaseikai hi main road chu a ni a, mahse BRTF te hian an kawng an enkawl thatloh avangin defense road a ni a, furah chuan a mangan thlak thei em em mai a. Chuvangin khawngaih takin monsoon stock a hi, nikum lamah pawh tha takin an stock a, harsatna awm miah lovin kan kal tlang thei a, kuminah pawh hian min hriat sak leh thei sela, kan Minister hi mimal tak pawhin a fel a, biak pawh a nuam em em a, vawiin niah pawh hian kan ngen leh duh a ni.

Tin, Fisheries hi Lawngtlai-ah District Officer kan nei a, Lawngtlai District-ah hian MLA bial thum kan awm a, a bik in Pu BD Chakma bial leh ka bial hi fisheries-ah chuan a potential a ni a. Mahse House-ah Opposition lam ve ve kan nih avang hian a tanpuina lam hi kan mite'n an dawng chau a ni. Lunglei North bialtu-in MLA ten hre thei ila a tih a kha, MLA hriat tur chin hi awm ta sela, entirnan tanpuina Blue Revolution a ni emaw 50% a kha MLA ten select mai sela, opposition MLA te chuan select ve pawh kan phut chuang miah lova. Kan Officer te hian tute nge ti tak tak, a 'ti tak tak lo' laia saw an hre khawp mai a. A ti tak tak ten an dawn loh laia a hminga han lai ve mai maiin an han dawng hian a siam tak taka te tha a na thin a.

Chuvangin sangha-a intodelh tak tak kan tum anih chuan centralized ni sela, District Officer te a bik takin, (sawi a mawi lo em ka hre chiah lova) Lawngtlai a kan DFDO hi nula a nia a tui khawp a, a hre chiang em em mai lehngthal a, district hrana mite pawh chutiang tho chu an nih ka ring a. Chuvangin kan Minister zahawm tak hian he thil-ah hian MLA te a duhsak anih pawhin a tha e, amerawhchu kan officer te hian thuneihna nei ve sela, an ngaih pawimawhte hian dawng ve sela, a tak rama thawk te hian tih lai tea hi ka han sawi duh a.

Sangha chaw te pawh kan dawng tha a, a lawmawm khawp mai a. A chi te hi kan dawng khawp lo hle mai a, sangha note pakhat hi cheng 2/- a lei a ngai a. Chuti chung chuan Lawngtlai district-ah hian kham khawp kan hmu lo a ni. Sorkar atanga han tih vek pawh hi a har pawh a ni mai thei a, hmun hrang hrangah Sanghaa eizawn tum tam tak an awm a, hei hi kan intodelh theihna tur atan chuan a tak taka thawktute hian tanpuina awm thei ang ang te pawh dawng ve sela hma kan sawn chho leh zual ang tih hi beiseina lian tak ka nei a ni. Kan Minister ka zawt a, tunah chuan kan DC hovin an thlang ang a ti a, DC kha a kut phuar

lovin *free hand* pe ila, a dil dik tak ho verify vek nise, hmu thei vek se tiin tih kha ka han sawi duh a ni.

Tichuan Agriculture-ah hian kan bialah pawh link road hmun eng emaw zat ah kan lai a, link road chu kan hriat angin vawikhat kan laia enkawl zui anih loh chuan a chhe mai a. Chuvangin kan biala link road kan han laih te pawh kha umzui ni sela, enkawl zui nisela chu an mamawh em em a ni. Chu chu ei leh bar a kan intodelhna tur, kan thlaitharte phurhchhuahna tur atana hmanraw pawimawh tak a ni.

Agriculture Minister hi mimal tak hian fak a phu ka ti a, MLA te Oppostion kan ni chung pawhin mi a ngaipawimawh thiam em em mai a, tanky siamna te min pe a, tui pipe kan han sem ve thei te kha a lawmawm ka ti hle a ni. Agriculture Link Road chugchang bikah a hmaa lo tih tawh kha department hrang hrangah umzuina a ngah a, hei pawh hi umzui ni se, sum tam tak kan senna turah khan a lokal tawh sa leh a lo awm tawh sa maintain-a han siamthata kha a hlawk hle ang tih ka ring tlat a ni. Tin, pipe han sem pawha ‘Ruling MLA te thu lo chuan’ tih deuh tlat laia kha kan farmer te leh kuthnathawk a mamawh tak tak te hnen aiin a mamawh lo hnenah a kal tam ang tih a hlauhawm hlein ka hria. Chuvangin, ei leh bara kan intodelha kut hnathawk tute hnen thleng phak tak tak, Pu K. Lalhminglana’n “Misualte hnen thleng phak chanchin tha” a tih ang deuh khan, Agriculture Department hi kuthhnathawktute tak tak hnen thleng phaka a kal theihna tur atan chuan kan District Officer-te hnenah hian thuneihna tam zawk pe se, tichuan, Ministry leh MLA ang te pawhin, ruling na nana chuan thuneihna alo nei anih pawhin avai hi chuan pumhawm lo deuh ta se kan va han tha tlang dawn em ka ti a ni.

Tichuan, Cooperation chungchangah hian, Mizote hian society kan han ti ve thin tak naa thawho hi kan thiamlo tlangpuiin ka hria a. Sorkara kan awm ve lai khan NEDP scheme hmangin kan Finance Minister te, kan Agriculture leh Horticulture Minister te nen, Gandhinagar, Gujarat-ah kan zuk zir ve a, Vety Deptt. kan nihna angin, khulaia AMUL awmna te pawh kan zu tlawh a. An ni chuan society an hmang tangkai a, phaizawlah Alu an ching vek a, chu chu society in a buaipui a, society in a chi a pe vek a, society in a lei hunah a lei leh a, a bulah cold storage PMEGP hmangin lian pui mai quintal sing riat dah theihna an sa a, kha an Alu thara kha society in an buaipui a, khatah khan an dakhawm a, a tawih chhe lova, hrallh hun pangaiah an hrallh a, tiang khan society kha an hmang tangkai a. Dawr an siam a, thingtlang khua an ni a, dawrah khan thil man tlawm tak takin an nei a, an Alu chin thlengin an tangkaipui hle a ni tih kha a takin ka zu hmu ve a. Tin, ran vulhtute pawh nise khatiang khan society an tangkaipui hle a ni.

Chuvangin, Cooperation lamah pawh khan, SEDP atang te pawhin eng emaw zat pawisa kan dah a, hei hi a taka kan intodelh theihna tur leh thawhona tha a awm theihna tura tan kalpui hram ni se tih kha ka sawi duh a ni e. Pu Speaker, vawiin chu hun ka pel lo mai ang e. Ka lawm e.

**SPEAKER :** Member zahawmtak Pu Zodintluanga Ralte ka sawm e.

**PU ZODINTLUANGA RALTE:** Pu Speaker, ka lawm e. Pu Speaker, i kaihruaina hnuaiyah te, a hmaa kan Speaker lo awm tawh thinte hnuaiaha te kan Assembly hi India ram pumpui Assembly zawng zawngte pawhina entawntlak an tih thin a ni a. Helaia Governor lo awm tawh te pawhin an awmna state-ah te an sawi haw ve thin a. Nimin kan Assembly kan inhnialna hnu lama kan Deputy Leader House pawn thleng thlenga umzuia, tawngkam thalo tak tak tea intih zuia kha, a hminga CLP Leader ka nihna angin, thleng tawh lo sela tih ka duh thu ka rawn sawi hmasa a ni.

Tin, Demand No. 31 atangin tan i la. Pu Speaker, Agriculture hi Mizoram ina ei leh bara kan intodelhna tur atana department pawimawh ber a ni a. A dangte hi works department te, thalaite hmasawnna tur te a ni a, agriculture hi a pawimawh ber a. Chuti lai chuan kan budget hi kan han en a, agriculture-a kan hmasawnna tur ang hi dah a awm tlat lo mai hian kan sorkar hi, he agriculture ina hma kan sawnna tur atana rilru tak tak a seng lova, hmasawnna tur hian kan state-in a sum kan neih ve ang te pawh hi a thehchhuak phal lo a ni tih hi a chiang em em a. Central scheme chi hrang hrang, kan officer thiam tak tak te'na thahnemngai taka kan zuk thurchhuah hi kan rin tir tawp a. Hetiang anih chuan kan ramah buh leh bal a intodelh a har ngawt ang tih hi ka ngaihdan a ni a.

Kum 2020-ah khan tlang ram lo neih atangin buh metric tonne 22,904 thar a ni a, WRC atangin metric tonne 36,357 thar a ni bawk a, hei hi Assembly zawhna atanga kan hmuh a ni a. Buh tlang ram loneite'n a kan chinna area hi hectare 18,510 a ni a, WRC-ah hian hectare 16,232 a ni a, a inthlau lo hle mai a. Tin, kan buh thar kha metric tonne 22,904 tlang ram loneite'n an thar laiin, WRC-ah metric tonne 36,357 thar a ni. Hemi ka rawn sawi chhuahna chhan chu, sorkar-ina kan sum senna 100% ti ila a sual lovang hei hi WRC kan neihna leilet siam nan te, leilet nei tanpuina te a ni kum tin mai a.

Tun kuma Member tam tak ten a an rawn sawi chu, kan Minister zahawm takin tractor chuti zat, power tiller chuti zat, leitha te, lei lehna tur khawl te, sum leh pai tanpuina tam tak kan dawng tih te a ni a, chuti chungin kan thar chhuah hi tlangram lo neih nen hian a inzat deuh tlat mai a. Chuvang chuan kan policy pawh hi, WRC leilet ringawta kan sum neih zawng zawngte insawr bing lo hian tlang ram lonei mi a tak taka thingtlang hmun harsa tak taka awmte tanpuina hi kal tam ve thei sela, anmahni tanpuina tur hian kan scheme te hi kal ve se la tih hi vawiin hian ka sawi duh a. Leilet pawh a tha khawp mai hectare 74,640 hi leilet potential area/ leilet siam theihna tur a ni tih kan mithiam kan science department atanga an chhut dan a ni a. Chuvang chuan WRC leilet lama kan kalpui rual hian kan kut hnathawktu, leilet nei kum tina lo vata, hala, buh thara, kumtluana a sur a sa hnuai hnathawktute pawh hi ngaihtuah ve an phu a ni tih kha ka sawi duh a ni.

Tin, kan bial Zawlpui te saw potential area dik tak a ni a, sawngah sawn tanpuina te pawh sorkar atangin tha tak tak te kan hmu a, tunah motor kawng tha tak kan nei tawh a, kan tharchhuahte pawh saw Lunglei-ah chuan nasa takin kan chhawr tawh a ni tih kha ka sawi ve duh a ni.

Demand No. 17 - Food, Civil Supplies & Consumer Affairs-ah hian Pu Speaker, tawi te sawi ka duh a.

Member tam tak ten an sawi tawh a, buhfai hi sorkar atangin chuan kan la chhuak a, sorkarin carrying contractor te hmangin leh kudam atangin retailer-ah a thleng a. Kan Retailer te'n an pekchhuah lai hi en uluk a ngai khawp mai. Thingtlangah chuan nitin inhlawhfain harsa takin hna an thawk a. Chung an hnathawh atanga buhfai an lak hi a buk a tling lo nasa em em mai a ni. Session hmasa te pawhin kan sawi tawh a, ka bialah chuan tin hmanga buh teh te a la tam em em mai a ni. Sawtiang saw kan Minister zahawm tak hian min lo chhinchhiah sak se la. Kan mipui, kan mi harsa zawk te'n buhfai hi kan sorkarin a bituk zat ang kg a an dawn theihna tura hma min laksak turin ka rawn ngen bawk a ni.

Demand No. 35 - Fisheries hi tawi tein ka rawn sawi leh duh a. Kan Minister hian Chief Minister *dreams* tihpuitlin a tum a, a bial Kolasib-ah nikum lamah khan chakai farm nasa takin a buaipui a, thlalakah te, news-ah te kan hmu a. Kha kha engnge a an tak, chakai farm-ah khan hlawhtlinna kan hmu ta em tih kha nakinah min rawn react thei se ka duh a.

Tin, kan bialah sawn Zawlpui, Tuisen area ami saw Chhim lamah chuan sangha tihna hmunpuia kan neih ve a ni a. Aizawla Fisheries-in tihpui an neih pawhin Tuisen atang chuan Lunglei-ah ni khatah an rawn inchhawp chhuak a, Lunglei atangin Aizawl an rawn pan leh a, Aizawl-ah intihsiaknaah an lo tel ve a. Tuisen sanghate, kan VCP Vanlala ta kha Mizoram pumpuiah pakhatna a han hauh thei a ni. Chutiang khawpa potential nei tha kan ni a.

Amaherawhchu, a chi lam a harsa em em mai a, a chi hi hmar lam, Cachar atangin an rawn supply a, Aizawl-ah harsa takin kan lo dawng tawh a. Sawtah Lunglei a thlen phei zet chuan a mortality rate pawh hi a sang lutuk a. Chuvangin eizawnna tura sangha chi tha an nei thei ta lo va. Saw lai Zawlpui area saw kan Minister hian hun hmasaah te pawh an han siam thin a, a department lam dikloh nge a thawktute dikloh zawk ka hre lo va, hlawhtling an la awm tlat lo mai a. Kan Fisheries Minister hi sangha dil nei, hlawhtling taka ama mimal ta pawh lo enkawl hlawhtling tawh a ni a, ani kaihhruaina hnuaih chuan sangha chi siamna pawh hi a hlawhtling theiin ka ring tlat a. Chuvang chuan, tun Financial Year-ah hian sangha chi siamna tur hi ama hoa tha taka min neisak chuan chhim lamah leh khawthlang lamah sangha dil hlawhtling tur tam tak a awm ang a. Hmun tam takah sangha dil siamna tur pawh a awm a, amaherawhchu a chi kan hmuh theih loh vanga sangha dil lama tui lo te saw kan awm ve bawk a. Hmun leh hmuna a chi kan neih theih chuan saw aia nasa zawk sawn sangha lamah pawh hma kan sawn ang tih kha ka rawn sawi duh a ni.

Demand No.19 - Local Administration hi tawi tein ka sawi leh duh a. Aizawl hi Municipal Area hnuiai awm kan ni a. Municipal Area hnuiah hian 'Local Council' kan ti a, a bak zawnga Local Bodies kan inenkawlna hi LAD hnuiah vek an awm a ni. AMC-ah chuan anmahni tan sum tam tak a rawn kal a. Chumi piah lamah state sorkar atangin UD & PA Department kaltlangin khawpui (urban area) anih vangin sum tam tak a kal belh bawk a ni.

LAD-ah hian pawisa hi kan dah tam lo em em mai a. Central atanga Local Body Fund kan hmuh bak hi dah a ni lova. A enkawl a zau a, Mizoram pumpui a enkawl si a. Khawpui chhunga hmasawnna sum tam tak a luh anga kan Village-level-a sum a luh vea hmasawnna a awm theihna tur atan leh hmasawnna a kairual theih dan tur ber chu LAD tih changtlun a ni a. LAD atanga Village zawng zawng hma a sawn theihna tur a ni tih kha ka rawn sawi duh a.

Department sawi tur tam tak a awm a. Mahse Pu Speaker, i hmet tawh si a, ka sawi belh ngam tawh si lo va. Chuvang chuan ka duh tawk tawh mai ang e. Ka lawm e.

**SPEAKER** : A lawmawm e. Member zahawm tak Er. H. Lalzirliana ka sawm e.

**ER. H. LALZIRLIANA** : Pu Speaker, ka lawm e. Hun a la awm tho nia ka hriat avangin vawiin chu hnung lam ka han chuh deuh a. Vawiinah kan Minister zahawm tak tak te pahnih demand kan sawi leh thei hi a lawmawm hle a. Kan Minister te pahnih hi an chan tur awm tak leh an tuipui em em mai, midang hi thlang dawn ila an ni bak hi an awm chuang lo ang a, tih tura Minister fit leh an subject-a tui kan nei hi a lawmawm ka ti a. Vawiinah sawi tur tam tak kan neihna chhan leh Mizoram sorkar ang leh a mipui ang te pawha hlawhtlinna kan hmuhna niin ka hria a ni.

Demand No. 17, Food, Civil Supplies & Consumer Affairs hi sawi loh theih loh niin ka hria a. Tuma hriat lawkloh hun harsa kan tawng a, hun harsa tak kan thleng chho a ni tih hriain kan Supply Minister leh kan Chief Minister zahawm tak te leh department te'n ruahmanna fel tak an siam a. Buhfai leh supply dang lo thleng zawng zawngte luhkhawmna hi kan Minister bial chhung kaltlang a lo nih leh zel mai bakah, mite pawh hre chiangtu a lo ni leh zel te pawh hi a lawmawm hlein ka hria a. Hetih hun lai khan rail-wagon-in buhfai a lo thlen a, a unload tu tur vaiho an tiltiak vek tawh si a, khulai Bairabi local mi te an han inpawt nawk nawk a. Thuthang vel te awmin, buhfaiah te pawh Covid-19 a awm thei a ni tih te an han inhrilh chhawng a, chutiang chuan an han tiltiak leh rih a. NGO te nen an han meeting a, hma lain buhfai te pawh an unload thei ta a. Chutiang chuan Mizoram hmun hrang hrangah kan mipui te harsatna nei lovin lockdown hnuiah pawh kan awm phah a. Chutianga min han enkawl kha a ropui hle a ni.

Tin, ka bial chhungah han luh lawk ka duhna lai a awm a. E-PoS Machine hi kan hmang a. Hmanni lawkah khan khuti lai Khawnai kangmei thelh hnatlanga ka zuk kal laiin khaw pakhat chuan, “Hei, engtin nge kan tih ang, mipuiin buhfai lak kan duh tawh si a, hei hi a theih si loh a, nangma phalnain heti hian kan lo hrall tawp mai dawn em ni,” an ti a. “Ngawi teh u, keima phalna ngawta tih chi a ni nang, tikhan Block hruaitu te nen lo sawiho ula, department-ah a tul angin hma lo la ula, lo va zawt chiang u la, ka thiam a tawp khawp mai,” tiin advice ka lo pe a. Chutiang chuan harsatna thingtlang kil zawk leh connectivity thlen that lohna tam tak kan bial chhungah te a awm avangin kan nei a. Heng dinhmun hi engtia solve tur chi nge tih te min lo ngaiantuah pui se thain ka hria a.

Tin, Tuipuibari-ah khuan kudam kan nei a, a capacity khu a tlem a. Khu laiah khuan monsoon stock, furah phei chuan thla 5 thla 6 stock kan neih ngei ngei a ngai a. Tun hmaa kan in-manage theih tawng tawng nachhan chu, an community hall khatin buhfai an stock thin a ni, ruah sur loh laiin. Tichuan tunah hian khawtlang mite pawh khuan an ning ve tawh khawp mai a, khuti laia buhfai stock reng mai khu. YMA Conference an thleng ve dawn a, engtin tin emaw kan inbia a, supply lo kal tur chu lo titawp rih deuh phawt mai ula, hall kha lo tiruak ula, Conference chu lo thlen tir phawt mai ula kan inti a. Chutiang chuan khulai hmun khu eitu leh tlantu tam tak an awm avang leh fur kawng chhiaah supply duh anga a thlen loh avangin monsoon stock hi kan neih ngei ngei a ngai a. Chuvangin kan kudam hi min tih len sak emaw, a thar pakhat (unit khat) min sak belh sak turin ka dil a ni.

Tichuan, LAD chungchangah chuan, keini pawhin ka bial chhungah VC house repair-na tur leh thil hrang hrang kan dawng thin a, lawmthu kan sawi a. Fisheries hi han sawi teh chiam tur ka nei vak lo a. Amaherawchu Governor Speech-ah hian an rawn telh a, sawi a tha khawp mai a. Hmalakna kan district te, Champhai District leh Aizawl District-ah te, Fish Seed Rearing Pond te, ‘construction of three cold storage’ tih vel te kan han nei a. Pandemic lockdown avangin kan duh angin sangha chi te, a chaw te kan tithleng tha thei lo a. Chuti chung chung chuan sorkarin a theih ang angin mipuite hnенah 50% subsidized-in sangha chi leh sangha chaw an pe te hi a lawmawm hle a ni.

Tin, Pu Rinsanga chan Agriculture hi han sawi ve lawk ka duh a. Nachina Pu Mathlantea sawi kha ka thlawp khawp mai a. R&D Centre hi kan nei that a ngai ka ti a keipawhin. ICAR kan nei a, Kolasib-ah. Anni hian engtiang chiah in nge State-ah hma min lakpui ka hre chiah lo a. Amaherawchu State ang pawh hian R&D Centre mumal tak neih hi a va tha awm em tih hi ka rilru ah a awm a, tun thleng hian kan la nei lo niin ka hria a. Engpawh ni sela Agriculture hmalakna hi a lawmawm ka ti khawp mai a. A changtu Minister hi a tui bawk a, hmun tinah hian a kal ni hian ka hria a. Hmanniah pawh Mat phai zawlah ka han zui a, chutiangin Darlak phaiah te. PMKVY scheme ah khan hmalakna a awm a. Chutah chuan kan phaizawl hi lui bul a awm ni mahse, fur lai chuan tui tam tak kan hmu a, khua a han thal chuan a ro deuh vek a, tui an hmu tha lova. A bulah lui a luang dum dum a, mahse khang ho khan tui an hmu tha tlat lo mai a ni.

Hei hi tunah hian PMKSY-HKKP, ‘Har Khet Ko Pani’ tih hnuiah hian Irrigation Department nena tangkawpin khang phaizawla ram neite tui pekna verhchhuah sakna ‘drilling machine’ pawh Mizoram-in pali neiin tunah hian hma an la mup mup a, a lawmawmin farmer te pawh an lawmin ka hria. Agriculture hmalakna hi a ropui ka ti a fak tlak niin ka hria.

Agriculture link road hi kan thehlut ve nual a, keini pawh a then te chu kan han hmu a. Khu lai ruam Damparengpui area te, Rawpuichhip te, Lengpui area te leh Mamit area te hi a tul anih chuan kan rawn thehlut leh ang a, hma min lakpui ang a. Kan bial hrim hrimah khuan kawng hi a tlem em em mai a, tunah National Highway-44 hi a kal deuh ngawk ang a, KDZKT khulai Hachhek tlangdungah a han kal leh a, a bak chu ring road hi kan nei tha lo a kan nei tam lo. Sorkar hmassa ten engemaw chen chu an han ti tho naa laih sa rintlak loh leh ping leh deuh ti tih tam tak a awm avangin hengah hian kan Minister hian hma min laksak se la tih hi ka sawi ve duh a ni.

Governor Speech-ah pawh chiang takin alang a, irrigation leh Agriculture Department ten hma an lakna chungchangte, a ropui khawp mai. Kan ramin hma kan sawna kan farmer te, kan ei leh bar kan lakna ber leh kan ram develop theih ang chi te pawh hma kan la a, kan theih ang tawkin. Sorkar hian mipuite tan ke a pen a ni tih hriat hian a lawmawm hlein ka hria. Irrigation project-ah pawh, PMKSY hnuiah project 14, cluster 22 project chumi atan a pawisa an hmuh te chutiang chuan a awm a, a ropui hle mai. Hei hi kan ram tan a thil tangkai leh pawimawh a ni tih kha kan sawi ve duh a ni e.

Chuvangin vawiina kan Minister pahnihte demand hi kei pawhin ka thlawp a kan zavaia pawmpui turin kan sawm bawk a ni. Ka lawm e.

**SPEAKER** : House kan rawn teh ang che u. Kan tlang thak chuan in ril a tam ang em aw kan ti deuh. Tunah Group Leader ilo sawm ang.

**PU VANLALHLANA** : Pu Speaker, Session-ah hian minute 10 sawi zingah ka tel ngun lutuk a, minute 15 hun min pe hi ka thiam lo a, minute 10 tur emaw ti hian ngaihtuahna ka lo seng leh thin a.

Vawiinah hian kan Minister zahawm tak tak pahnih, Pu K. Lalrinliana leh Pu C. Lalrinsanga te Demand kan sawi ho a ni a. A sawi tam ber khan lawmthu an sawi a, lawmthu sawi tur em ni dawn aw, ka ti a. Minister an ni a, an mawhphurhna a ni a, an duty an ti a, an tihtur an ti a ni lawm maw ni le tih kha ngaihtuahna ka nei a. Chutih rual chuan an duty an tiha an mawhphurhna an hlen chhuaha liama lawmawm a awm hleinem tih kha ka ngaihtuah bawk a. Keipawhin lawmthu kan sawi ve ang a, i veilam atanga lawmthu sawi hi i dinglam atanga sawi ai chuan a lawmawm zawk deuh ang chu maw le.

Pu K. Lalrinliana, Supply Minister hi Covid-19 len chhungin Mizo mipuite ei leh barah leh POL-ah harsa lovin min siam a, a lawmawm ka ti hle mai. Chutih rualin Pu C. Lalrinsanga pawh *Fall Army Worm* a rawn len khan awmhmunah ka lo manganpui ve em em a, amah hi a hmunah te kalin a bei nasa em em a, *Fall Army Worm*-in a ngam lova, a champion a ni. Ka lawmpui khawp mai.

Tin, an department Food & Civil Supplies te, Agriculture te leh Irrigation te hi inlalawn deuh them an nih avangin a hrana sawi lovin ka sawi pawlh deuh nuaih ang a.

Mizote hi intodelh thin kan ni a, abikin chawah kan intodelh thin a ni. Tampui mitthiah chuan khaw thenawma pur chawk chang te a awm ang a, a tlangpui thuah chuan Mizo mipuite hi intodelh thin kan ni. 1966 chho atangin nunphung a khaihlak a, ram a lo buai a, lo neih ngam a ni ta lova, vai buh alo lut bawk si nen, ei leh barah kan harsain kan intodelh lo chho ta a ni. Chutiang chuan tun hun hi kan thleng ta a ni. Food & Civil Supplies Department in mipui eitur a ngaihtuah tang tang a, chutih chhungin vairam atanga buhfai la lut lova ei leh bara kan intodelh theihna turin Agriculture hian hma ala tang tang bawk a, a tam thei ang kan thar theih nan Irrigation & Water Resources Department-in tan a la bawk a. Chutiang chu kan inkhaichhawn dan leh kan inpuih tawn dan nia ka hriat a ni a.

Tunah hian kan statistics hi a inanglo deuh nual em ka hrethiam chiah lova. Kum khatah hian buhfai metric ton 85,467 kan mamawh niin ka hria a, kan tharchhuah hi metric tonne 60,010 a ni. Buhfai kan lei zat chu metric tonne 14,267 a ni a, buhfai hi FCI rate bakah rate hran a awm a. Buhfai lei nana kum khata vaibelchhe 204 aia tam deuh kan hmang a. Mipuiin kan phurh char chara sorkara let leh hi vaibelchhe 125 a ni a, kir leh loa bo hi vaibelchhe 78 a tling tlat a ni. Chumi awmzia chu sorkarin a lei a, mipuiah a hrall a, mipui atanga sorkara let leh hi vaibelchhe 78 vel hian a daihlo a ni. Hemi statistic figure hi Starred Question chhanna atanga ka rawn lakchhuah a ni. Chuvangin ei leh bara intodelh hi kan tihmakmawh a ni. Kan Governor te, kan Chief Minister te leh helaia mite zawng zawng pawhin ei leh bara intodelh kan duh a, chu chu kan tihmakmawh ani a. Department te leh he sorkar pawh hian chak lehzuala hma an lak a tulin ka hria. Kumtin vaibelchhe 78 hi kan hloh ringawt mai anih hi.

Tunah hian MIRSAC-in assessment a siam danin, hectare 74,644 hi leileta siam theih chin nia a hriat a ni a. Amaherawh chu hei hi a hlui tawh a, a rintlak tawh vak lovang tih a ni a. ICAR leh Land Use Board, Jorhat ten survey hi an nei leh dawn ni awm tak a ni a, tuna mi ai hian a tam mai thei a ni. Tin, leilet kan siam pawh hian kan buh thar hi a punglo tlat mai a, 2013 atanga tun 2021 thleng hian kan buh thar hi a punglo tlat a ni. 2012-2013-ah hian metric tonne 77,000 kan thar a, a tlem chho hret hret a, 5,000 te, 6,000 te, 2017-2018-ah phei chuan 5,900, 2018-2019-ah 6000-ah a chho leh a, a thar ber 2019-2020-ah khan metric tone 60,000 vel chauh kan thar chhuak a ni; chu chu kan dinhmun a ni.

Tin, kan buh thar pawh hi a hlawk lo em em mai a, hectare khatah kg 1,688 chauh hi kan thar ani tlat a ni. Hei hi India national average-ah chuan hectare khatah kg 2,600 a ni phak a, khawvela thar hlawk ber chu China a ni a, hectare khatah 6,700 a pha a, Indonesia-in a dawt a, Bangladesh-in a dawt leh a. Hei hi kan buh chinin a zir lo nge nia kan enkawl danin a zir lo, India ramah kan leilet buh thar hi a hlawklo lawt lak a ni. Research te beiha, kan buh chi nge, kan leilungte pawh hi exam chian a, thar chhuah tam tur buh chi kan chin hi a tul a ni. Chu chu kan intodelh dan tur kawng pawh niin ka hria.

Tin, Irrigation chungchang hi sawi leh ka duh a. A lawmawm ka ti hle a, vawiina Memberte thusawi tam tak khan anmahni bial chhunga leilet siam mek leh siam tur la awm thute kan ngaithla a. A theih hram chuan kan Minister hian Mizoram khawi hmun hmunah nge leilet kan neih a, engtia zau nge kan neih tih te hi min hrilh thei se a lawmawm ngawtin ka ring a. Champhai te, Vanlaiphai te, Mat te, Chamdur te, Bilkhawthlir phai te, Tlabung phai te a awm a. Chhimlamah a awm bawk a, khawthlang phei chu potential area tha tak tak a ni a. Chung zawng zawngah chuan buh chin a ni em? Buh chin theihnaa siam theih engzah nge la awm? Tunah phei chuan irrigation hmangin NASA lehzualin hma a lak theih a ni tih a hriat a.

Tin, central atangin policy tam tak a awm a, RKVVY, RAFTAR te, NABARD te, RIDF te, FOCUS te; khatiang tam tak kha a awm a ni. Chuvangin, heng kan hriat hianin *challenge* thar hi keimahah pawh min pe a, kan Minister-ah pawh anih ka ring a. Tin, central programme zawng zawngte leh an tanpuina nen, Mizoram-a SEDP te nen, kan buh thar hi nakum atang chuan tlem tlemin iti hlawk deuh teh ang tih kha kan rawt duh a ni.

Tin, kan House Leader hian a sawi a, a dik khawpin ka hria a. Mechanised farming kan mamawh tawh a, tunah sorkar hnathawh dante kan thlir a, tractor 52 leh power tiller 250-te an han pe chhuak a, JCB-te an hire bawk nen; kan leilette pawh a zau duak duak tur hi a ni a. Chuvangin, Agriculture buh thar tamna tura hmachhawp lian tak tak laia hi uluk taka bawhzui a tul a ni tih kha ka han sawi duh a ni.

Tin, a dawt lehah chuan LAD chungchangah, thinglang village council enkawltu chu LAD a ni a, kan hria a. Hmanni lawkah village council te, local council te inthlan kan nei a. LAD-in a enkawl bika chu village council a ni ta a. Khatah khan 240 velin election petition kha complain-na an thehlut a ni. Vote-te chhiarnawn a ni a, result-te a danglam a thui tak sawilo ta ila. MP kan inthlang a, AMC kan inthlang a, MLA kan inthlang a, complain a awm vak lo. voting machine kan hman achinah khan complain a awm lo tlat a ni. Amaherawh chu, village council-ah ballot paper hmanga inthlanna-ah khan complain a tam tlat. Chuvangin, village council level inthlanna-ah hian voting machine-hi hmandan a awm em tih kha kan hre chak mai mai a.

Chutih rual chuan VC inkaihhruaina dan te leh an power-te pawh ennawn a hun khawp a. Tin, *three-tier administration*, panchayati raj-ah a awm a, chumi dungzui chuan

kan kal ve te pawh hi a hun a. A ngiala ngana kan hmanglo anih pawn keimahni mizia leh kan ram mila her rema hman kha a remchang tho a. Chung atan te chuan hmalakna a awm tawh tih te pawh kha kan Minister hianin min han hriattir se ka duh a.

Tin, a dawt lehah chuan Fisheries chungchangah, economic survey-a alan danin fish farm-hi hectare 16,413 a ni. Sangha chu a tui a, chawhmeh tui tak a ni a, a duhlo hi kan awm vaklo ang. Chuvangin, Mizoram-ah a market a tha tawk tih a hriat a. Kan han ngaihthlak tam takah khan Andhra Pradesh atangin nasa takin sangha alo lut tih te kan hria a. Chuvangin, Fisheries Department hi Mizoram tan mizo mipuite sanghaa min chawm turin tan han la se, potential kan nei tha a, tin, chaw te pawh subsidy-in engemaw chen te chu bul tan nan chuan a pek theihin ka ring a. Chung atan chuan Mizoram pumpui hi Fisheries atan hian potential area a ni theiin ka hria. Champhai ah pawh sangha dil tam tak a awm a, khawthlang ah a awm a, chhim tawpah a awm a, hmar tawpah a awm bawk a, ram laili-ah pawh sangha dil a awm vek a. Chuvangin, Mizoram-ah hian sangha dil hi a tha tluan vek, khawi hmun laiah pawh tih kha a chiang a. Chuvangin, helamah hian kan kal uar hi a thain ka hria.

Co-operation chungchangah han kal ve leh ila. A pawimawh zia hi kan sawi thin a, am Maherawhchu, mizo mipui hian atakin kan man lo em ni aw, heti tak maia Cooperation movement-a hi a an chhuah that theih loh hi ka tia. A bikin thingtlang leh khawi khawiah te phei chuan a tha viau a, society ngel nghet leh tha tak tak, mipuite pawhina an hlawkpu tak tak a awm a. Chutih rual chuan Aizawl-ah hi chuan a hlawhtling thei family society-hi a awm nual lo emaw nile te hi ka tia. Chungah chuan inzir te pawh a ngai a.

Department lam pawhin *awareness* hi kan nei tawk lo em ni aw tih te pawh a awl a. Chuvangin, hei hi thil tha tak mizo society nena inrem ni te hian kan sawi thin a. A inremna lai taka hi mi tam takin kan la man chiang lo ni te pawhin a hriat a. Chuvangin, hemi chungchangah hian hma han lakk leh deuh te pawh a tha mai thei a ni. Chu chu Pu Speaker, ka sawi theih tawk ni mai teh se. Ka lawm e.

**SPEAKER** : Awle, kan chawl rih ang a, dar 5:30-ah lut leh ang u aw. Chawl rih ang u le.  
*(Recess)*

**5:30 PM**

**SPEAKER** : Kan sawihona te kan lo zo ta a. Kan Minister zahawm tak Pu K. Lalrinliana, a Demand-te rawn windup-a, sawifiah ngai te rawn sawifiah se, tin, House-ah pass rawn dil bawk se. Tunah i lo sawm ang.

**PU K. LALRINLIANA, MINISTER:** Pu Speaker, ka lawm e. Vawiin ka Demand sawihona Fisheries bikah Member zahawm tak te 20 lain Fisheries Department hmalaknaa

lawmthu sawina te, kan duh zawng, chutiang chuan kal ila, chutiang chuan a tha ang e, tih ngaihdan te an rawn sawi a, a lawmawm hlein ka hria a. LAD-ah Member zahawm tak te 16 in an rawn sawi bawk a. Tin, Food, Civil Supplies & Consumer Affairs-ah Member zahawm tak te 23 laiin an sawi bawk a. A tam berah lawmthu sawina kan dawng hi kan lawm tak zet a, kan phu lo ka ti khawp mai a. A ropui ka ti a ni.

Pu Speaker, niminah kan Senior Member Pu Zira khan, Member zahawm tak ten react tura an beisei kha *written-in*, a hnuah kan pe leh ang che u anga in duh em a ti a. Kha kha a tha riauin ka hria a, Pu Speaker. Tih ve theih chu ni sela Member ten min phal sak theih chuan, kha kha ka va duh em. A tha maw? (**SPEAKER:** *An va phur ve.*) A nih Pu Speaker, react lo mai ang aw. A lawmawm e.

Nimina Pu Zira rawn sawi ang khan, ka department-te an active a, zawhna ang chi-ah pawh khan chhanna an rawn peih thlap a ni, type vekin. Khatiang kha a ni a, ka department hrang hrangah. A lawmawm a. Hei hi nakinah Member-te hnena rawn sem mai a tha ang e.

Fisheries-ah hian kal ta ila. Department naupang te ti mai ila thangkhat lian zet chu a ni teh meuh mai a. 1993 khan Agriculture Department atangin indangin department hrang angin an awm ve chauh a, directorate hran kan nei ve tan chauh a ni a. Tunah hi chuan lo thanglian zelin District Office te kan nei kim ve thei tawh a, district tharte tihlohah chuan. Staff pahnih pathum lek te han neihna chu kan nei nain motor kawl tur pawh kan nei kim hleithei lova. Chuvangin he department hi nichina kan han sawi ang khan, mi sangha dil, ramhnuiaia zuk enpui ngai, an nei tak tak em tia zu en tur pawh hian motor an neih loh avang hian harsatna tam tak an tawk a. Farmers neinung deuh hi chuan an motor-ah an phur mai a, a neinung lem lote han endik dawn hi chuan a ngaihna hi a awm lova, an khawngaihthlak khawp mai a. A tihdan kawng hi engtin nge ni ang kan ti a kan sawi kan sawi thin a. Hemi kawngah pawh hian ka han report ve hrim hrim a, kan Finance Minister leh Member ten min hriatpui atan pawh.

Tin, Covid-19 hripui len lai khan, Member zahawm tak ten an sawi tawh ang khan sangha dil sah hleihtheih loh, han saha market-a han pek tur pawha tih hleih theihloh lai kha kan nei a. Kan Department lam ten Home Department atangin phalna lain sangha kan nghei ai chuan tiin eng emaw chen chu an hralth a. Chutiang chuan department-in hma a han la a, amaherawhchu duh khawp kha kan nei thei lo a. Chumi piah lamah chuan a chi hi kan la siam chhuah tam theih loh avangin kan ramah kan la intodelh lova, supplier ten anmahni hatchery atangin duhkhawp pek tur an neih theihloh avangin phai lam atanga lak pawh kha a harsa a, chuvang chuan duh angin a chi pawh kan in-supply kim tha hleithei lo kha a ni a. Chuvang chuan kan tharchhuah pawh hi tunkumah hian a tlem phah ang tih hi a hlauhawm ang reng khawp a, duh ang tawk sangha chi kha a hunlaiin kan inpe thei lo a. Chu chu ka han sawi duh a, Covid-19 avanga harsatna kan tawh ah.

Tin, chuti chung chuan SEDP atangin kan Chief Minister zahawm takin sangha chi leh a chaw te subsidy-a leina tur atan nuai 420 chuang lai mai min pe a, chumi chuan a theih ang angin farmers-te hnenah sangha chi kha subsidy-in kan pe a ni.

Tin, chakai farm kha, pilot project kan han siam chhin a, SEDP atangin nuai 54-a siam turin kan han inbuatsaih a ni a. Hei hi Kolasib Dumlu Zau-ah kan buaipui a, a chakai khawina tur hmun kha hmun thuma siam tur a ni a. Tunah hian hmun khat kan zo tawh a, a chakai pawh 3,000 chu kan dah tawh a. Chutiang chuan kan khawi mek a, a dang pahnih hi tunah hian kan siam belh mek a, a chaw dah khawlna turin leh thil dang dang, a note han vulh lenna tur ang chi ruahmannna te kan han siam tan chho mek a.

Tin, fresh water-a tih tur anih avang hian India ramah hian tunge ti tawh tih te kan han zir chiang a kan department lamin, mahse a ti hi kan la hmu lova. Chakai farm hi chu a awm neuh neuh a, *fresh water crab* ang chi siamna hi a la awmloh avangin keimahniin kan han ti ang a. Kan ramah hian a dik tak chuan a market a tha a, bazaar-ah in lei ve foin ka ring a. Nikum fur laia changel kawra an fun ka leiah pawh khan 300/-in ka lei a 7 chauh a awm a ni' 1 man kha a to em em mai a ni.

Chutiang anih avang chuan, a ti ringawt lachhuak ta ila, a kg-in ti ta ila a man a to viau ang a kan ti a. Chutiang chu anih avangin chakai hi In tinah hian kan duh vek avangin nakin zelah pawh kan ram tan a la tha ang tih hi ka ngaihtuahnaah hian a awm ve rauh rauh a. Pilot project a nihna angin theih tawp kan chhuah ang a, hlauhthawnna kan neih ang chi pawh a awm ang a, a awm a ni.

Tun Ni 13 khan Thenzawl-ah ka han kal a, chutah chuan chakai farm mimal anga lo ti tan an awm a, Pu Tanpuia a ni a, a hmunah kalin ka enpui a. Ani pawhin chakai 1000 a lo dah a, a lo buaipui ve nasa a, chakai pawh a nei him dam tha chuan ka hria a, a thi awm a la hmu lo a ni. Chu chu a mimal anga tih a ni a. Tin, luidunga chakai humhalh khuate pawh an awm a, chungte chuan Aizawl-ah hian an rawn hrall thin a, market pawh a chhe vak lo a ni. Khatih lai kha chakai farm bik chungchanga ka sawi theih ni se.

Tin, sangha chi hi kham khawp kan thar theih loh avang hian, a pui hi nei tha ila kan ziaawm phah ang tiin kan ngaihtuahnaah a awm a. Chuvang chuan a pui vulhna tur hmun kan neih thute leh kan mamawh thute central-ah kan han hrilh a. Dik tak chuan sangha nazawng hi 'a tui e' han tih tur hian a dam kim thei lo a, than pawh thang tha theilo hian a lo piang thin a. Chuvang chuan, Central sawrkar atangin nuai 500 lai min rawn pe a, chutiang chuan Thenzawl-ah khian tih kan tum a, tun inrinni pawh khan a hmun tur pawh department-in a tha ang e tiha a thlan kha en turin Director te nen kan kal a. Tui mamawh dan tur te kan han en a, mamawh ang zat lak dan tur te, chutiang chuan kan han inruahman a.

Tichuan, a pui kan neih chuan hatchery nei te, entirnan: Zobawk Fish Farm te, Tam Dil te, Kolasib te leh Zawlnuam te leh hmun hrang hrangah hatchery, sangha no neih tirna

hmunah a pui tha kan pek chuan, a note dam takin chutiang chuan farmer te tana tangkai tur tharchhuah theih inringin kan han ti a. Tun tumah pawh khan a no te tharchhuah kawngah tan ila teh ang kan ti a, Lengpui Fish Farm-ah hatchery, tih keu tumin a pui tur kan dap a, kan hmu zo lova. Department-in, ‘i sangha dila mi man mai ang’ an ti a, kan man a. Chu chu kan tui tir teuh a, nuai 80 bawr vel an tuia ngaih a ni.

Amaherawhchu, an keu chho tan tir kha an thi nasa a, chuvang chuan, duh angin kan thar tam lova, a nuai tel erawh chu kan thar ve tho a. Tichuan, Pu Zira bial Tam Dil-ah pawh chutiang chuan an ti keu a, a hmunah te kalin a keu te chu kan han en a. (**SPEAKER : Ka bial zawk a nia aw**) Aw, Pu Speaker, ka tihpalh, i bialah an thar a, eng emaw chen chu.

Tin, chumi piah chuan Zobawk-ah, nichina Member zahawm tak tak ten an sawi ang khan, kan ram lui sangha hi khawi chi a awm lo maw, en teh ang u kan ti a, “nghahrah te, lengphar te, nghaphusen te hi a khawi chi ang a, i enchhin ang u” an ti a. Chu chu Zobawk Fish Farm-ah khian hatchery te kan han tuai thar leh a, an han tui tir a. Amaherawhchu, a keu chhun te pawh a dam tha lova, tunah khian 1000 vel chu damah kan ngai a. Chu chu tuna kan dinhmun a ni a. Nghaphusen hi kan khawi lian mek a tunah hian Lengpui farm-ah khuan, lengphar nen, chu chu tunah hian kan la tui tir lova. Chutiang chuan, sangha chi-ah intodelh tumin hma kan han la a. A pui vulhna kan neih tawh chuan hma kan sawn ngei ang tih pawh kan ring a ni.

Tin, nichinah Member ten an sawi tawh nachungin, revenue hi, ni e, kan thawhchhuah atanga hmuh chu a ni hran pa lo va, kan pawisa hmuh atang pawh hian subsidy-in farmers-ah kan pe a. Tunhma chuan a thlawna pek thin a ni a. Amaherawhchu, a thlawn a pek hian a duh vak lo ten hrall leh chhawn turah te an lak thin avangin a tak taka an duh a ni tih entirnan - subsidy pawha lei ngam te hi chuan an ti riral lo ang tih ngaihdan lo piang atangin hetiang hian subsidy-in kan han pe chho a. Khata kan hralthna lo kir pawh nuai 83.84597 lai revenue kan chhung a ni.

Tin, sangha vulhtute leh luidung sangha humhalhtute, NGO pawl hrang hrang ten an hmalakna han hmuh hian a lawmawm a, a phurawm em em mai a. Darzokai te, Tuipui te leh hmun hrang hrangah tuna sangha an lo humhalhna km 1 te, km 2 te an humhalhna kan kal tawh naah hi chuan a hmuhnawmin han tih chhunzawm a chakawm em em a, an hlawhtling hian kan hria a, an humhalhna pawh a tha a. Chutiang chu anih avangin khang a humhalhtute, sangha dil neitute, luidung a sangha a eizawngte tan pawh registration fel tak tih sak ila kan ti a. Chumi-ah chuan *fishinfomizoram web*, portal & mobile apps hawnna te hmanni lawkah kan nei a, chungte chuan online in registration pawh an ti thei ang a.

Tin, an sangha dil hmun zawng zawng pawh kha google atangin kan lo en thei dawn a, kan lo save thei dawn a. Chutiang chuan sangha dil neilote’n sangha dil ka nei tia tanpuina lo dil emaw ang chi kha a theih loh ang a, a neitu dik tak te chauhin chutiang hawi zawng chuan an kal thei ang a. Chu chu online pawhin application atih theih ang a, chanchin hre

tur pawhin kan district officer te hnenah pawh a tih dan tur engkim zawh theih turin khatiang khan tunah hian kan ti a. Dil nei zawng zawng, lui dunga humhalh pawl leh sangha mana ei zawng ten registration an ti thei tawh dawn a ni. Chutiang chuan *data base* mumal takin kan kalpui thei turah kan ngai a, tunah hian chutiang chuan hma kan la a ni.

Tin, PMMSY kan ti a, *Pradhan Mantri Matsya Sampada Yojana* tih a ni a, hei hi central-a Fishery Ministry thar lo din hnuah hian *Blue Revolution*, khatiang chi kha titawpin, heta kal tawh tur hian min ti a. Chuvang chuan keini state atan pawh hian 2020-21 to 2024-2025 inkar atan hian vaibelchhe 1,172 lai mai kan hman turin ruahmanna an nei a. Tunah hian 2020-2021-ah approve tawhin vaibelchhe 1,172 kan nei a, tunah hian Central Govt. share leh State share a awm a, beneficiaries share a awm bawk a, chutiang chuan kalpui tur a ni a. Chu chu 90:10 a ni ang a, 90 kha central leh state-in 9:10-in chutiang chuan kan intum sem tur a ni dawn a ni.

Tin, hemi hnuiah hian tanpuina, dil thar siam turt, dil siam thatna turt, sangha note khawi lenna turt, chutiang chuan *ice plant* siamna turt leh thil chi hrang hrang kan mamawh ang chi siamna tur kha a awm ang a. A then chu department anga ruah hmanna kal tur te a ni ang a, a then a chu beneficiaries te chanvo anga kalpui vek tur a ni dawn a ni. Chutiang chuan state level committee a awm a, district level committee a awm bawk a, chutiang chuan *constructions of new pond* tun hnuiah pawh hian mi 700 lai district hrang hrangah pek tum mek, buaipui mek a ni a. Tin, *fish seed rearing unit* hi beneficiaries mi 98 hnenah pek tum a ni bawk a, tin, ‘input support for pedi-cum fish culture’ tih hi, hei Champhai ah hian an hlawhtling em em mai a, ram vawtah chuan tui pan deuhah pawh buh nen a lo tihpawlhi theih khawp mai a, ‘a tui pawh a tui deuh bik’ a ti a, Pu Manuna, kan Minister zahawm tak hian, chungte chu Champhai-ah kan tih hlawhtlin em avang khian duhsak bik deuh niin, khawlumah chuan enchhin nan te han hmang chhin ila tiin chungte chu buh nena sangha vulh kawp theih dan tur te kan ngaantuah a.

Tin, sangha khawi mawi, *aquarium fish* ang chite pawh hi central sorkar hian a ngai pawimawh em em a, tam takin an sitting room-a an dah ang chi te han kalpuina tur tlema zawng kan nei bawk a. Tin, chu bakah chuan hatchery han tihna tur te pawh tlema zawng kan nei bawk a, ice plant han siamna tur te pawh beneficiaries 1,101 lai chutianga tihna tur atan chuan central sawrkarin min rawn pe a, tah hian beneficiaries share te, Govt. of Mizoram share te, Govt. of India share te pawh a awm a. Tin, hemi atang hian hmanni kar hmasa lawk khan CADC-in DPR an siam atangin tlemte central sawrkar pawhin nuai 100 leh tih bawr vel lek an rawn sanction a. Tin, chung lo chu private firm pakhatin a siam pawh an rawn sanction bawk a, hei hi keimahni department through-a tih a ni tih kha ka han tarlang tel duh bawk a.

Tin, nichina kan sawi ang khan, district thar kan nei a, heng kan district thar pathumah hian office kan *run* loh chuan nakinah beneficiary’s selection te leh enkawl chungchangah a buaithlak dawn a, chuvangin kan *run* ran hi a ngai a, chumi atan chuan

theihtawpin hma kan la chho mek a ni tih kha ka sawi mai ni se, chu chu Fisheries-a ka sawi theih ni mai se a thain ka ring a.

Tin, LAD-ah VC election-a EVM hman chungchang kha Pu Vanlalthlana khan a sawi a, hei hi a dik khawp mai a. Tuna ballot paper-a kan tih hian a thlaktute hi kan inang lova, a bik takin hei hi react a ngaiin ka hria a. Nichina kan sawi ang khan complaint ho kha village council 200 chuang zet an ni a, chumi chu anih avangin EVM hman theih tur hian State Election Commission-ah pawh hian la thlen ila a thain ka ring khawp a, keimahni tan pawh, a department tan pawh a buaithlak a ni. Hei hi hma kan lo la ang tih kha kan sawi duh a.

Tin, VC rules siamthat chungchangah pawh hian tuna dan kan neih hi a hlui tawh lutuka siamthat a ngai a, chumi atan chuan committee pawh kan din tawh a, tunah hian kan zirchiang mek a ni tih kha kan sawi duh a.

Tin, 15<sup>th</sup> Finance Commission nikum kan budget-ah khan a rawn tel a, vaibelchhe 93 kha kan nei a, tunah hian central sorkarin min rawn released chinah hian local body grant *tied fund* atan vaibelchhe 23.25 min rawn released tawh a, *untied fund*-ah vaibelchhe 23.25 bawk min rawn released tawh bawk a. Hei hi District Council-ah te an hman ve tur atan vaibelchhe 4.83, *tied fund*-ah kan pe tawh a, a dang vaiblechhe 4.83 tho *untied fund* hi treasury-ah a la awm mek a, la pek tura buatsaiah mek a ni bawk a. Tin, Department-in kan enkawl turah chuan vaibelchhe 18.41 *tied fund*-ah a ni ang a, *untied fund*-ah vaibelchhe 18.41crore tho a ni dawn a ni. Khang kha kan han sawiho atanga ka han tih bik deuh ho a ni.

Tin, LAD hi ramri zauh nan kan hmang tangkai a ni tih Pu Lalrintluanga Sailo khan a rawn sawi a, kha kha a that ve deuhna lai a awm a. Saihapui -V te, Zampui tlangdunga Phuldungsei VC kan han pek thar te, Thinglian VC kan han pek te pawhin tunhma atanga LAD atanga kan han pek te hian ramria kan mi leh sate rorelna kan han pek khan, ramri bul hnaia ramdang mi awmte pawhin an lo zah a, ramria min nekna pawh hi tunhma te ngaihtuah chuan a ziaawm sawt tawh viau a, hei hi LAD-a hmalaknaah chuan chhinchiah tlak tak a niin ka hria a, chu chu kan sawitel duh bawk a.

Tin, LAD hian park hi 11 (sawmpakhat) lai kan enkawl a, park kan enkawl atanga revenue lo lut kan han chhut hian sum leh pai mamawhna avang pawh hian revenue tun aia tam kan hmuh theih nan *out-sources*-in kalpui ila tiin kan buaipui a, committee pawhin kan rel tawh a. Drafting committee pawh kan siam a, chung chuan an rawn thehluh hunah kan park neihte hi tun aia sum hmuh nan pawha hman theih leh mipui pawhin an chhawr tangkai theih tura hman hi a pawimawh kan ti a. Lalsavunga Park-ah phei chuan 2015-2020 inkarah pawh hian ₹19,22,125 lai pawisa kan hmu a, Muthi Park-ah te, Brig. T. Sailo Park, Lengpui leh hmun hrang hrangah kan park neihah hian ₹41,94,215 lai revenue hi khami hunchhung khan kan chhunglut ve a ni.

Tin, LAD Directorate building hi tunah hian kan sa mek a, kan la zo lova, a sak hunchhung tur pawh a la pel lova, contractor ten 25% vel an sa zo tawh a, Covid avangin nikum khan an sa chak thei lova. Chutiang chuan tuna kan building sak mek, tuna kan luah lai mek DLAO Office, Aizawl hi Directorate-in kan va fin rawih a, chep takin kan awm a Ramhlunah sawn. Chu chu an sak zawh chuan kan inthiar chhuak phei thei ang a, thenkhat thahnemngaiin, “in chhuahsan hunah an thawl awm si a, engtin nge in tih dawn” te an ti a. Mahse, a DLAO Office taka hi tuna kan pawisa neih chin hi chuan a daih dawn lova, nuai 300 vel kan neih belh leh theih chuan sawlai saw chu kan chhuahsan fai thei ang a tih te kan ngaihtuah a, a ui chu kan ui viau a. Amaherawhchu, kan ram thang zelaha mamawhna tam tak kan nei pawhin kan ring a, chutiang chu tuna directorate building kan sak meka kan dinhmun leh a kaihhnawih ka han report theih ni se.

Tin, 15<sup>th</sup> Finance Commission grant kan dawn atang hian Public Financial Management System hi an rawn ngai pawimawh khawp mai a, hengah hian bank account-a kan neiha, ‘a hman theih e’ finance-in an rawn tiha Directorate, LAD an rawn peka DLAO kan pechhawng ang kha an phal tawh miah lova. Treasury hman bik kan neih atanga direct-a village council-te pek tawh tur a ni a. Village Council-te hi an population a zira pek tam leh pek tlem an ni a, chutiang chuan uluk taka sum hi kalpui a ni tih kha kan sawi tel duh a. Tin, chumiah chuan digital signature certificate te tunlai technology thar zel hmanga VC te tihchak leh VC level thleng pawha e-governance tih hmasawn hi sorkar thil tum lian tak a nih avangin, hemi kawnga hmalakna peng pakhat a tan VC ten 15<sup>th</sup> Finance Comission Grant leh thildang atanga an khaw hmasawnna tur atana ruahmanna an siam te hi Gram Swaraj Portal-ah an dah zel a ngai tawh a. VC ten Bank Account-a grant hmang tur chuan digital signature certificate an neih a ngai tawh dawn a ni. Chutiang chu sum leh pai bo thlau turah a vengin kan ring a. Amaherawhchu, hemi 15<sup>th</sup> Finance Commission Grant-ah hian a enkawlna atan POL emaw han tihna tur hi kan nei miah lova, kan mangang khawp mai a. Tunah hian state sorkar-ah eng emaw zat administrative post a tan tiin cheng nuai 186 kan dil a.

Kan JE te hi district khatah pakhat te an awm a, chungte chuan VC zawng zawng hna kha an enkawl a ni a. An hah em em mai a, a inkar hlat si a, a then chu kea kal ngai tam tak a la awm a, motor-a kal emaw motor hire tur pawhin thil tam tak a la ni zel a. Bike tak ngial pawh an la neihloha vang hian chutiang chu kan mamawh hle a ni tih hi ka han sawilang tel duh bawk a ni.

Tin RGAC scheme atang te pawh hian hei ‘Rashtrya Gram Swaraj Abhiyan’ an ti a, heng atang hian inrelbawlna hrang hrang min pe a, hemi sum a tang hian training te kan ti a. Tunah hian mihring training hi 22,464 kan pe tawh a a ni. An Account enkawl dan turte leh VC-te hmalak dan tur thil hrang hrangah pek a ni tawh a ni. Tin, RGAC scheme hnuiai hian ‘VC Inpu’ tia sawi thin, State Panchayat Resource Centre (SPRC) district pangnga - Champhai, Serchhip, Mamit, Kolasib leh Siaha ah te din niin, heng VC Inpu te hi LAD

kaltlangin SIRD leh Panchayat Raj lamin kan enkawl mek a, heng hmunah te hian VC-te tan training kan pe thin a ni.

Tin, VC House sakna kan pek tawha hi nuai 20 a ni a, chu chu VC pangnga kan pe hman a. A repair-na hi nuai 4 vel a ni a, kan pe hman a. Amaherawhchu, computer te pawh kan pe a, tunhnuah hian VC house sak lehna hi kan dil a, an niin a theihloh ang an ti a tun kum Covid lai khan. Mahse tun kan Session dawn hnaiah khan a theih leh tur thu min rawn hrilh a, eng emaw chen chu kan nei thei turah kan ngai a. Chuvangin 2020-2021 atana central sorkar, Ministry of Panchayati Raj-in Mizoram tana Annual Action Plan a approved zat hi vaibelchhe 13 a ni a, Annual Action Plan 2020-21 atana fund an release tawh zat chu a zat ve, 50% a ni a, chu chu nuai 693.25 a ni.

Nichina ka sawi ang khan Covid hri len avangin VC House 150 sakna kan rawt kha min rawn pawm sak ta lova, tunah min rawn pawm sak leh takah chuan vaibelchhe 13.5 - 29.635 inkar hi kan neih belh ang a. Chu chu tun kan budget-ah khan an la reflect lo niin a lang a. Chunga vang te chuan ‘a va tlem ve’ an ti a, nikumah khan vaibelchhe 93 kan neih avang khan a lang tam a. Tun kumah chuan vaibelchhe 60 leh something vel anih avang khan a lang tam a, a rawn tlahniam angin a lang a. Amaherawhchu, a la tam belh dawn a ni.

Vawiina Video Conferencing kan department lamin an han neih pawh khan an inphal zau viau a, chungah te pawh chuan eng emaw chu kan la neih belh leh thei turah ngaih a ni a. Computer set pawh 500 lai neih belh leh thei turah kan inngai a ni. Chutiang chu tuna kan dinhmun ani a.

Tin, *excluded area* fund, 14<sup>th</sup> Finance Commission-a kan dawn ve loh avanga vaibelchhe 45 min rawn pek kan hman zawk hma khan central-ah ‘vaibelchhe 25 min pek belh rawh u’ tiin kan zuk dil belh leh a, mahse vaibelchhe 16.24 min rawn pek belh a. Tunah hian District Council atan vaibelchhe 8.64 min pek belh bawk a, tunah hian kan release tan mek a ni. Kha kha LAD-a ka han sawi theih ni mai se.

Sawi dawn ila, sawitur tam tak hmalakna a la awm awm e. Concept paper kan thehluh pawh hi eng emaw zat kan nei a. Village Council te leh veng hrang hrangah te pawh a ni ang a, YMA-te pawhin House sakna fund ang *Thlanmual Shed* atana an dil te pawh hi MLA te pawhin kan dawng theuhin a rinawm a. Henga tante pawh hian a rit si a, tiin kan han dil a. Chungah te pawh chuan kan han thehlut a, engnge kan an zel ang kan hre lova.

Tin, hmundanga mi han tichangtlunna tur te, entirnan Tlawng Lui min han dawmna tur ang chi te pawh hi a lo lut a. Chutiang chuan thil hrang hrang a lo lut a, a hlawhtlinna tak kan la hmuh loh avangin, kha ti zawng kha kan hmalakna te ka han sawi ni ta se a tha ang e.

Food, Civil Supplies & Consumer Affairs-ah react tura ka ngaih kha react a ngaih tak loh ah chuan tawi tein ka han sawi lang a. Kan sawi hmasak ber duh chu, Legal Metrology hi staff kan indaih lo khawp mai a. Member zahawm tak Pu Biakzaua pawh hian thahnem a ngai em em mai a, “Lawngtlai-ah Working Standard Laboratory building sakah hmanruate pawh in dah tawh a, tun thlengin in la *run* lo a, mipuite’n kan chanvo dik tak kan chan theih nan hei hi a pawimawh a ni” a ti a, a dik khawp mai a. Hnahthial-ah pawh kan sa a, a inang chiahin kan dah thei lo a, Mamit-ah pawh kan sa a, kan nei thei lo a. Tunah Saitual leh Khawzawl-ah min rawn pe leh a, han sa leh pawh ni ila, a sak chu kan sak a ngai a, sum pawh kan nei tawh a, mahse kan function hlei thei lo a ni. Mipui hi chuan kan mamawh khawp mai a, staff kan indaihlohma hi a tam em mai a, department hrang hrangah pawh a ni ang a, sum harsatna avang pawhin, chu chu ka han sawi kai duh hrim hrim a.

Legal Metrology Department hian bukna leh tehna dikah te hian hma kan la a. Nichina kan ngaihmawh em em, buhfai buk lung dik lo hmang te pawh an lo la awm fo mai thin a, dawkate pawh hian an buk lung tih dikloh hi an lo nei thin a, chungah te chuan theihtawpin kan staff-te hian hma an la thin a. Bukna leh tehna chi hrang hrang, beam scale, counter machine, CIA weigh, water metre, weigh bridge, electronic weighing machine, platform machine, capacity measures, length measures tih zawng zawng nen chi 11,262 laiun tun hunah hian endik a ni a, chung endik atanga a dikloh avanga dan anga sum an chawi tir, sorkara kan thehluh chu cheng 5,64,965 lai a tling tawh a ni. Tin, ‘Enforcement of package commodities and contravention’ kan tiyah pawh hian bungraw fun sa, pack ang chi an zawrh chi hrang hrang Legal Metrlogy-ten an endikah hian tam tak MRP anga hrall loh te, MRP nawt reh te, a siamtu company in bel lo te, dan lo anga zuar tam tak an endik a, chung an endiknaa an hmuhchhuah zat chu 226 a ni a, bungraw man 69 lai pawh an nei a ni.

Tin, quality control, petrol, diesel, cement-ah te hma an la bawk a. Petrol leh diesel-ah hian 1493 an endik tawh a. LPG phurtu truck, gas buk tlinglo an endikah hian 1062 tun kum chhung khan an endik a, cement leh rod zuar an endiknaah pawh hian dawr 135 lai endikin, case 29 lai siam a ni a, cheng 2,91,900 lai pawisa pawh hi dan anga chawi tir an awm tawh a ni. Chtieng chuan mipuite chanvo humhalhna kawngah hian nasa takin hma lak a ni a, mipuite pawhin anih dan tur angin bungrua an lei theihna tur atan te, chhiah pawh anih anga a kal theihna tur atan te, kan motor tlo zawkna tur atana hmalakna te a ni a, kan insak bungrua pawh a lo tlo zawk theih nan rod dik leh rod tha mipuiin an lei theih nan a pawimawh em em mai a. Balu tha leh cement tha thleng pawhin endikna hi an nei a, tam takin an insak dawnin an entir a, la hman nachang hre lo hi tam tak an awm a. Entirnan, cement company pakhat bag khat awm ta se, balu chi hrang hrang va la ta se, a buk inang chiahin, pava chanve te tea bukin, a nih dan taka han chawhpawlhin, tuiah chiah se, balu tha leh tha lo, cement tha leh thalo hi a hriat em em mai a ni.

Chutiang chu anih avang chuan Legal Metrology hmalakna hi tunlaiah kan insakah pawh hian, PWD pawhin quality control an neih ang chiah hian Legal Metrology

Department-ah pawh hian cement te, balu tha leh tha lo endikah pawh hian mipuiten hman tangkaina chang hria ila tih kha vawiinah ka sawi tel duh a.

Kan sawi nual tawh a, kudam kan lo nei chhe tawh a, buhfai chhia a tam phah a, heng avang hian kudam sak pawh kan Chief Minister-in a ngai pawimawh a, kudam 10 kan sa zo tawh a, kudam 21 kan sa leh mek a, kan la sak bang kudam eng emaw zat sa leh turin tunah hian loan lak tumin kan kalpui mek a ni.

Tin, Consumers Welfare chungchangah Corpus Fund-te vawiinah chuan kan State sorkarin min phal sak tawh a. Central sorkar-in ruahmanna a siam dan chuan 90:10 share-in a ni a, 90 kha central-in a rawn tum ang a, keiniin 10, khami ratio khan kan kal thei ang a. Tunah hian central sorkarin nuai 180 min rawn pe a, state sorkarin nuai 2 min rawn pe bawk a, vaibelchhe 2 chu kan dah a Corpus Fund-ah hian, a pung pawh hi nuai 4,16,906 lai tunah hian State Bank-ah kan dah a ni. Hengte hi consumers-ten an rights an claim-na tur atana hman tangkai tur a ni dawn a, nichina kan han sawi, buk dik lo chunga an pek te leh rod chungchang leh thil dang dangah *Consumers Rights* hi kan humhimna tur atana hman tur a ni a.

Tin, District hrang hranga ‘Consumers Forum’ kan ti thin a, chu chu ‘Commission’ tih tawh tur a ni a, kan han tuai thar leh ang a, kan building neih ang angte pawh department dangte pawhin an lo luah tawh a, kan hmang ve duh tan tawh a ni, kan han ti ang a, mipuite’n an dikna chanvo humhalhna tur atan a pawimawh a, chutiang chuan hmalak kan tum a ni. Consumers-te ina an dikna, an Rights an kenkawh theih nan consumers chhantu magazine-te pawh tunah hian kan chhuah tir leh tawh a, mipuiin an lo inzir nan tiin ruahmanna te kan han siam a, sorkar ang pawhin a nuai chuang lai kan seng a ni.

Tin, Consumers Union-te nen tang kawpin theih tawpin hma kan la a. Pu Speaker, nimin lawkah khan *World Consumer Rights Day* kan hmang a, a pawimawh khawp mai a, kan thupui erawh chu, ‘polythene hman dan turah kan hman tlem a pawimawh a, a awm chhun pawh kan hman tangkai a ngai a’ tih te kan han ti a, chutiang chuan consumers-te dikna chanvo humhalh anih theih nan nasa takin campaign-te kan nei mek a ni.

Tin, monsoon stock, public distributors system chungchangah hian kan hriat angin leh member dangte pawhin in rawn sawi tawh ang khan, nikum khan supply centre 54 buhfai ei tur chhek khawl nan kan han thlang a, tin common centre 55 kan han ti leh chhin a, quintal 14,861 lai chhek khawl turin kan han inbuatsaiah a. Chutih lai chuan Member zahawm tak tak tena in sawi ang khan monsoon stock kan han tih hian, a hmaa kawng tha lo kan han tih saa stock-na tur, center kan inbuatsaiah piah lamah khan a ngai a. Vawiinah a kawng widening a lo nih takah hian harsatna tawk thei dinhmunah kan awm em tih DCSO-te report rawn pe vek rawh u kan inti a, chung an pek atang chuan, eng tiangin nge stock hi kan kalpui ang tih kan inngaihtuah a.

Entirnan Champhai, Khawzawl, Lawngtlai, Siaha tih te, Hnahthial te khatiangah kha kan in stock leh deuh hlek hi chu a ngai mai thei a, chu chu kan la final chiah lo a, ‘eng zah nge, khawi hmunah nge’ tih lai tak hi kan la ti thei lova. Tin, ration card dilna chungchang kan kalphung kan ti danglam deuh hlek a, tunhma chuan DCSO Office-ah ringawt mai an dil a, ration card holder-te, ration card thar nei duhte tan pawh a buaithlak lutuk a ni. Tin, thlak tul te leh tih danglam ngai te pawh a lo awm a, a buaithlak em em thin a, hetia supply centre hrang hrangah tiha, an niin a centre incharge ten an lo tihsak theih turin tunah hian mipuite an awlsam zawk nan tiin kilkhawr deuha mite pawhin awlsam zawk a, chutiang chuan kan kalpui a.

Ngopa-a kan kal tum pawhin Member zahawm tak Pu L. Thangmawia bialte pawhin an lo sawi ber a ni a, Ngopa atanga Champhai-a ration card siam tha tura han kal kha an ni tan chuan a hautak lutuk a ni. Chutiang chuan store keeper-ten emaw kan inspector-ten emaw an lo tih sak zung zung a, a tul anih chuan Champhai-ah pawh han ken sak a, a hlawma khatianga tih theih dan turt kha ruahmannna fel takin kan kalpui a ni.

Tin, Pu Speaker, Covid-19 chhunga kan supply kalpuinaah lawmthu sawina kan dawng NASA a, lawmawm ka ti khawp mai a. Hei hi ka sawi duh chu, a bul ber chu Pathian-in kan sorkar min la kalsan lo a, min en sak a, ram mipuite min hmangainha vang a ni tih hi a chiangin ka hria a, Pathian hnathawh a ni tak zet zetin ka hria a. Chumi atang chuan kan Chief Minister-te, kan Deputy Chief Minister-te a Supply Minister ka nihna anga min nawrna leh min ngaihtuahpui dan hi sawi vek ila tun hunah hian kan awih kher lo ang a. Zan lai, zan rei pawh an sawi lo hrim hrim a kan Chief Minister-te, kan Deputy Chief Minister-te hian, mirethei harsa zual ten buhfai leina tur an nei lo ang tih an hlau ngawih ngawih a, a thlawn a sem dan tur kawng an dap a ni.

Education Minister zahawm takin a wind up tumin a sawi a, “LESDE atangin thla khat ei kan han tum sak a” a tih te kha, ruahmannna fel tak an siam a, kan Education Minister-te leh kan Chief Minister-ten, khatiang khan kan han ti thei a. Chumi piah lamah chuan heng AAY leh PHH kan tih, a rethei zual bik te man tlawma National Food Security Act hnuiai ration supply min rawn pek hi an kham lo a ni a, an kham loh piah lamah khan State sorkar-in ration card kan phuahchawp ‘card var’ kan tih APL-te tana kan tih zingah hian mirethei tam tak National Food Security Act hnuiai la leng ve rih si lo, kan quota-a la leng lo hi tam tak an awm tel a ni. Chung ang ten a man tlawma an lei ve theih dan tur kha Covid hripui len lai pawh khan ngaihtuahna NASA tak kan hotute hian min senpui a, chutiang chuan vawiin ah kan kal tawk tawk a, tiang hun hi kan thleng thei a.

Engkim mai, driver inlungual a ngai a, a thawktu inlungual a ngai a, FCI nen kan inlungual a ngai a, motor neitute nen kan inlungual a ngai a, chung zawng zawng inlungualna min siam saktu chu ‘Pathian a ni’ ka ti lo thei lo a. Hengah hian mualpho lovin kan awm a, kan department-te an thawk hah a, an hah a ni. Chawlh hi a awm lo reng reng a, Chawlhni pawhin Good Friday a ni emaw, Independence Day a ni emaw, Republic Day

a ni emaw, supply department kha an chawl lo a ni tih ka hriatchianpui khawp mai a. Chutiang khawp chuan an hah a, committee hi an nei a, zan rei a awm thei lo, chutiang chuan kan hotute ruahmanna ti hlawhtling tur hian theih tawpin hma an la a, chutiang chuan tan rualna min pe a ni.

Tin, Central sorkar-hi a fakawm ka ti a, heng AAY leh PHH rethei zualpuite tana ei tur India ram pumpui maia a thlawna ration sem tur min han pe ringawt mai te kha a ropui ka ti a, India sorkar ropui zia hi, khati khawpa stock an lo nei te kha an fakawm ka ti a. Keini chuan rel atanga lak, a thiar chhuah leh sem darh ringawt pawh kha hna bera kan neih, harsa kan tih em ema kha a ni a, khatiang ang min rawn pe thei pawh kha central sorkar pawh hi a bik tak pawhin a chungah hian lawmthu, kan State hian kan sawi a ngai a, a department ang hi chuan kan sawi tawh a ni.

Tin, Gas Supply leh LPG *home delivery* chungchangte pawh kha kan sawi a. Member zahawm tak tak ten ‘kan vengah pawh ti ve ula’ an tih, Pu Sawivunga pawhin a bial chhunga an va laknaah hlawhtlinna te a rawn sawi a, a dik a ni a. Veng 4-ah hian kan han tichhin a *home delivery* hi. A hlawhtlinna ah chuan zawngchhang loh chi a ni lo reng reng a, online in kan va book a, an rawn dah mai a, delivery boy ten. Chu chu kan han tih tirh khan veng dang ten a regular lo ang tih an hlauthawng a. Tunah hian veng 28 ah tihchhin leh kan tum a, kan inbuatsaih mek a. Chung ang chuan district khawpui dangah te pawh tih kan tum a. Aizawl-ah chuan Chawlhhmun, Zarkawt, Zemabawk North, ITI Veng, New Capital, Laipuitlang, Zotlang, Kanan, Thuampui Veng te, khatiang khan veng hrang hrangah sawi vek lo ta mai ila, tih kan tum a. NGO te kan Local Council te, kan AMC Councilor te leh department kan tanrual chuan kan ti hlawhtling chho zel thei turah kan ngai a.

Consumer ten delivery boy te *extra pay* an lo pe anih pawhin, kan step-ah te put chhoh a lo ngai a hautak deuh thin a. Delivery boy te hian gas cylinder pakhatah tunah 50/- lo la ta se, sem tur a tam a zirin nakinah chuan 20/- pawh an la ti duh ang a, vawi khata pek tur an ngah phawt chuan. Chutiang chu anih dawn avangin, a tirah to deuh mahse zawi zawiin extra pay tura te pawh kha a lo tlakhniam phah ang a, hlawhtling takin kan kalpui thei turah kan ngai a ni.

Hemi gas supply-ah hian hlawhtlinna kan hmu a, hnamdang te laka kan harsatna pawh hi min hriathampui a. Tun hmain trip 15 kan dawng thin a, tunah chuan Petroleum Minister, Dharmendra Pradhan-a min tiang chuan trip 23 nitin nei thei turah kan min ngai a, “in mamawh hi trip 20 a ni a, a hmuna in lo kal avangin trip 12 assurance ka pe ang che” a ti ngat a ni.

Delhi-a kan zuk kal pawh khan kan gas hmuh dan an chhutin kham chi kan nih loh zia an hria a. Chuta kan thlen danah chuan, “IOCL te hian gas hi min petling thei lo a, petroleum gas te, Hindustan Petroleum Ltd. te pawh hian min insem tir mai rawh u” kan ti a, an tan a harsat loh thuin min chhang a. An chhut a, an chhut chhuah atanga khatiang a

assuarance min pek ang khan vawiin thleng hian gas-ah kan awlsam phah a. Amaherawchu Chaltsang vel gas distributor neitu khi duh aiin an active lo a, vawiinah hian House-ah information atan kan pe duh a. Warning kan pe tawh a, an trade license te pawh tih tawp sak hial te pawh kan rel a ni. Ngaihdam an rawn dil a, kan ngaidam a, an la ti tha chuang lova. Hei hi a pawi em em a, distributor tam tak ten thahnem ngai taka an tih laiin khi laiah khian harsatna kan tawk a, pawi pawh kan ti a ni.

Tin, oil depot Bairabi chungchangah kan Chief Minister-in min ngaihtuahpui a, amah ngei pawh vawi hnih a lo kal tawh a, a rawn en a ruahmanna min siampui a. A ram hi a buai ang reng a, a ram buai hi DC Kolasib in tunah khuan a ching mek a, a chin chhung a rei tawh ang reng a, a chin fela kan tih fel theih chuan khung te pawh khu *well-fed oil depot* kan nei thei turah ka ngai a. Tin, Mualkhang Gas Boarding Plant hi tihlen tur a ni a, a ram thenawm bul hnai pawh indawr fel vek tawh niin, tun Financial Year tharah hian kan insiam fel theih kan ring a. Chumi atang chuan Mualkhang Boarding Plant pawh siam thata hnianghnar zawka helai hmunah pawh gas stock-na tur tam kan neih phah theih pawh kan inring a ni.

Pu Speaker, Covid lai khan lawmthu sawina tur tam tak a awmin ka hria a, a bik takin kan Chief Minister leh kan Home Minister te, kan Dy. Chief Minister leh Minister zawng zawng leh MLA-te pawh. A theih ang angin NGO te, VLTF te kan tanrualna kha a ropui ka ti khawp mai a. Mi harsa ei nghei mai tur an hriat avanga mahni sum seng dawrh dawrh mimal pawh an tam a, khatianga kan tangrual kha a ropui ka ti a. Henga kan inh mangaihnate kan lantirna hi Opposition MLA kan ni emaw Ruling MLA emaw atu amah, chu chuan a ti lo intih tur awm miah lovin rualkhai tak maiin kan kal a vawiin ni mualpho loa kan thleng thei hi a ropui ka ti a, henga tha thawhtu zawng zawng, a department angin a ni emaw a mimal angin emaw, a pawl angin emaw lawmthu sawi hi a tulin ka hria a, Supply Deptt. changtu ka nihna angin lawmthu ka han sawi a ni.

Kha kha Pu Speaker, ka sawi theih tawk ni mai se. Pu Speaker, i phalna in heng ka Demand te hi he House zahawm taka Member zahawm tak tak te hian min pawmpui turin ka rawn ngen e –

<b>Demand No.</b>	<b>Purpose</b>	<b>Amount (in ₹)</b>
<b>17</b>	Food, Civil Supplies & Consumer Affairs	2,77,00,50,000.00
<b>19</b>	Local Administration	1,00,44,79,000.00
<b>35</b>	Fisheries	9,88,25,000.00
<b>TOTAL</b>		<b>3,87,33,54,000.00</b>

Ka lawm e.

**SPEAKER** : Awle, tunah chuan Pu K. Lalrinliana, Minister zahawm takin a Demand te House-ah pass a rawn dil a, rem ti apiangin ‘remti’ ti rawh u le. Remti lo kan awm chuan ‘remti lo’ ti ula. (*Remtilo an awm lo*)

Awle tunah chuan Minister zahawm takin a Demand te House-ah pass a rawn dil a, rem ti apiangin ‘remti’ ti rawh u le. Remti lo kan awm chuan ‘remti lo’ ti ula. (*Remtilo an awm lo*)

**PU K. LALRINLIANA, MINISTER:** Pu Speaker, ka lawm e.

**SPEAKER** : Awle, tunah chuan Pu C. Lalrinsanga, Minister zahawm takin a Demand te rawn windup-a, sawifiah ngaite rawn sawifiah House-a pass rawn dil turin kan sawm e.

**PU C. LALRINSANGA, MINISTER:** Pu Speaker, ka lawm e. Vawiinah kan Member zahawm tak tak tena ka demand an sawi ngaihthlakte a nuam khawp mai a, kan induhsakna leh kan infakna te pawh kha ka hmaa sawi ang khan a tak tak emaw tih pawh kha thil awl tak turin niin ka ngai a.

Member zahawm tak tak ten in sawi kha han react lova han ban liam ngawt chu a dikan ka hre chiah lo va. Amaherawhchu, a zawng a za chu kan thei lo mai thei a ni.

Pu Nihara kha ka han dah lal ang a, a bial chhunga harsatna an tawh Bangaldesh border fencing avanga leilet tam tak chhia chungchang hi House ah pawh vawi tam tak a sawi tawh thin a, Pu Speaker. Hei hi kan hriat veleh khan Director level atangin Lunglei DAO mai nilo DC through-in kan kal tir a. Tichuan uluk deuhvin an zuk en a, tahrik Ni 4 atanga Ni 8 kha hun an zuk hmang niin ka ngai a. Chutiang chuan a hmunah uluk takin verification an zu nei a ni. Tiparghat hi farmer 47 awmna, hectare 74.05 a zau a ni a, Tin, Khawzoisuri hi farmer 110 awmna hmun a ni a, hectare 88.20-a zau, Tablabagh hi farmer 141 awmna, hectare 127.09 a zau a ni a, Kalapani hi farmer 140 awmna hectare 93.30, a vai hian hectare 383.90 a zau a ni a. Hei hi kan potential area anihna angin hma lak theihna tur ang angin hma kan han la a, mahse khulai a hmuna awm ten court lama kal te pawh an tum nge ni. Engpawhnisela, kei ni chuan kan tih theih ang chin kan zu ti a, a tul angin helaiah pawh kan lo ennawn leh ang a tih kha House-ah pawh report ka pe nisela.

Chumi rual chuan tractor kha an mamawh hle mai a, Chawngte lam pawh a ni tho a, potential kan neih khu a tha a. Mahse kan indaihloh em avangin duh angin kan inenkawl tha thei lova. Engpawhnise, hma kan la zel a, Chawngte lamah phei chuanin land development lam kha kalpui kan tum a ni. Nimin lam khan in *wind-up reiloh siak* lamah te kan kal a, kei pawhin rei loh kan tum ang a. Pu Speaker, lawmthu kan ngaihthlak tam ber a ni a, kei pawh bul tanna atan lawmthu sawi duh ka nei a.

Kan hriat angin Agriculture Department hi, a department angin ka lut nghal ni mai se la, department lian tak a ni a. Kan hria a, tun hnaiah bung thar kan han kai leh ta reng mai a, kum 2002 October Ni 1 khan department directorate 2, Crop Husbandry leh Research Extension-ah bifurcate a ni a. Thil mak ang reng deuh chu kum 18 a ral hnu nikum October Ni 1 vek khan Council of Ministers kan CM kaihhruaina thuneihna sang ber chuan hmun khatah dah khawm lehin restructure a lo ni leh ta a. Hemi chungchangah department hian rei tak kan department kalphungah hian restructure kan ngaihna hi hmuin an hria a, Service Association te pawh in. Ka hnenah pawh vawi duai lo an lokal thin a, kan han bih chiang a an greviance, an hmathlir hi a dik pawhin ka hria a.

Restructuring tura kan han kalpui chhoh khan kawng leh lamah chuan department dang pawhin thik theih dinhmuna ding anihna chen pawh kha a awm a. Amaherawh chu kan Council of Ministers duhsakna liau liau-in restructure dinhmun duhawm takah kan thawktute hlan chhohin an awm a. A hmaa ‘super time level’ kan tih Director, Level 13 kha a ngaia kan that thinna Level 13(A) ah hlan chhoh niin Additional Director 2 leh Joint Director, a hmaa 3 ni thin kha 6 ah upgrade an han ni bawk a. Tin, chumi rual chuan Level 10(A), SDAO kan tih kha a post tibo-in Senior Grade, Dy. Director Level-ah upgrade kan lo ni ta vek bawk a. Chumi rual chuan RD Block kal dan ang dung zuiin block tinah BAO dahan BAO te hi Delegation of Financial Power, DFP Rules hnuiah schedule 3 anga kalpui tura ruahman ani nghe a.

Chutiang chuan restructuring kan lo ni ta a, department pawhin hmathlir a lo neihte kan beisei phak bakin Pu Zoramthanga kaihhruai sorkar hian dinhmun tha takah min hlankainah hian, a changtu Minister ka nihna ang pawhin lawmthu sawi mawlh mawlh tur kan niin ka hria. Tin, chutih rual chuan a department lam pawh an lawm a. Hei hian thawhhona tha leh department pawimawh kan nihna anga kan pawimawhna hlen chho tur pawhin chakna leh phurna a pe turah ka ngai a. Kha kha lawmthu sawi pahin ka ti ri duh a ni.

Tichuan Pu speaker, Agriculture hmalakna hi han sawi zawm ka duh a. Tun tunah hian kan budget te min han thlirpui hlawm a, min vuipui nak nak te pawh an awm a. Agriculture Department hi scheme hrang hrang, centrally sponsored scheme hi 10, a tesep nen phei chuan kan nei dawn a. Heng hi matching share SMS ngai vek an ni a, chumi atan chuan department ten harsatna nei ngai miah lovin, Finance Department pawhin matching share hi min hlenpui deuh zel a. Tin, chumi rual chuan centrally sector scheme pahnih KV leh OECD hi kan nei bawk a. Chu bakah chuan EAP (External Aided Project) atanga funded project kan kalpui FOCUS leh Green Agriculture, GreenAg te, chutiang chu department kan kalpui dan a ni mai a. Tichuan, centrally sponsored scheme ho entirnan RKVY, PMKSY, RAD, ATMA, SMAM kan tih te ho hi Supplementary Demand a lo lang leh thin a ni a. A leh lamah chuan budget amount kan thlir chuan a tlem viau mai thei a, amaherawh chu Supplementary Demand-a a lo lan lehnaah chuan khitah khitah a chho ve thung zel a ni. Chu

chu Agriculture Department budget kalphung a ni ve thung a, a nihna kha ka tarlang ve hrim hrim duh a.

Tichuan, Pu Speaker, ei leh bar intodelhna atana hma latu leh a mawhphurtu kan nih angin theihtawp chhuahin kan department te tan kan la a. Vawiinah pawh Member zahawm tak tak ten department pawimawh a nihna anga support min pekna zawng zawngte kan ngaithla a, a lawmawm ka ti a. Intodelh tak tak tur chuan tuna manual anga kan kalpui thin kha a tawk zo lo a. Kan House Leader hian a sawi thin a, “Mechanisation-a kan kal loh chuan large scale production hi a awm thei lo a ni” tiin, tun tumah pawh mechanization lama chak taka kan kalpui theihna turin thurawn hlarawn te pawh min pe thin a. Sub-mission on Agriculture Mechanisation (SMAM) hnuiah tractor lei lehna mai ni lovin khawl hmanga buh phunna te, buh sengna khawl te, a vuakna khawl te leh a herna khawl thlengin tun tumah hian ke penpui kan tum a ni.

Chumi rual chuan Pangbalkawn-ah khuan buh herna khawl hmanga private-a hmalak tum, ‘Om Om Rice Mill’ an tih te’n khawl pawh chah thlengin, khulai bawr vela buh her tur ang chi awm thei ang ang her thei tura ruahmannna a kalpui mek a. Keini lam department pawh hian SEDP lam atang pawhin a mamawh ang te chu a theih chin chinah kan thlirpui reng a. Tui mamawhna leh tui khawlna tur a mamawhnate, leh tui lakna tur ang chi te leh thil dang dang te pawh kan enpui a. A hlawtling thei anih chuan khu lai bawr vela buhhum eng emaw chen chu her thei turah kan ngai a. Chu chuan Social Welfare-in a bika buh supply an tih thin, rethei zualte pek atan an tih te pawh hi hemi atang te pawh hian tih theih dan a awm ang a tih te, a hlawm puia kan lei mai loh pawhin chumi huangte pawh chu an ni tan han inbarh luhna tur chance te pawh ni thei turah ka han ngai a ni.

Farming system hrim hrimah hian *collective farming* anga mumal taka intel khawma a huhova co-operative movement-a kalpui hi tun tumah hian kan kalpui tum dan nghet tak a ni a. Tuna kan kal danah hi chuan a nei fain an theih ang angin organized ni lem lovin lei an let a, hnam dang lehtir nawk nawk te pawh an tam a. Tun Covid boruakah hian chu chu kan hmu chiang hle a. Khango kha organizea, khawl hmanga leh atanga a buh her thlenga ruahmannna hi kan kalpui theih chuan food production leh rice production kan kalpuinaah pawh hian nasa takin hmasawnna kan thlenpui thei turah kan ngai a. Tuna potential area WRC area kan neih hi Pu Hlana khan a rawn sawi a. Tuna data kan neih hi duhthusam tawk lohna lai a awm te pawhin ka hria a. Chuvang chuan uluk zawka data fel tak nena kan kalpui a tulin kan ring a ni.

Chumi rual chuan tun tumah hian NABARD, 24-RIDF hnuai atangin hectare 484 tha lam lehna tur kan hmu a, a bul tanna turin ruahmannna kan kalpui mek tih kha ka han sawi lang duh a. Tin, he mi a project, EAP bika FOCUS kan kalpui dan hi han tarlan te pawh a tulin ka hria a. International Funding for Agriculture Development (IFAD) funding hnuia FOCUS hi tunah hian District 4-ah kan kalpui a. Serchhip, Kolasib, Mamit bakah District thar - Khawzawl leh Saitualah hawn belh niin, hmalakna pawh chak taka kalpui tum a ni.

FOCUS hnuiah hian sector hrang hrang - Agriculture, Horticulture, Vety leh Soil te a awm a, activity hrang hrangte neiin hma lak a ni a.

Chutiang chuan kan hnung Covid-a harsatna kan tawh tum pawh khan hnamdangin kan leilet te min tichhiait sak avangin chung ho a thlawna lei lehsakna te pawh chu FOCUS Project atang hian kan kalpui a. Khu lai mai ni lovin, District 4 - Champhai, Serchhip, Mamit te chutiang chuan chinai thi te pein a tam zawk leh hlawk zawka an than theihna tur thlirin FOCUS atangin puihna kan nei a. Chu bakah serthlum tiak te, thei chi hrang hrang bakah kuhva te leh hill terrace thlengin ruahmanna kan kalpui a. Tun tumah hian Mat phaiah green house hmalaknate pawh kalpui kan tum a.

Tin, Vety Sector lamah chuan Breeding House siam te, Boar Semen Station siama hmalakna te, tin, vawk leh ar vulh te mai bakah sial vulh thlengin kan kalpui tho a ni. Tin, chumi rual chuan kan farm road leh kan link road te, kan Member zahawm tak ten an sawi ang khan fur a lo ni a kan tharchhuahte phurhchhuahnaah problem lian tak kan nei a. Chutiangte anih chuan FOCUS Area bik hrim hrimah hi chuan kan kawng neih tlangpui, beneficiary ten hmunhma kan invalh tamna hmun te pawh ti ila a dik mai ang a, chung ang hote pawh chu identify-in, *visit pavement* leh *all weather road*-a ruahmanna kalpui kan tum a, a DPR pawh chu kilometre 100 tunah hian district rukah kalpui kan tum a ni tih a kha FOCUS hmalakna chhunga mi ka sawi theih ni se la.

Tin, EAP atang veka project kan neih ‘Green Agriculture, Green Act’ kan tih hi tunhnai maia project thar kan neih a ni a. Covid-19 boruakin min han pawt buai naa hemi chhung hian atih theih ang chin chin chu hma kan han lakpui a. Chutiang chuan tunah hian hmalakna tur an hmachhawp te an kalpui mek a. He project hi Global Environment Facility Funding Agency hnuia FAO hmalakna a ni a. Dampa Tiger Reserve bulhnaia khaw 23 leh Thorang Wildlife Sanctuary bulhnaia khaw 13 te, chung ho hnena environment leh bio-diversity humhalhna tura hmalakna atana ruahmanna a ni a. Tichuan a thawktu tur pawh lakk fel an ni tawh a. An ni hian theihtawp chhuahin assesment survey-te pawh an nei a.

Tichuan he Green Act-in a tum lian ber chu bio-diversity humhalha nungchate tualchaina venhim te, environment danglamna venghim zawnga hmalak te, boruak chhia titlem zawnga eizawnna ngelhnguet siam te, tin environment pawimawhna uluk tak a inzirtira hmasawnna thleng ngei tura hmalakna te a ni a. Chutiang chuan he Green Act-ah hian hma kan la anih chuan hmalakna awmze nei tak leh kan khaw hrang hrangte eizawnna pawh Green Act hmang hian kan siam sak thei dawn a ni.

Tin, chu lo lehah chuan Centrally Sponsored Sector bikah hian MOVCD kan nei a. He hi kan hre tam lo angreng khawp mai a, han sawi lang leh ta ila. “Mission Organic Value Chain Development in North Eastern Region” tih a ni a, a tum ber chu chemical fertiliser tel loa thlai tharchhuah tihpun a ni a. Central sorkar hian North-East bik hi *virgin land* anga a ngaih avangin he mission hi North-East bikah hian practise ta ila tiin duhsak takin tun

tumah hian Nagaland nen kalpui a ni a. Tichuan kum 2016 atanga bul lo tan tawh niin tunah hian phase-I & phase-II kan zo tawh a, phase-III, hei hi hectare 8,000 vel cover tur niin tunah hian kan lut leh mek a.

He Mission hnuiah hian service provider sorkar-in tlanchhuah a nei a, Chumi te enkawlna hnuiah chuan FPO dinin hei hian *farmers interest group* eng emaw zat siamin chu mite group hmang chuan tlhai tlanchhuah bik hmarcha te, sawhthing te, aieng te leh thingpui te, organic hlang thar chhuaka hma la tura tih an ni a. Kawng lehlamah chuan heng organic product-te hi keini ang ram rethei ah phei chuan a man zawka suma kan chan theih thil a ni a. Ka la hriat reng chu 2001 kum kha ni tain ka hria a, German based company an rawn kal a. Chuti lai chuan MIFCO Chairman ka ni a, kan sapthei tui kha min rawn dawr a. A theitui rate kan siam let pawhin organic hlanga theitu kan siamchhuak thei anih chuan an lei ngam thu min hrilh a. Chuta tang chuan hemi organic products hlutna hi a chiang hlein ka hria a. Chuvang chuan Central sorkarin hetia duhsak taka he Mission min rawn pe pawh hi a hlawhtlin ngei theih kha kan duhthusam a ni a. Chutiang tur chuan chak takin hma kan la a ni.

Farmer Producers Organization hi 9 kan din tawh a, a din tur hian certified ngai a ni a, certified tu tur chuan mithiam chung chuang, khawvel pawhin an hman ang chi te mamawh a ni a. Tun tumah hian kan MOVCD hnuiah hian ECOSAT kan ruai a, chu chuan kum thum chhung kan FPO te an enthla a, chutah chuan chemical trace an hmulo anih chuan FPO kha FPC-ah certified theih a lo ni a, Chu A certificate chu hun lokal zel tur atan pawh A pawimawh a ni. Chutiang chuan tunah hian hmather lak leh a ni a, chu chu MOVCD bikah khan ka sawilan leh ni sela.

Member zahawm tak takte khan research pawimawh zia in rawn sawi chhuak a, kha kha a lawmawm ka ti a. Keipawhin Agriculture department ka chan hnu hian hian Crop Husbandry hi chu tihan a kal mai a, mahse research base-a kan kal loh chuan agriculture development hi a takin a kal theilo a ni tih hi chiangin ka hria a.

Tichuan, R&E hnuiah kan hmalakna hi tlem han sawi leh ila. Kan member zahawm tak tak te khan in rawn sawi lang tawh a. Hnahthiala zirna ITC hi cabinet-in diploma course kan kalpui theihna turin min upgrade a, tunah hi chuan School of Agriculture Science angin syllabus thar te kan nei a, hei hi an zir chhuah chuan hmundangah degree course-te pawh zir zawm thei tura *bridge course* tih theihna tur kan syllabus-ah kan rin lut tel tawh a. Kan building te saw a rawih deuh tawh a, a sak thatna kan sorkarin RIDF NABARD atangan min pe a, kan han sa ang a. He School of Agriculture Science hi theihtawpin Covid-19 boruakin min tinsan hunah phei chuan hma kan la dawn a ni.

Chubakah chuan tualto vaimim, mimpui leh puakzo te state variety-a release tum a ni a, hei hi Indian Institute of Maize Research, IIMR te nena tangkawpa hmalakna kal mek a ni a. Tin, Member zahawm takte sawi ang khan OP-12 Bio fertilizer laboratory Neihbawih-

a mi hi sak zawh a ni mai dawn a, heta tang khian organic fertilizer a tam thei ang ber tihchhuah tum a ni. He hmalakna hi kan House Leader-in thahnem min ngaihpuiinaa hmalakna vek a ni a, SEDP atanga kan tih a ni. Tin, chubakah chuan Biological Control Laborary, Lengpui-ah tunah hian a building te sak tan a ni a. heta tang hian Bio-control agent te siam chhuakin hmun hrang hranga kan farmers te hman tangkai tura ruahmannna kalpui tur a ni.

Tin, Seed Village te in han sawi lang bawk a. Kan DAO hmun hrang hrangah Agriculture Training Agency, ATMA te kut kea kan hman te niin tunah hian chak takin hma kan la a. Thlai chin tlanglawn ho, be te, vaimim te, tlangram buh chi te leh Manipur atanga buh chi kan lak RCM-10 leh 13 te pawh chin pun a ni a. Tun tum kharif season-a WRC leilet neitute chin hman tura kalpui a ni nghe nghe a. Chumi rual chuan Alu-a intodelh hi kan sawi nasa a, a tul pawh a tul a. Mipuiin kan ei nasa a, naupang phei chu a tellovin an awm thei meuh lo a ni. Chuvang chuan hei tal hi chu intodelh tura hmahruaiah kan neih a thaw lawm ni tih hi kan rilruah a awm thin a. A chin punna tura hmalakna hi buaithlak deuhna lai a awm a. a chi tur phai atanga lak hian tam tak hi a tawih chhia a, harsatna tam tak a awm thin a ni. Chuvang chuan, tissue culture hmang a hmalak theih dan awm turah kan ngai a. Chutiang chuan research lama thawk tuten ruahmannna siamin tunah hian NEC-ah kan vawmlut a. Hei pawh hi House Leader kan CM zahawm tak hian min phurpui a, a hlawhtling ngei turah pawh kan ngai a.

Tin, chubakah he Post Survey Management leh Food Processing kan han tiha hi hmalakna chak taka kan kal rual hian a hnukhawi, a hmawr bawkna hi a pawimawh hle a. Chuti rual chuan, Aizawl-ah kan thalai rualte Entrepreneur engemaw zat an awm a, chungho chuan phur takin, mahni phur phura phur te pawh an lo awm bawk a, tin, mahnia funding zawng mawlh mawlh tawk te pawh an awm bawk a, chuti karah chua kan hnen te pawh an lo thleng rawk rawk a, chunghote pawh chu kan han pui chho a. Hei, tun hnaiah an rawn chho a, chungho chuan ‘Buyers and Salers Meet’ anihna angin buyers ho mithiam leh chinchang hria eng emaw zah an lo chho a, chungho nen chuan kan thalai rualte inhmuikhawmna te an nei a, chu chuan kan agriculture product hmasawnna kawngah hian rahbi thar kan rah chhohna tur pawh a kawk dawnin ka hria a, lawmawm ka ti khawp mai.

Tin, chulo lehah chuan, 15<sup>th</sup> Finance Commission Report-in Agriculture Reforms kalpui dan tur hrang hrang a tarlante Mizoram State mila her rema legislate tura ruahmannna kalpui a ni a, hei hi Law-ah kan *vet* ang a, tlemin a rei deuh hlek a. Tun tumah hian kan House pawhina a ngaihtuah tura chhuak hman turah kan ngai a, amaherawh chu a chhuak hman ta chiah lova. ‘The Mizoram Land Leasing Bill’, ‘Contract Farming Bill’, ‘ATLM Bill’, ‘The Mizoram State Agriculture Agriculture and Livestock Marketing, Promotion and Facilitation Bill’ tih te a ni a. Heng ho hi kan neih a pawimawh a, hemi contract farming anga potential area kan neithe hi kan kalpui angai tawh a. Tin, land leasing act-te hi kan nei thei anih chuan tuna kan ram zau tam tak hi entrepreneur-te leh kan thalai rual mitui zawk ten ruahmannna tam tak neia an rawn inbilh luhna tur leh an rawn tlukluhnna tur ani dawn a.

A pawimawh khawp mai a, khang kha hun reilo teah session lo awm leh turah te pawh House-in a kan pass theih tura ruahmanna kan kalpui theih ka beisei a ni.

Tichuan, Pu Speaker, a dawt leha kan sawi duh chu, Irrigation Department kha kan member zahawm tak takte khan in rawn sawi a. Amaherawhchu, department lam luhaina lam kha chu in rawn sawilang chiahlo a. Vawiinah hian Irrigation Department-hi ka fak mawlh mawlh duh a, ka department mah nisela. Department lian tak a ni lova, district 11-ah tunah phei chuan district 4-ah chiah division kan inhung thei a. Chuti chungin a district dang kan awm lohna district ti mai ang, kha kha an awi thei vek tho mai a ni. Mamawh nei kha anni ho hi an ni si a, chutiang chuan indaihlo tak chungin hna kan thawk a. Lehlamah chuan dem kan hlawnna tur tam tak te pawh awmin ka ring a. Amaherawhchu, inhriathiamna nen annmahni tawka hma lain tun hun kan thleng ve a ni. Funding source an neiha hi PMKSY leh NABARD hi a ni mai a, PMKSY ‘Hatkhe Kaw Pani’ an ti deuh kher a, he scheme hnuiah hian Minor Irrigation project thawh lai mek nichina kan ngaihthlak ang khan 36 a awm a. Heng project thawh chhunzawm nan central assistance nuai 765 hmuu belh kan inbeisei a. Hei hi tun kum Financial Year chho-ah hi chuan zawh hman kan tum a ni.

Tin, chubakah chuan, he ground water scheme hnuiaia project thar, Ground Water Irrigation Project 13 thawh nan central atangin vaibelchhe 866 hmuu a ni a. He Project-ah hian ‘drill rig’ kan ti mai a, tractor-ah khan a verhna khawl vuahin ti khan a verhna hmun tur potential area-ah tlanpui lawng lawngin ti khan zuk verh chilh mai theih tura ruahman a ni a. Tichuan, leihnuai tui verh chhuahna tur hmun 209 ruahman niin chuta tanga 184 hi Solar tui pump hmanga *run* tur a ni a, hmun 25 erawh hi chu electric hmanga kal tur kha a ni. Tichuan, he project hi hectare 553 chawm thei tura beisei a ni a, loneitu 468 chhawr theih tura beisei a ni bawk a ni.

Tin, RIDF NABARD hnuiah bawk hian project paruk zawnna tur nuai 353 hmuu a ni a, tun thal chhunga zawh hman tum a ni bawk. Tin, RIDF NABARD hnuai atang vekin cheng nuai 227 senna tur Chawmzau Ground Water Irrigation Project, Serchhip-ah kalpui mek a ni a, tunah hian sawrkar approval pawh hmuu a ni tawh a. He Project hi ram hectare 52 chawm tura ruahman a ni a, a thawhna tur hi tunah hian sawrkarah sanction dil mek a ni.

Hei hi Pu Speaker, ka han sawi zau hlek ang a. Chawmzau khi Irrigation Channel chawm tur hian tui kan hmuu thatloh avangin ground water atanga tui verh hi kan kalpui mai loh chuan tiin hmuu 31-ah lei verhna tur ruahman a ni a. Tin, hemi bakah hian FOCUS atang hian tlang bawk te te-ah khian reservoir dah a, solar pump hmanga tui pump-na khawl siama farmer ten tangkai taka an hman theih tura ruahman a ni a. Project DPR-te siamin tanky pawh eng emaw zat siam tum a ni tih kha ka sawi kai duh a. Tin, nichina kan ngaihthlak ang khan Irrigation Project zawh tawh, amaherawhchu channel chhiat avanga leilet hectare 4889 lai mai hluihlawn, luh theih miah loh kha kan nei a. Heng a sawprawp

tawh te siamthatna atan hian Special Central Assistance sum kan hmuh atangin tunah hian hmalak tum a ni a. Chungte chu ka sawi kai tel duh a.

Tin, Member zahawm tak ten in sawi ang khan PM Kusum Yojna hi nikum khan PM Kusum hnuia loneitute hman tur solar pump unit 200 central-ah kan dil a, min rawn phal sak a. Amaherawhchu, a funding pattern hi a buaithlak deuh hlek a. Central-in 50% a tum ang a, 30% hi state sawrkar-in, 20% hi beneficiary-te tum tur a ni a. Hemi funding pattern chungchangah hian tlema harsatna kan neih avangin kan ruahmanna duh angin a chak maithei lo a. Amaherawhchu kan House Leader hnenah hian kan harsatnate kan thlen a, Financial year hi han zo sela hei hi engemaw ti zawng tala kan sutkian theih kan inbeisei a, a ni pawhin min ngaihpawimawhpui a. Hei hi kan ti thei anih chuan a hnuia hp 2 atanga hp 7 tlenga chak kha kan hmu thei dawn a. Chutiangte anih phei chuan tuna kan farmer tam tak hmun hrang hranga tui avanga harsatna neia tlhai pawh ching hlei thei lo te harsatna sutkian saka, an beisei anga kan thar tur ang angte thar thei tura ruahmanna kan neih sak theih kan inbeisei a ni.

Tichuan, Pu Speaker, Irrigation channel hi tuna kan han sawi bak kha hmun hrang hrangah tun ang hunah phei hi chuan channel-a tui luang hi kan nei tawh mang lo a. January, February-a awm chin te chu a awm bawk a, amaherawhchu March-ah ngat phei chuan kan channel-ah hian tui a luang tawh lo a ni. Chuvang chuan tun tumah hian kan division hrang hrangte intir darhin heng kan channel neihte tun ang huna khawro tawhte hi identify-a, a channel kal zela tui awm thei hmasa ber atanga a channel-a luan tir theihna tur tui awm theite pawh identify nghala chutiang ang zawnga tui farmers ten an dawn theihna turin ruahmanna kalpui nise tiin kan department chuan hma kan han la. Hei hi record a lo kal meka ruahmanna remchang siam theih anih chuan, kan farmer-te tan harsatna kan sutkian sak thei turah kan ngai a.

Tin, chu loah Pu Speaker, NHP kan tih hi Central Sector Scheme, senso zawng zawng central tum vek a ni a, he scheme hnuiah hian National Hydrology Project thawh mek a ni a. He project hi India ram puma kalpui niin kum 8 chhung thawh tura ruahman a ni a, 2013-2014 kuma zagh tura ruahman a ni. He project hi water resources information chi hrang hrang changlung leh rintlak kan neiha, a mamawh apiang hnena chhawpchhuah anih theihna tura duan a ni. He project hnuiah hian hna hrang hrang bakah IIT Roorkee-a mithiamte ruaiin heng zir bingna chi 2 hi kalpui tan a ni a. ‘Spring rejuvenation studies’ an ti a, tui hna kang zel veng tura hmalak dan an hriat theihna tur leh sediment studies, lei chunglang luangral leh lui mawng lama a inchhek khawmin nghawng anei theih dan zirchianna kha he NHP hnuia hmalakna ina an kalpui mek a ni. Hengte hi a taka a hlawhtling thei anih chuan tuna tui harsatna kan sawi ang chi a solution heta tang pawhin kan hmuh theih a beiseiawm dawn a ni tih kha ka han sawi duh bawk a ni.

Tichuan, Pu Speaker, tun tumah hian Rain-water harvesting tank, ruah tui vantla khawlina hi hmun tinah kan ngaihpawimawh thu kan sawi thin a. Chutiang chuan he 10%

GBS kan tih chhungah hian project te kan zu vawm thla ve a, tun Inrinni khan phone te kan han dawng a, hlawhtling thei tur ni awm takin Delhi lam atanga kan contact atang chuan kan hria a, a lawmawm kan ti a. Chungte chu kan sawi ni se la.

Tichuan, Pu Speaker, Cooperation-ah hian tawi te sawi duh kan nei a. Tun tumah hian nichina Agriculture chungchanga lawmthu ka sawi ang bawk khan Cooperation Department-ah pawh hian lawmthu sawi tur kan nei a.

Hun rei tak service problem, internal service problem kan neih avangin Cooperative Society/Cooperation Department hnuiah hian harsatna tam tak kan tawk a. Hemi promotion stagnation, promotion kal chak hlei thei lo, tiang khan zawng khan harsatna kan nei a ni. Cooperation hi *organized service*-a a luh dawn khan Sr. Inspector hi *service cadre entry post*-ah dah a ni a. Chumi rual chuan a hnuiah hian JICS, Jr. Inspector kha a luhna ve tho kha a awm a, chutah chuan mi eng emaw zah thawktu an awm tho a. Chutiang chuan promotion han kal chho-ah khan cadre post hnuai lam, a cadre post atanga an service kha chhawm theih a nih si lova, chu chuan Cooperation-ah hian harsatna lian tak min siam a. Theihtawp chhuahin hma kan la a, Council of Ministers-ah pawh kan thlen a, cabinet agenda-ah te pawh kan barh lut a. Cabinet te duhsaknain restructuring JICS leh SICS amalgamation te min phalsak a, amalgamate anih hnuah Cooperative Audit Officer hming siamin ruahmanna fel takin a kal chho a. Hei, a bikin kan Dy. CM hi hemi kawngah hian theihtawp chhuaha hma min lak saktu a ni a, ani hi kan han tahawh a. DP&AR lama kan official-te nen theihtawp an chhuahna atangin ruahmanna, a chung lampanga service harsatna kal chho zel ang chi te thleng pawh khan sawihona hun te kan han nei a. A solution kan han nei chho zel a, tun hunah department tan pawh a luhaina kha leh chen hunrei tak mai an lo harsat tawhna chu a kawlpui kan su thla ta a. Hei hi keima huna ruahmanna thar neia kan han kal chho phei hi chu ka lawm tak tak a, khangte kha kan sawiduh a.

Tin, Cooperation Department hmalaknain Mamit District hi ‘aspirational district’ anih angin hun hmasaah ICDP te hmalak pui an ni a. Tun tumah hian 2<sup>nd</sup> phase hmalakna kalpui leh a ni a, tunah hian cheng nuai 126 ICDP atana hmalakna tur kha ruahmanna sum kalpui a ni tih te kha kan sawi duh a.

Tin, Pu Speaker, nichina kan han sawi, Member zahawm tak tak ten ‘Pradhan Mantri Vandhan Yojana’ PMVDY kan tih kha han sawi fiah lehzual ngai a awmin ka hria a. Hei hi nikum hmasa lamah khan tri-fed te thawhhona thuthlung siam a ni a, hei hi Tribal Affairs Ministry hnuia project pakhat, mission pakhat a ni a, ramngaw thiat loa, a chhunga thil hlu lakchhuaha, a hlutna pei puna suma chantira kha he Vandhan Mission-in a tum a ni a. Tunah hian first phase-ah ‘VDVK’ kan ti a, Vandhan Vikas Kendra, kha kha ‘farming co-operative society’ tihna mai a ni a, a vai hming kha a ni ve mai a. Chutah chuan tunah hian a *first phase*-ah khan he farming co-operative society hi 44, district tinah din a ni a, chung ho hnenah chuan cheng nuai 581 pek chhuah a ni tawh a.

Tunah chuan *second phase*-ah VDVK 115 kalpui leh mek a ni a, training, advocacy leh equipment khang ang ruahmanna atan khan crore 17 sanction hmuh a ni tawh nghe nghe a. Tichuan hmalakna tlangpui kan neih hoa hi a hlawk thlak hle dawnin ka hria a, MOVCD kan han tih te leh thil dang dang RD Department atanga hmalakna hrang hrang, thingtlanga activity kan neih hote nena convergent mode-a kalpuia kuthnathawktute sum lak luhna hmanraw pawimawh tak tur kha a ni chho dawn a ni. Chutiang chuan a hnuiah hian kuhva skawp-na te, aieng, sawhthing, hmarcha, chhawhchhi, sahbawn te, tin khuai khawi te thleng pawh he mission-ah hian a kalpui theih a. Tin, tumbu pickle te, mautuai pickle te, rawtuai pickle te pawh hmun thenkhatah chuan siam a ni a, khatiang khan hun lo kal zel turah *buyers and sellers meet* te pawh ruahmanna neiha, farmers te, society te intihphur tawnna neia kalpui kha kan tum a ni tih te kha ka sawi duh a.

Tichuan Pu Speaker, Co-operation department-ah hian hmasawnna tam tak kan neih sawi tur a awm a. MCAB, Mizoram Co-operative Apex Bank hi hun hmasa, hemi MNF Ministry hmasa ah te phei kha chuan Bank thi mai thei dinhmun a ding kha a ni a, hun a lo kal zel a, hei tun hunah tak phei chuan an NPA hi 3.61% alo ni reng tawh mai a, bank hi 5% below anih hian schedule bank a hlankai theih a ni a, chutiang ang dinhmunah chuan kan Apex Bank te pawh hi alo ding reng tawh alo ni a.

Tin, nikum kum laihawl vel khan an profit turn-over ka zawh khan vaibelchhe 9 kha a ni a, tun dinhmunah tak phei hi chuan vaibelchhe 15 deuh thawin a lo thang hman a, hengte hi a lawmawm hlein ka hria a. Tin, hei kut hnathawkte he mi Aizawl suburb area-a kan neih ho, Sihphir te, Muallungthu te, Aibawk te pawh a ni ang chu, sawlaiah te phei chuan bank pawh a awm mai thei a, hemi mobile ATM Van kan hnung lawka kan han *launched*-a kha a tangkai hle dawnin ka hria a. Kan farmer-te bank-a kal buai ngai lova an awmna hmun pan chilha ruahmanna siam theih tho kha a ni a. Chutiang chuan he mobile ATM Van pahnih kan released hi tangkai taka kan hman ka beisei a, a bak pawh hi NABARD ho hian min ngaih pawimawhpui a district hrang hranga pawh darh theih tura hmalak theih anih a beiseiawm a, kan la chhawm zel turah pawh ngai ila.

Tin, MIZOFED-ah hian hmasawnna tam tak hmuh tur a awm a, kan sawi vek seng lovang a. MIZOFED bikah hian dispensing pump, ‘petrol pump’ kan ti leh mai thin a, a hming dik takah chuan ‘dispensing pump’ tia lam tur a ni e, an ti a. Tun tumah hian dispensing pump hi hmun li-ah Aizawl, Kawnpui, Keifang leh Tlabung-ah te dah tum a ni a, Pu Nihara bialah pawh khan MIZOFED dispensing pump dah tumna kan nei anih chu.

Tikhan, Pu Speaker, ka duhtawk mai ang a. Member zahawm tak takte han react vek theih che u pawh kha a that tehlul nen nichina kan ngaihthlak ang khan, leh kan sawi tawh ang khan heng chhannate pawh hi kan kawl vek tho a, nakinah a chhanna kan la rawn circulate thei tho turah ngai ila a thain ka ring a. Pu Speaker, kha kha kan sawi theih chin ni mai sela.

Tichuan, ka Demand-te hi he House zahawm tak hian min pass pui turin ka ngen a, chungte chu:

Demand No.	Department	Amount (in ₹)
31	Agriculture	1,84,22,75,000.00
37	Co-operation	14,94,60,000.00
47	Irrigation & Water Resources	58,46,59,000.00
<b>TOTAL</b>		<b>2,57,63,94,000.00</b>

Ka lawm e.

**SPEAKER** : Awle, tunah chuan kan Minister zahawm tak Pu C. Lalrinsanga Demand-te:

Demand No.	Department	Amount (in ₹)
31	Agriculture	1,84,22,75,000.00
37	Co-operation	14,94,60,000.00
47	Irrigation & Water Resources	58,46,59,000.00
<b>TOTAL</b>		<b>2,57,63,94,000.00</b>

House-ah pass a rawn dil a, remti a piangin, ‘remti’ ti rawh ule. Remti lo kan awm em? Rem tilo kan awm chuan ‘remtilo’ ti ula. (*Remtilo an awm lo*)

Awle, tunah chuan kan Minister zahawm tak Pu C. Lalrinsanga Demand No. 31, Agriculture a hman turte, Demand No. 37, Co-operation a hman turte, Demand No. 47, Irrigation & Water Resources a hman turte, a vaia belkhawm ₹2,57,63,94,000/- te chu House-in lungrial takin a pass ta a ni.

**PU C. LALRINSANGA, MINISTER:** Pu Speaker, ka lawm e.

**SPEAKER** : Awle, vawiina kan tih tur, kan business chu kan lo zo leh ta a, kan chawl leh rih ang a, naktuk Nilaini, 17<sup>th</sup> March, 2021 chawhma dar 10:30 ah kan thukhawm leh dawn nia.

*Sitting is adjourned. (7:31 PM)*